

Pexanialivaisi Jesucristo pelivaisi, San Marcos peyaquinaelivaisi

*Pacuenia Juan jivibautisabinë jivi livaisi tsi-paeba petusato nacuata yabara pelivaisi
(Mt 3.1-12; Lc 3.1-9, 15-17; Jn 1.19-25)*

1 Mara pacuenia taxuxuaba pexanialivaisi, Jesucristo Dioso pexënato pelivaisije.

2 Bajayata Diosojumepaebinëmi, profeta Isaíaspijinë, tajëvelia yaquina Dioso pejumaitsijava pexënatojavabelia. Dioso jumaitsi pexënatojavabelia mapacueniae:

Itorobianajë nevajënaeyabelia tanejumelivaisipae-binëneda. Catsivajënaexanebijitsia nijanamuto.

3 Nexata tanejumelivaisipaeabinë vavajai tsane petusato nacuata. Jumaitsi tsane jivijavabelia: “Jivi baxaneba panamutoverena najetarucae�itsia petuxanenë. Batoroviaexananua namuto. Bajara pijinia pacuenia paxamë ata panajamatatabécuenexaniavaere pepo petuxanenë pepatsivajënaeya paxamëjavaberena,” jai tsane tanejumelivaisipaeabinë xamë yabara, jai bajayata tajëvelia Dioso pexënatojavabelia pejumaitsijava Juan jivibautisabinë jivijavabelia Dioso pejumelivaisi petsipaebanajetarucaejanexa yabara.

⁴ Bajaraxuata nexata Juan jivibautisabinë Dioso pejumelivaisipaebinë najetaruca petusato nacuajava Jesús pevajënaeya. Juan jivijavabelia jumai tsaponae mapacueniae:

—Pacopabare pibisiacuene paneexanabiabijava. Panajamatabécuenepénëyorore Diosojavabelia. Bajaraxuacujinae pacabautisabianatsi. Nexata Dioso pacavecuajibiaexanaena panijaneconimi, jai tsaponae Juan jivijavabelia.

⁵ Nexata ayaubitsaëtoxaneto Judea nacuapijivi, Jerusalén tomarapijivinua, muxunaponabiabatsi Juan petsipaebilivaisi penamuxunaevetabiabinexatsi. Nexata bajarapamonae pibisiacuene pexanaejavami, rovialia Diosojavabelia navecuapaebapona. Bajaraxuacujinae Juan bautisabapona bajarapamonae Jordán meneta.

⁶ Juan naxatata camellonata pexanaejava. Naepacëta cuerobocoto. Pexaejava ëbosese, jabëra yajava.

⁷ Juan Jesús pelivaisi jivi tsipaebapona. Jumai tsaponae tajëvelia Jesús yabara:

—Tacovëverena patsiana itsanë. Bajaraponë daxitacuene pexanaenexa pecaejëpaenëtsi tsane. Xanë raja saya bevelajamatabécuenenënë bajaraponëvecua. Nexata vecuaauranë bajaraponë bepijajivitonënë tanataenexa. Nexata auranë pijazapatato ata tataxujonotsinexa.

⁸ Xanë raja saya pacabautisabatsi merata. Ponë rajane xanëcujinae patsiana, bajaraponë pacatsijamatabéjoneyaexanaponaena Espíritu Santo, jai tsaponae Juan jivijavabelia Jesús yabara tajëvelia pevajunupaebijavata Jesús penajetarucaejavexa.

*Pacuenia Juan bautisaba Jesús yabara pelivaisi
(Mt 3.13-17; Lc 3.21-22)*

⁹ Jesús najetaruca Nazaret tomaraverena, Galilea nacuata peecaetomaraverena. Nexata Juan bautisaba Jesús Jordán meneta.

¹⁰ Jesús pebautisabujinaetsi menevetsina penonotajunaejavata, tane itaboxo penapatsi-java. Bajarajota Jesús tane Espíritu Santo ata perunaejavatsica pematatsenéatsica beucucuto.

¹¹ Jesús jumetanenua athëbëvetsica Dioso pejumaitsijavatsi: “Xamë raja taxënatomë, bitso tacaa-sivanë. Bitso casivajamatatabëcuenebarëyatsi,” pejai-javatsi.

*Pacuenia Jesús jamatabëcueneëjëbatsi dovathi
yabara pelivaisi*

(Mt 4.1-11; Lc 4.1-13)

¹² Jesús Juan pebautisabujinaetsi, bepijiayo Espíritu Santo ponayaexanatsi petusato nacuayabelia.

¹³ Bajarajotalia daxitacueneviria unupijivi jinavanapa. Nexata bajarajota Jesús ponapona, caenë, cuarenta pamatacabibeje. Bajarapamatocabianëta dovathi picani Jesús jamatabëcueneëjëbatsi pibisiacuene pexanaenexa. Bajaraxuacujinae ángelevi runaica Jesús peyavenonaenexatsi.

*Pacuenia Jesús Galilea nacuata taxuxuaba
Dioso pitorobilivaisi jivi petsipaebijava yabara
pelivaisi*

(Mt 12.12-17; Lc 4.14-15)

14 Juan penaneconitsiaexanaenexatsi vajabitsaë vaetabatsi. Nexata penaneconitsivi pejebabiabibota Juan naneconitsiaponapona. Nexata abaxë Juan penaneconitsivi pejebabiabibota itsa ponapona, Jesús najetaruca Galilea nacuajavaberena. Jesús jivi tsipaebaponarena pexanialivaisi. Tsipaebaponarena daxita Dioso pijajivi pevetsijavanexa.

15 Jesús jumai tsaponae jivijavabelia mapacueniae:

—Imoxoyo rabaja pevajënae pecopiapatsinexa Dioso papecaevertsimatocabinexa. Nexata pacopabare pibisiacuene paneexanabiabijava. Panajamatabëcuenepënëyorore Diosojavabelia. Pajumecovënëre mapapexanialivaisije papecacapanepaelivaisinexa, jai tsaponae Jesús jivijavabelia.

*Pacuenia Jesús junata cuatro ponëbeje dujuai
peyamatajucabiabivi yabara pelivaisi*

(Mt 4.18-22; Lc 5.1-11)

16 Jesús najetaruca Galilea pucaxaneto itapaya. Nexata Galileapuca itapata Jesús taenuta anijanëbeje nacaebananëbeje, Simónbeje Andrésbeje. Bajaraponëbeje daxitamatacabí canacuјitsia dujuai yamatajucabiababeje.

17 Nexata Jesús jumaitsi bajaraponëbejejavabelia:

—Naxanitsia. Panepënaponarebeje. Nexata pacacujarubianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaenamebeje Dioso pijajivinexa, jai Jesús bajaraponëbejejavabelia.

18 Nexata bajaraponëbeje dujuai peyamatajucabiabijavamibeje bajarajota puenetabuatabeje. Nexata baja naponabeje Jesús pepëta.

19 Nexata icatsia bebeliayo pevajënaeyabelia Jesús barëpona. Icatsia Jesús taenuta anijanëbeje Santiagobeje Juanbeje, Zebedeo pexënatabeje. Bajaraponëbeje pijajeraënëta xanebanucabeje dujuai peyamatajucaejavabeje.

20 Nexata icatsia Jesús junata bajaraponëbeje ata. Nexata bajaraponëbeje bajarajota jerata puenetanutabeje paxa Zebedeo jane baja. Nexata Zebedeo, pijajivi yajava, nacopatanuca bajarajota. Nexata baja Santiagobeje Juanbeje naponabeje Jesús pepëta.

*Pacuenia pebi dovathi peyajavaponaponaenë
Jesús jamatejemayaexana yabara pelivaisi
(Lc 4.31-37)*

21 Nexata Jesús, pijajivi yajava, pata Caper-naum tomarabelia. Judíovi penacueraevertsimatacabita Jesús joneya judíovi penacaetuatabiboyalia. Nexata bajarajota Jesús jivi livaisi tsipaeba.

22 Nexata Jesús pejumetaevitsi jamatabëcuenenabenajaca Jesús petsipaebilivaisi yabara. Bajarapamonae jamatabëcuenenabenajaca tsipaji xaniavaetsia Jesús tsipaeba Dioso pitorobinëtsicuenia. Apo tsipaebi pacuenia judíovi pecujarubivi tsipaebabiaba.

23 Bajarajota pebi dovathi peyajavaponaponaenë naeca. Nexata bajaraponë Jesúsjavabelia vavajai tsaxuabi. Jumaitsi:

24 —¡Jesús, Nazaret tomarapijinëmë, paneve-cuaponare baja! ¿Detsa xua paneexanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexénatomë, pepo pexaniajamatabëcuenenëmë, jai dovathi peyajavaponaponaené Jesúsjavabelia.

25 Jesús nexata jumeitaveta dovathi. Jumaitsi:
—¡Moyamëre! ¡Vecuapitsapare baja maponëje! jai Jesús.

26 Nexata dovathi pebi pinijicuenia devacaibi-aexanatsi. Dovathi vavajai pinijicuenia. Nexata baja dovathi pitsabijirava jivitonëvecua.

27 Nexata daxitajivi bajarapacuene itsa tane, bitso jamatabëcuenenabenajaca. Najumaitsi bajara-pamonae:

—¿Detsa mapitsicueneje? ¿Detsa mapitsipe-janacujarubicueneje? ¡Maponëje Jesús, beDioso pitorobinëtsitsica! ¡Dovathi ata jumecovënëtatsi! ¡Nexata Jesús pitavetsixae dovathi, pebi baja vecuapitsapatsi! najai bajarapamona.

28 Nexata daxita Galilea nacuapijivi bepija Jesús vënëlivaisitanetsi Dioso pesaëta pinijicuenepexanaponaejava.

*Pacuenia Simón Pedro pijava pena Jesús tojamatejemayaexana yabara pelivaisi
(Mt 8.14-15; Lc 4.38-39)*

29 Jesús baja pitsapa judíovi penacaetuatabiabi-bovecua. Nexata Santiagobeje Juanbeje Jesús ya-javapona. Jesúsbana napona Simónbeje Andrésbeje pijaboyabelia.

30 Nexata Simón pijabota Simón pijava pena Jesúsbana pevajënae romaebanucatsi camata.

Nexata itsamona bepabajia Jesús tsipaebarëcëpatsi bajarapova peromaebanucaejavatsi.

³¹ Nexata Jesús imoxoyotabalia peromaebanucaeverts. Cobeyotsiaya matacota. Nexata bajara-jota peromaebanucaeverts vecuaajibi tsanajetsitsireca baja domae. Nexata bajarapova Jesúsbana pexaejava toexanatsi.

Pacuenia ayaibitsaëto jivi piavitanevi Jesús jamatejemayaexana yabara pelivaisi

(Mt 8.16-17; Lc 4.40-41)

³² Itsa baja ajena meravitsia, Jesúsjavaberena tocapatatsi daxita piavitanevi. Tocapatatsinua dovathi peyajavajinavanapaevinua.

³³ Daxita tomarapijivi Jesús pepatsibota baupajavaberena nacaetuata.

³⁴ Nexata Jesús jamatejemayaexana ayaibitsaëto daxitacuenevitane pexainaevimi. Vecuacapitsapanua dovathi peyajavajinavanapaevi. Jesús apo tocopatsi dovathi pecuaicuajainexa jivijavabelia pevajunupaebiyanivatsi. Tsipaji dovathi xaniavaetsia Jesús yapëtanetsi Dioso pexënatocuene.

Pacuenia Dioso pitorobilivaisi Jesús jivi tsipaeba Galilea nacuata yabara pelivaisi

(Lc 4.42-44)

³⁵ Pepo bajayacunua, abaxë itsa apo napebetsi matacabi, Jesús naëcota. Nexata pitsapalia bovecua. Pesaicaeyojavabelia pona pevajëtsinexa Diosojavabelia. Jesús nexata pecovëta matacabi baja.

³⁶ Itsa baja matacabi, Simónbana Jesús pëjaitaponalia.

37 Itsa baja bajarapamonae Jesús caxitajaraba, jumaitsi bajarapamonae:

—Daxita raja cajaitaruta pecataenexa, jai bajarapamonae Jesúsjavabelia.

38 Nexata Jesús jumaitsi:

—Ponatsi baja imoxoyo penaetomaraxijavabelia bajarajotalia tatsipaebinexa Dioso pitorobilivaisi. Bajaraxuanexa bovecua pitsaparenajë, jai Jesús.

39 Nexata daxita Galilea nacuajava Jesús jivi tsipaebapona Dioso pitorobilivaisi judíovi penacae-tuatabiabibonëjava. Jesús jivi dovathi vecuacapitsapaponanua.

*Pacuenia Jesús jamatejemayaexana bajayajebi
bitso peperabëtsabanaenë yabara pelivaisi*

(Mt 8.1-4; Lc 5.12-16)

40 Jesús imoxoyorenatsi bajayajebi bitso peperabëtsabanaenë. Nexata bajaraponë pematabacobëta nucajunua Jesús pitabarata. Bajaraponë pinijicuenia vajëta Jesúsjavabelia. Jumaitsi:

—Cacaëjëpa tanejamatejemayaexanaenexamë. Itsa jitsipame, nejamatejemayaexanare mapavitanevecuaje, jai peperabëtsabanaenë Jesúsjavabelia.

41 Nexata Jesús bajaraponë itaxutobejiobiatane. Pecobeta perabëjayalia. Jumaitsi:

—Jäjä, jitsipajë cajena. Jamatejemamë rabaja, jai Jesús peperabëtsabanaenëjavabelia.

42 Bajarapacuenia Jesús pejumaitsi-javata peperabëtsabanaenëmi baja perabëxanepananajereca. Jamatejema baja. Peperabëtsabanaejavami baja ajibi.

43 Nexata baja Jesús naviatsiaexana bajaraponë. Pinijicuenia Jesús muxujioba bajaraponë penavivatsivajënaeya. Jesús jumaitsi:

44 —Nejumetaema. Pëtsa itsajivijavabelia tsipaebame tacajamatejemayaexanaejava. Naitajëremelia jane sacerdotenëjavabelia templobota penacuenebinëjavabelia. Nexata sacerdotenë cataena pecavecuaajibijava baja niavitanejavami. Diosonexa rajuremelia ofrenda sacerdotenëjavabelia pecavecuaajibiaexanaexae niavitanejavami. Bajara tsipaji pacuenia bajayata vajasalinainëmi Moiséspijinë nacitoroba. Nexata jivi yapëtaena pepacuene baja pecavecuaajibijava niavitanejavami, jai picani Jesús bajajebi bitso peperabëtsabanaenëmijavabelia.

45 Nexata bajaraponë lia. Itsiata tsipaebanajetaruca daxitajivijavabelia Jesús pejamatejemayaexanaejavatsi. Bajaraxuata Jesús apo jitsipae naitajëtsiaya pejonejava itsatomarabelia ata, jivi ayaubitsaëtoxaneto pematatoyoronaeyanivatsi. Jesús saya ponapona tomaranë piajibijava. Itsiata cajena daxita nacuanëjavaverena jivi muxunapatabiabatsi Jesús.

2

*Pacuenia Jesús jamatejemayaexana petabusipacuenabinëtsiyabara pelivaisi
(Mt 9.1-8; Lc 5.17-26)*

1 Itsamatacabí icatsia Jesús naviarena Caper-naum tomaraberena. Nexata jivi yapëtane pabota Jesús patajopa.

² Nexata jivibitsaëtoxaneto nacaetuata Jesús pepatsibota. Bo baupa ata cajena bitso jivi vënëca. Nexata bajarapamonaejavabelia Jesús tsipaeba Dioso pitorobilivaisi.

³ Nexata cuatro ponëbeje parena, camayota peyavëtacaranajetarubenaevi petabusipacuenebinëtsi.

⁴ Nexata petabusipacuenabinëtsi acuenebi bajarapamonae pecapatsijava Jesús pitabaraya-belia. Tsipaji bo ënëtuatuajë bitso jivi yavënëca. Nexata petabusipacuenabinëtsi pecapatsivi, bomatatujavavetsica vojoexana Jesús pecanacujitsatsica. Nexata bajarapavojotuatsica camayota yacopatsica petabusipacuenebinëtsi.

⁵ Jesús jamatabëcuneyapëtane pacuenia bajarapamonae sivanajamatabëxainatsi. “Nacatojamatejemayaexanaenatsi cajena,” pesivajamatabëjaijavatsi Jesús jamatabëcuneyapëtane. Bajaraxuata petabusipacuenebinëtsijavabelia Jesús jumaitsi mapacueniaje:

—Tajabananë, pibisiacuene rabaja nexanaeneconimi cavecuaajibiaexanatsi, jai Jesús.

⁶ Bajarajota judíovi pecujarubiviyajuvënëvi naena. Bajarapamonae itsa jumetaeyena bajarapacuenia Jesús pejumaitsijava, nexata jamatabëcuenenavëxaniabiaya bëpënëa jamatabëjumai tsenae mapacueniaje:

⁷ —Maponëje Jesús Dioso apo pejitsipaecuenia cuaicuajai. Itsanë ata cajena apo caëjëpaetsi it-sajivi pibisiacuene pexanaeneconi pevecuaajibiaexanaenexa. Caenë Dioso caëjëpatsi pevecuaa-

jibiaexanaenexa bajarapacuene, jamatabëjai tse-nae bajarapamona.

⁸ Jesùs jamatabëcuneyapëtane bajarapamona jamatabëcuenenavëxaniabiaya bajarapacuenia pesivanajamatabëxainaevavatsi. Nexata Jesùs jumaitsi bajarapamonaevavabelia:

—Pëtsa bajarapacuenia panesivana-jamatabëxainame. Tsipaji cajena xanë necaëjëpa jivi pibisiacuene pexanaeneconimi tavecuaajibiaexanaenexa.

⁹ Paxamë apo pacacaëjëpae ata itsajivi pibisiacuene pexanaeneconi panevecuaajibiaexanaenexa, pacacaëjëpa picani saya jema pane-jumaitsinexa petabusipacuenebinëtsijavabelia mapacueniaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapëtae tsipae saya jema panejumaitsijava. Itsiata baitsi jane itsa apo pacacaëjëpae panejamate-jemayaexanaenexa petabusipacuenebinëtsi, acuenebi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaëjëpaecuene panejamatejemayaexanaenexa, jai nexata Jesùs judíovi pecujarubivijavabelia.

¹⁰ Icatsia Jesùs jumaitsi bajarapamonaevavabelia:

—Xanë, Daxitajivi Pematapijinënë, mapanacuata necaëjëpa tavecuaajibiaexanaenexa itsajivi pibisiacuene pexanaeneconimi ata

pacuenia baja exanajë maponëjavabeliae. Nexata patanecueneyapëtaenexamë tanecaëjëpaecuene tavecuaajibiaexanaenexa itsajivi pibisiacuene pexanaeconimi ata, pataema pacuenia jamatejemayaexanaejitsianë maponëjë, jai Jesús judíovi pecujarubivijavabelia.

Nexata icatsia Jesús jumaitsi petabusipacuenebinëtsijavabelia:

11 —Xamë cajumaitsitsi. Nonotapunare. Nijacamayo pire. Nijaboyabelia baja ponare, jai Jesús.

12 Nexata bajarapacuenia Jesús pejumaitsijavata petabusipacuenebinëmetsi nonotapuna. Pebocaecamayo baja pita. Pitsapalia baja daxitajivi pitabarata. Nexata daxitajivi itsa tane bajarapacuene, jamatabëcuenenabenajaquena. Bajarapamonae jumai tsenae mapacueniaje:

—Dioso cajena bitso ayajamatabëcuenenë. Caeto ata abaxë mapitsicuene pexanaejava apo taetsije, jai tsenae bajarapamonae.

*Pacuenia Jesús pijajivitonënexa junata
Levívenënë yabarapelivaisi
(Mt 9.9-13; Lc 5.27-32)*

13 Jesús pona pucaxaneto itapajavabelia. Nexata jivi ayaubitsaëtoxaneto pënapatatsi bajarabelia. Nexata Dioso pejumelvaisi Jesús tsipaeba bajarapamonaejavabelia.

14 Bajaraxuacujinae penajetarucaejavata Jesús taeyeta Levívenënë, Alfeo pexënato. Leví eca pabota gobierno pejamatabëcuene jivijavabelia matamoyanijobabiaba impuestomatamo. Nexata Jesús jumaitsi Levíjavabelia:

—Leví, naxanitsia. Nepënaponare, jai Jesús.

Jejai Leví. Nexata nonotapuna. Leví baja napona Jesús pepëta.

15 Nexata Leví junata Jesús pebarënabaninexa pijabota. Nexata Leví pijabota Jesús pexaejava naxane. Leví pijabota ayaubitsaëto naena gobierno pejamatabëcuene jivijavabelia impuestomatamo pemamatoyanijobabiabivi. Itsamonae ata nanabane pijamatabëcuenebejevi. Nexata Jesús pijajivi nabarëeca bajarapamonaejavata.

16 Nexata fariseovi, judíovi pecujarubivinua, Jesús taeyetatsi daxita bajarapamonaejavata pijajivi penabarënabanecaejava. Nexata bajarapamonae jamatabëcuenenavëxaniabiaya jumaitsi Jesús pijajivijavabelia:

—Papecacujarubinë Jesús naneconita Diosojavelia. Tsipaji gobierno pejamatabëcueneta impuestomatamo pemamatoyanijobabiabivijavata, pijamatabëcuenebejevijavatanua, naxaeyeca pexaejava, jai bajarapamonae Jesús pijajivijavabelia.

17 Itsa Jesús jumetane mapajumeje, nexata jumaitsi bajarapamonaejavabelia:

—Pevaëbinë raja apo vaëbi pejamatejemavi. Pevaëbinë raja piavitanevi vaëba. Bajara pijinia xanë ata itsinë. Apo sivapatajopaenë tajunatsinexa pamonae baja aneconijibi tsavanapae. Sivapatajopajë raja tajunatsinexa pijaneconi pexainaevi. Bajarapamonae junataponajë pecopabinexa pibisiacuene pexanaejava penajamatabëcuenepënëyorotsinexa Diosojavabelia, jai Jesús bajarapamonaejavabelia.

*Pacuenia Jesús yanijobatsi pamatacabibeje
jivi vajëtapona Diosojavabelia pexaejava apo
pexaeyabiabixae yabara pelivaisi
(Mt 9.14-17; Lc 5.33-39)*

18 Itsamatacababi Juan pijajivi, fariseovi pijajivinua, pexaejava apo xaevanapae pamatacabibeje Diosojavabelia vajëcapona. Nexata itsamonaes Jesúsjavaberena pata. Yanijobatsi pexaejava piatsobicuene yabara. Jumaitsi mapacueniae:

—Juan pijajivi, fariseovi pijajivinua, pexaejava apo xaeyabiabi pamatacabibeje Diosojavabelia vajëtapona. ¿Detsa xuajitsia itsiata xamë nijajivi pexaejava xaeyabiaba pamatacabibeje Diosojavabelia vajëtapona? jai Jesús peyanijobivitsi.

19 Nexata Jesús jumaitsi bajarapamonaejavabelia:

—Pamonae junatatsi penacasabifiestajavabelia penanabaninexa, apo atsobi pexaejava itsa abaxë yajavaecatsi pejananacasabinë. Itsa abaxë pejananacasabinë yajavaponaponatsi, acuenebi pexaejava piatsobinexa bajarapamonae.

20 Itsiata baitsi jane itsa pejananacasabinë tsimaxëpatsipatsi pevecuacaponaenexatsi itsajavabelia, nexata bajarapamonae pexaejava apo xae tsipae. Tsipaji bitso najamatabëxainaejitsipa pevecuacaponaexaetsi. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëtapona. Itsiata pamatacabibi xanë necaponaena bajarapamonaevecua, nexata jane baja bajarapamatocabi pexaejava apo xae tsane bitso tanesivanajamatabëxainaexae, jai Jesús peyanijobivitsijavabelia.

21 Nexata bajarapamonaे perujujamatabëcuene baja pecopabinexa, Jesùs livaisi tsipaeba comparaciòn cuenia bajarapamonaе pejume covënëtsinexa ëpejanalivaisi, Jesùs petsipaebilivaisi. Bajarapamonaе anijajamatabëcuenebeje pexainaeyaniva perujujamatabëcuene baja pecopabinexa, Jesùs livaisi tsipaeba comparaciòn cuenia. Perujujamatabëcuene yabara Jesùs jumaitsi bajarapamonaejavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa.

22 Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae, mene naxuabijitsipa, vinoranëmi. Bajaraxuata bepaca pejanavinoranë pejanabocodoruanëjavabelia, jai Jesùs peyanijobivitsijavabelia bajarapamonaе pejumecovënëtsinexa ëpejanalivaisi, Jesùs petsipaebilivaisi, perujujamatabëcuene baja penacopabinexa.

Pacuenia Jesùs pijajivi namutua siricanaje tarubena trigoxu penacueraevetsimatacabita

*yabara pelivaisi
(Mt 12.1-8; Lc 6.1-5)*

²³ Judíovi penacueraevetsimatacabita Jesús, pijajivi yajava, najetaruca namutua trigo pabinanëjava. Nexata Jesús pijajivi piajanixae, trigoxu siricanajetarubena. Xuxaeyabuatapona.

²⁴ Nexata fariseovi jumaitsi Jesúsjavabelia:
—¡Taema mapacueneje! Dioso Moiséspijinéta penajumecopatsilivaisita vajanacaitavetsicuene, nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, nijajivi apo bexanae mapacueneje, jai fariseovi Jesúsjavabelia.

²⁵ Nexata Jesús jumaitsi fariseovijavabelia:
—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tsipaji bitso piajani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainëmi Davidpijinë, pebaréponaponaevi yajava, exana pamatacabí bitso piajani?

²⁶ Davidpijinë joneya Dioso pijatemploboyalia pamatacabí Abiatarpijnë daxita sacerdotevi penamatacitorobinë tsaponaponae. Nexata Dioso pijatemploboënëta, mesajumata, bobena Diosonexa ofrendacuenia petojebipanbëanë. Bajarapapanbëanë itsajivi ata apo tocopatsitsi pexaenexa penaneconitsiyaniva Diosojavabelia. Èsacerdotevi picani tocopatatsi pexaenexa. Davidpijinë apo sacerdotenë ata, xae ata bajarapapanbëanë pijajivi barë, itsiata apo vënananeconitsi Diosojavabelia, jai Jesús fariseovijavabelia.

27 Icatsia Jesús jumaitsi fariseovijavabelia:

—Dioso raja tocopata caematacabí jivi penacueraevetsinexa. Tsipaji Dioso yapëtane pacuenia jivi namatavenona penacueraevetsinexa. Dioso apo exanae jivi saya jema peyaiyataenexa penacueraevetsimatacabianë.

28 Nexata xanë, Daxitajivi Pematapijinënë, netoxanepana cajena tatsipaebinexa pacuene xanepana jivi pexanaenexa penacueraevetsimatcabita ata, jai Jesús fariseovijavabelia.

3

*Pacuenia Jesús jamatejemayaexana pebi pecobetsaquenaenë yabara pelivaisi
(Mt 12.9-14; Lc 6.6-11)*

1 Penacueraevetsimatacabita Jesús joneya judíovi penacaetuatabiboyalia. Nexata bajarajota pebi naeca pecobetsaquenaenë.

2 Nexata Jesús naitaxutocaevetatsi fariseovi petaenexatsi pecobetsaquenaenë pejamatejemaayaexanaejava penacueraevetsimatacabita. Nexata Jesús pecobetsaquenaenë itsa jamatejemayaexana penacueraevetsimatacabita, “Jesús raja naneconita Diosojavabelia. Tsipaji penacueraevetsimatacabita nacueneba,” pejainexa bajarapamonae.

3 Nexata Jesús jumaitsi pecobetsaqueñaenëjavabelia:

—Nonotapunare. Nucare mapamonaе pitabarataje, jai.

4 Nexata Jesús jumaitsi fariseovijavabelia:

—Penacueraevetsimatacabita ata xanepana vajaexanaenexa pexaniacuene. Xanepana vajajamatejemayaexanaenexa piavitanevi, jai Jesús fariseovijavelia.

Nexata fariseovi Jesús apo jumepitsitsi.

⁵ Nexata Jesús anaeya naécota bajarapamona. Bajaraxuacujinae Jesús bejamatabëjiobireca. Tsipaji yapétane piajamatabëcuenetajajava fariseovi. Nexata Jesús jumaitsi pecobetsaqueñaenëjavabelia:

—Namaxërovire, jai.

Nexata pecobetsaqueñaenë namaxërovita. Bajarajota cobexanepanajereca baja. Pecobetsaqueñaejavami ajibi.

⁶ Nexata fariseovi itsa tane Jesús pecobexanepanaeyaexanaejava pecobetsaqueñaenë, fariseovi anaepana. Nexata bajarapabovetua pitsapa. Pona penabarëcuaicuajainexa nacuaevetsinë Herodes pijajivijavelia. Bajarapamonae najumejaita Jesús pebeyaxuabinexatsi.

Pacuenia jivi nacaetuata Galilea pucaxaneto itapata yabara pelivaisi

⁷ Jesús, pijajivi yajava, pona Galilea pucaxaneto itapayabelia. Nexata Jesús pënaponaliatsi ayaibitsaëtoxaneto Galilea nacuapijivi.

⁸ Nexata Jesús pënaponaliatsi Judea nacuapijivinua, Jerusalén tomarapijivinua, Idumea nacuapijivinua, Jordánmene itsapanaverenapijivinua, imoxoyo Tiro tomaravecua pejinavanapaevinua, imoxoyo Sidón tomaravecua pejinavanapaevinua. Daxita bajarapamona Jesús pënaponaliatsi tsipaji

Jesús vënëlivilaisitanetsi Dioso pesaëta pinijicuene pexanaponaejava.

⁹ Nexata Jesús pijajivi itoroba jera petoxaniavaetarutsinexatsi menetareca. Itsa bajarapajivibitsaëtoxaneto Jesús bitso matacënënaponatsi, nexata bajarapamo ënëabereca Jesús perunaenexareca.

¹⁰ Jesús baja ayaubitsaëto piavitanevi jamate-jemayaexana. Bajaraxuata itsamonaes, piavitanevi, Jesúsjavabelia natorotaponabiaba pejayatsinexatsi.

¹¹ Dovathi peyajavajinavanapaevi Jesús itsa taeyabiabatsi, bajarapamonae irata othopabiaba Jesús pitabarata. Bajarapamonae aëjai tsabiabi.

—Xamë tsaena Dioso pexënatomë, jai tsabiabi dovathi peyajavajinavanapaevi.

¹² Nexata Jesús jumeitaveta bajarapamonae. Jumaitsi:

—“Dioso raja pexënato,” pajamë pëtsa xanë yabara itsajivijavabelia, jai Jesús bajarapamonaejavabelia.

Pacuenia Jesús pijajivi ayaubitsaëtoxanetoyajuvënëvi itapeta saya doce ponëbeje apóstolevinexa yabara pelivaisi

(Mt 10.1-4; Lc 6.12-16)

¹³ Jesús pijajivi ayaubitsaëtoxanetoyajuvënëvi, doce saya ponëbeje, itapeta apóstolevinexa. Jesús pitapetsivajënae apóstolevinexa, junaya petsutojumabetsia. Bajaravetsica Jesús junatanuca ponëbeje jamatabëitapeta apóstolevinexa. Nexata pamonae Jesús itapeta apóstolevinexa, junaya petsutojumabetsia, Jesúsjavabetsia.

14 Nexata Jesús caetuata caebitsaëtoyo, doce ponëbeje pijajivi, pepënajinavanapaevinexatsi. Jesús itorobijitsianua bajarapamonae daxitanacuanëjava jivi petsipaebanajetarubenaenexa Dioso pitorobilivaisi.

15 Jesús pijajivi jamatabëcueneçaëjëpaeyaexana Dioso pesaëta pejamatejemayaexanaponaenexa piavitanevi. Jamatabëcueneçaëjëpaeyaexananua Dioso pesaëta dovathi jivi pevecuacapitsapapon-aenexâ.

16 Jesús pijaapóstolevi, doce ponëbeje, mapevënénanëje. Copiaya ponë pevënë Simón. Bajaraponë Jesús vënéruba itsavënë, Pedro.

17 Itsanë Santiago. Itsanë Juan. Santiagobeje Juanbeje nacaebananëbeje, Zebedeo pexënatobeje. Bajaraponëbeje Jesús vënéruba Boanerges. "Boanerges," itsa jai, bajarapamonae pijajumeta mapajumetaje pejumaitsijume: "Yamaxë pexënatobeje," pejajume.

18 Itsanë pevënë Andrés. Itsanë Felipe. Itsanë Bartolomé. Itsanë Mateo. Itsanë Tomás. Itsanë Santiago, Alfeo pexënato. Itsanë Tadeo. Itsanë Simón, celotenë.

19 Itsanë Judas Iscariote. Bajaraponë bexëajavabelia Jesús canajetsijitsiatsi pijavajabit-saë pecobeyabelia pebeyaxuabinexatsi.

Pacuenia itsamonaे Jesús yabara jamatabëcuenenavëxaniabiaya jumaitsi: "Beelzebú raja pesaëta, Jesús dovathi jivivecua capitsappona," jai yabara pelivaisi

(Mt 12.22-32; Lc 11.14-23; 12.10)

20 Jesús boyá joneya pijajivi yajava. Icatsia jivibitsaëtoxaneto nacaetuata. Nexata acuenebi Jesús pijajivi pebarënabanijava.

21 Itsamonaes Jesús yabara jumaitsi: “Jesús raja matajembatsi,” jai. Nexata bajarapacuenia itsamonaes Jesús yabara pejumaitsijava, Jesús pijamonaes vënélivaisitanetsi. Nexata Jesús pijamonaes ponarena Jesúsjavaberena pebarëponaenexatsilia picani.

22 Judíovi pecujarubivi, Jerusalén tomaravera-
na peponaevi, jamatabëcuenenavëxaniabiaya Jesús
yabara jumaitsi:

—Mara ponë Jesúsjje, Beelzebú yajavaponapona.
Beelzebú raja daxita dovathivi pevetsiné. Ba-
jaraxuata Jesús Beelzebú pesaëta dovathi jivive-
cua capitsappona, jai judíovi pecujarubivi ja-
matabëcuenenavëxaniabiaya Jesús yabara.

23 Nexata Jesús junata bajarapamonae
jamatabëcuenenavëxaniabiaya pejumaitsijava
pecanaëjëtsinexa. Nexata bajarapamonaejav-
abelia Jesús jumaitsi mapacueniaje:

—Beelzebú raja dovathivi jivivecua apo capi-
tsapponae tsipae. Tsipaji Beelzebú dovathi jivive-
cua itsa capitsapponaejitsipa, nexata Beelzebú
bepijavajabitsaë taejitsipa pijajivi.

24 Pacanaëjëre mapacueneje. Nacaenacuapijivi
ata itsa navecuanatsanaejitsipa penasivanava-
jabitsaëtsinexa, namataenetsia naverebiabijitsipa
nacaenacuapijivi ata.

25 Bajara pijinia nacaemonae ata itsipae. Itsa
navecuanatsanaejitsipa penasivanavabajit-
saëtsinexa, namataenetsia naverebiabijitsipa
nacaemonae ata.

26 Bajara pijinia itsipae dovathi ata. Dovathi jivivecua itsa capitsapaponaejitsipa pijajivi dovathivi, nexata bepijavajabitsaënë taejitsipatsi pijajivi. Nexata apo sivaajamatabëcuenesaë tsipae pexanaponaejavanexa. Nacopiaru-caeyaexanaejitsipa dovathi, jai Jesús judíovi pecujarubivijavabelia.

27 Bajarapamonae pecanaëjëtsinexa Jesús bitso piasaënëcuene dovathi matatoxenetsia, Jesús icat-sia jumaitsi bajarapamonaejavabelia mapacueni-aje:

—Itsajivi ata apo caëjëpaetsi pejonenexa bitso piasaënë pijaboyalia peyacajérëtsinexa xua xaina pijabota. Itsiata itsa patsipa bajaraponë matatox-enetsia bitso piasaënë, nexata cobecëtabuatsipatsi. Taxucëtabuatsipatsi yajava. Matapania bajarapacuenia yacajérëtsipatsi daxita xua xaina pijabota. Bajara pijinia pacuenia xanë ata bitso tasaënë dovathi matatoxenetsia. Bajaraxuata necaëjëpa jivivecua tacapitsapaenexa dovathivi.

28 Xaniajanë pacuenia pacatsipaebatsi. Dioso cajena caëjëpatsi daxitajivi pibisiacuene pexanaeneconi pevecuaajibiaexanaenexa. Pibisiacuenia jivi Dioso baracuaicuajai ata, bajarapaneconi ata Dioso caëjëpatsi pevecuaajibiaexanaenexa.

29 Itsiata baitsi jane pajivi pibisiacuenia baracuaicuajai Espíritu Santo, bajarapajivi Dioso apo vecuaajibiaexanae tsane bajarapaneconi. Bajarapajivi naneconitsiana daxita matacabijav-abelianexa, jai Jesús bajarapamonaejavabelia.

30 Bajarapacuenia Jesús jumaitsi tsipaji Jesús Espíritu Santo yajavaponae atatsi, judíovi

pecujarubivi jumaitsi Jesús yabara: “Jesús raja Beelzebú yajavaponapona,” jai. Nexata bajaraxuata bajarapamonae nanconita Espíritu Santojavelia.

*Pacuenia Jesús pejuyapijivi, pena yajava,
nubena bojumavelia yabara pelivaisi
(Mt 12.46-50; Lc 8.19-21)*

31 Jesús pejuyapijivi, pena yajava, pata Jesúsjavaberena. Itsiata bajarapamonae boyalia apo jonelia Jesús penucaeboyalia. Nexata bajarapamonae junatsiaexana Jesús pejumetaeyenaevitsijavabelia.

32 Nexata pamonae Jesús petsipaebilivaisi matatoyorotsia jumetaeyenatsi, Jesúsjavabelia jumaitsi:

—Patajatuxanenë, ena raja, nejuyapijivi yajava, nuca patapënëverena. Cajaita raja xamë, jai bajarapamonae Jesúsjavabelia.

33 Nexata Jesús jumaitsi bajarapamonaejavabelia:

—¿Detsa pitsijamatatabëcuenevi taena, tajuyapijivinua? jai Jesús.

34 Bajaraxuacujinae Jesús naëcota pematatoyorotsiaenaevitsi. Jumaitsi bajarapamonaejavabelia:

—Mara jota pamonae xanëjavata penaevije, bajarapamonae jane taenajivi, tajuyapijivinua.

35 Tsipaji raja pamonae exana pacuenia Dioso itorobatsi, bajarapamonae jane baja tajuyapijivi, taenajivinua, jai Jesús bajarapamonaejavabelia.

4

*Pacuenia Jesúsi jivi livaisi tsipaeba peubinë pelivaisicuenia yabara pelivaisi
(Mt 13.1-9; Lc 8.4-8)*

¹ Icatsia Jesúsi taxuxuaba livaisi petsipaebi-java Galilea pucaxaneto itapajavata. Nexata jivi ayaibitsaëtoxaneto nacaetuata itsajota Jesúsi livaisi tsipaebanuca. Nexata Jesúsi runareca jera ënëabereca. Ecareca jera ënëtareca. Daxita jivibitsaëtoxaneto tajetabovelia nubena.

² Nexata Jesúsi daxitacuene livaisianë tsipaeba jivijavelia. Jesúsi jumai tsaponae bajarapamon-aejavabelia mapacueniae:

³ —Panenamuxunaevere mapalivaisije. Peubinë pona pabiabelia peubinexa. Nexata itsapata pabita, peubixu pexucayajabajarabicuenia ubanajetaruca.

⁴ Nexata pexucayajabajarabijavata itsaxu othopa pabi tuatuajëjava, penajetarucaenamutojumata. Nexata bajarajota pata baratsui. Xane bajarapaxumi juvinejeva.

⁵ Itsaxu pijinia othopa ibopananëjumata, itsajota bitso ira apo aitayaë.

⁶ Nexata icotia bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepepiareca.

⁷ Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë matacënénatsi peubijavami. Nexata peubijava apo xainae pecuai.

8 Itsaxu pijinia othopa pexaniairata. Nexata juva. Xaniavaetsia vitsabaponanua. Xainanua pecuai. Itsabotonë capitsapa treinta paxutobeje tsaponae. Itsabotonë capitsapa sesenta paxutobeje tsaponae. Itsabotonë capitsapa cien paxutobeje tsaponae, jai Jesús bajarapalivaisi petsipae-bivijavabelia.

9 Nexata icatsia Jesús jumaitsi jivibitsaëtoxanetojavabelia:

—Pajivi jamatabënejumeyapëtane patacatsipae-bilivaisi, nemamuxunaevetsi xaniavaetsia, jai Jesús.

*Pacuene yabara Jesús jivijavabelia livaisi tispaeba ècomparacióncuenia yabara pelivaisi
(Mt 13.10-17; Lc 8.9-10)*

10 Jesús livaisi petsipaebicujinae, jivibitsaëtoxaneto baja Jesús vecuanaviabatsi. Nexata Jesús pijae pato barënacopata doce ponëbeje pijajivi, itsamonaе itsiata yajava. Nexata bajarapamonae Jesús yanijobatsi. Bajarapamonae jumaitsi Jesúsjavabelia:

—Palivaisi jivijavabelia tsipaebame peubinë pelivaisicuenia, pajamatatabëcuene xaina, patayapëtaenexa panetsipaebare, jai bajarapamonae Jesúsjavabelia.

11 Nexata Jesús jumaitsi bajarapamonaejavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevetsijava. Bajarapacuene abaxë daxitajivi apo yapëtae. Baitsi ra saicaya

pamonae apo tajajivi, tsipaebajë livaisianë écomparacióncuenia.

12 Bajaraxuata nexata bajarapamonae tae ata Dioso pesaëta pinijicuene taexanaejava, itsiata apo yapëtae pajamatabëcuene yabara exanajë pinijicuene taexanaejava. Nenamuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi. Bajarapacuenia apo jumeyapëtae penajamatatabëcuene copatsiyaniwa Diosojavabelia pibisiacuene pexanaeneconimi Dioso pevecuaajibbiaexanaeyanivatsi, jai Jesús.

*Pacuenia Jesús yapëtaeyaexana pijajivi, itsamonaeyajava, pajamatabëcuene xaina palivaisi tsipaeba peubinë pelivaisicuenia yabara pelivaisi
(Mt 13.18-23; Lc 8.11-15)*

13 Jesús icatsia jumaitsi pijajivijavabelia:

—Itsa apo pajumeyapëtaemë pajamatabëcuene xaina palivaisi pacatsipaebatsi peubinë pelivaisicuenia, ¿detsa nexata pacuenia pajumeyapëtaename daxita palivaisianë pacatsipaebijitsatsi comparacióncuenia? jai Jesús pijajivijavabelia.

14 Nexata icatsia Jesús jumaitsi pijajivijavabelia pijajivi peyapëtaenexa pajamatabëcuene xaina palivaisi tsipaeba peubinë pelivaisicuenia:

—Pajivi raja peubixu uba, bajarapajivi bepepae-binë Dioso pitorobilivaisi.

15 Pacuenia itsi pabita peubixu, paxu othopa pabi tuatuajéjava penajetarucaenamutojumata, bajara tsijamatabëcueneitsitsi itsamonaes Dioso pitorobilivaisi. Bajarapamonae itsa

tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, dovathi vecuapitatsi bajarapalivaisimi, petsijamatabëubilivaisimitsi.

¹⁶ Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonaë Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barëyaya jumecovënëta.

¹⁷ Itsata baitsi jane pacuenia irabereca apo atabunepepiareca paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tspaji pepacuene pejamatabëéthëtovetsina apo jumecovënëtsi bajarapalivaisi. Nexata apo ajamatabëcuenesäë tsavanapae bajayajebi pejumecovënëtsinexa bajarapalivaisi. Nexata itsa tocopiapatatsi daxita petoayapëbejecuenetsi, itsa yalivaisibatsinua Dioso pitorobilivaisi yabara, nexata pejumecovënëtsijavami bajarapalivaisi bepijia copaba. Pevajënaeyabelia apo jumecovënëtavanapae.

¹⁸ Pacuenia pijinia paxu othopa xanëebacobomijavata, itsa juva, bitso matacënénatsi xanëebotonë, bajara tsijamatabëcueneitsitsi itsamonaë Dioso pitorobilivaisi. Jumetane picani bajarapamonae Dioso pitorobilivaisi.

¹⁹ Itsata baitsi jane bitso jamatabëcueneenatsi

mapanacuapijicuene yabaraje. Tsipaji naja-matabëxaina ayaijava palata pexainaenexa. Nexata pijacuata najamatabëcuñeyamaxëitojoroba. Daxitacuene mapanacuapijicuene bitso jitsipa pexainaenexa. Bajaraxuata Dioso pitorobilivaisi apo tovitsabitsi pejamatabëéthëtota. Nexata pacuenia itsi pabita piacuajibibotonë, bajara itsi bajarapamonae. Tsipaji Dioso xaniavaetsia apo tojinavanapae.

²⁰ Pacuenia pijinia itsi paxu othopa pexani-airata, bajara tsijamatabëcuñeitsitsi itsamonaes Dioso pitorobilivaisi. Bajarapamonae itsa tsipae-batsi Dioso pitorobilivaisi, tsijamatabëjunuatsi. Nexata tsijamatabëcuñevitsabaponatsi Dioso pitorobilivaisi. Nexata pacuenia peubijava capitsapa itsabotonë treinta paxutobeje tsaponae, itsabotonë sesenta paxutobeje tsaponae, itsabotonë cien paxutobeje tsaponae, bajara tsijamatabëcuñeitsitsi bajarapamonae Dioso pitorobilivaisi, jai Jesús pijajivijavabelia.

Pacuenia Jesús pijajivi livaisi tsipaeba lámparabë pelvaisicuenia yabara pelvaisi

(Lc 8.16-18)

²¹ Jesús icatsia jumaitsi doce ponëbeje pijajivi-javabelia, itsamonaejavabelia ata:

—Itsajivi ata lámparabë pitanojotsicujinae apo etsi cajoniënëalia. Apo etsi cama bëxëpanalia ata. Jume baja cajena. Biji rajane athëbëyo etsia dax-itaboënë pitayotecaenexa.

²² Bajara pijinia itsi palivaisianë tsipae-baponajë comparacióncuenia daxitajivi picani peyapëtaenexa. Najumemata yatsia apo

tsipaebaponaenë. Itsamonaе nejumetae ata, aeconoxae abaxë apo nejumeyapëtae pajamatabëcuene xaina tatsipaebilivaisianë. Itsiata itsamatacabi, bexëajavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë.

23 Pajivi jamatabënejumeyapëtane patacatsipaebilivaisi, xaniavaetsia nemamuxunaevetsi, jai Jesús pijajivijavabelia.

24 Icatsia Jesús jumaitsi bajarapamonaejavabelia:

—Panejumecanaëjëre patacatsipaebilivaisi. Itsamonaе ata itsa pacatsipaebiana, bajarapamonae ata pajumecanaëjëtsianame papecatsipaebilivaisi. Palivaisivajëto panejumecanaëjëtsianame, nexata bajarapalivaisivajëto pajumeyapëtaename. Itsiata icatsia pematatsënëa bajarapitsilivaisivajëto Dioso pacayapëtaeyaexanaena.

25 Pajivi xaniavaetsia nejumeyapëtane patacatsipaebilivaisi, bajarapajivi icatsia itsalivaisi pematatsënëa Dioso jumeyapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa, bajarapajivi palivaisiyovajëto picani jumeyapëtane, nacofënëtsiana, jai Jesús.

Pacuenia peubixu pejuvicujinae, Dioso pesaëta vitsaba yabara pelivaisi

26 Jesús icatsia jivi comparacióncuenia livaisi tsi-paeba Dioso pijajivi pevetsicuene yabara. Jumaitsi mapacueniaje:

—Pacuenia peubixu pejuvicujinae, Dioso pesäta vitsaba, bajara pijinia pacuenia Dioso pijajivi ata Dioso pesäta jinavanapa. Peubinë pabita peubixu xucayabajarabanajetaruca.

²⁷ Peubinë peubicujinae vemaxëmajitabiaba meravi canacujitsia. Naëcotabiaba matacabita. Bajarapacuenia panepapona matacabianë. Nexata pijinia peubixu pabita juva. Vitsabapona. Itsata baitsi jane peubinë apo yapëtae pacuenia peubixu pijacuata juva.

²⁸ Ira raja pejamatabëcueneta naxaniaba peubijava. Copiata pepaboto vitsabaya. Xuacujinae namatonota. Xuacujinae cuainavereta.

²⁹ Itsa baja yaniona peubijava, penotsivi pona penotsinexa. Tsipaji baja penotsimatacabinexa tocopiapatatsi, jai Jesús jivijavabelia.

*Pacuenia mostazaxutoyo pejuvicujinae,
mostazanae bepilia vitsaba yabara pelivaisi
(Mt 13.31-32; Lc 13.18-19)*

³⁰⁻³¹ Jesús icatsia jumaitsi doce ponëbeje pijajivi-javabelia, itsamonaejavabelia ata:

—¿De meta xua pelivaisi jëpa Dioso pijajivi bepilia ayaibitsaëtoxaneto penaexanaejavanexa? Jivi meta peyapëtaenexa ayaibitsaëtoxaneto bepilia Dioso pijajivi penaexanaejavanexa, mostazaxutoyo meta pelivaisicuenia tsipaebianajë. Jumaitsinë meta tsane: “Pacuenia mostazaxutoyo pejuvicujinae, bepilia vitsaba mostazanae, bajara pijinia itsane Dioso pijajivi ata. Bepilia Dioso pijajivi ayaibitsaëtoxaneto naexanaena. Mostazaxuraja bitso tsiquirixutoxi daxita peubixuveca.

³² Itsiata baitsi jane mostazanae itsa juva, bepijia vitsaba. Caevaita pinijinae naexana itsapeubinaenë matatoxenetsia. Nexata baratsui ata pematapenanë exana mostazanaemaxérananëjavata. Bajara pijinia itsane jivi ata. Bepijia ayaubitsaëto Dioso pijajivi naexanaena," janë meta tsane mapacueniaje, jai Jesús pijajivijavabelia, itsamonaejavabelia ata.

*Pacuenia Jesús jivi livaisi tsipaebabiaba
ëcomparacióncuenia yabara pelivaisi
(Mt 13.34-35)*

³³ Dioso pitorobilivaisi Jesús tsipaebabiaba jivijavabelia. Dioso pitorobilivaisi Jesús jivi tsipaebabiaba ëcomparacióncuenia. Pacuenia baja jivi caëjépatsi pejumeyapëtaenexa, bajarapacuenia Jesús tsipaebabiaba.

³⁴ Jesús ëcomparacióncuenia livaisi tsipaebabiaba bajarapamonaejavabelia. Itsiata saicaya Jesús ëpijajivijavabelia xaniavaetsia yapëtaeyaexanabiaba pajamatabëcuene xaina daxita bajarapalivaisianë.

*Pacuenia Jesús itaveta joviboxaneto, malataca
yajava, piayajavami yabara pelivaisi
(Mt 8.23-27; Lc 8.22-25)*

³⁵ Dioso pitorobilivaisi Jesús tsipaeba jivijavabelia. Bajarapamatocabi Jesús petsipaebicujinae itsa baja caniviyotsia, Jesús jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

³⁶ Nexata baja Jesús, pijajivi yajava, vecuapona jivi. Pajerata Jesús ecareca, pijajivi yajava pona. Itsiata itsamonaë pënaponatsi itsajeranëta.

37 Nexata pinijioviboxaneto jemata najetaruca. Nexata malataca jera ënëaberena mera epabajarabapona. Nexata baja jera ënëaberena mera vënëcapona.

38 Jesús itsiata majitanuca jamatejema jeratabufejavavetsina. Namatabëxëyaëtanuca penamatabëxëyaëtabiabijavata. Nexata Jesús pijajivi yaitavabatsi. Jesús pijajivi jumaitsi:

—¡Patajatuxanenë, vaxaitsimi rabaja yaothopae-natsi! ¿Apo jamatabëcuenebëjamë tsaja? jai Jesús pijajivi.

39 Nexata Jesús pemajitanucaenëmi naëcotapuna. Pinijijumeta itavetaxuaba jovibo. Jesús jumaitsi pucajavabelia, jovibojavabelia ata:

—¡Vainae ecare baja! jai.

Bajarapacuenia Jesús pejumaitsijavata jovibo baja ajibi tsaxuabi. Daxitapuca baja nexata vainae ecaxuaba.

40 Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevertsijava? jai Jesús.

41 Nexata Jesús pijajivi najunaviaca bajara-pacuene petaexae. Épamonae najumaitsi:

—¿De meta tsipaji maponëje? ¡Itaveta jovibo, malataca ata! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

5

Pacuenia pebi, dovathivi peyajavaponapon-aenë, Jesús vecuacapitsapa Gerasa nacuata yabara

*pelivaisi
(Mt 8.28-34; Lc 8.26-39)*

1 Jesús pijajivi barëpata pucaxaneto itsapanabelia, Gerasa nacuayabelia.

2 Nexata Jesús jerajavavetsina nonotajuna. Pebi dovathivi peyajavaponaponaenë, cujtabarenatsi jivimëthëanëjavaverena.

3 Bajaraponë ponaponabiaba jivimëthëanëjavata. Itsajivi ata apo caëjëpaetsi pecëtsinexa bajaraponë cadenamaëtota ata.

4 Cadenamaëtonëta picani taxucëtabiabatsi anijatonë. Cobecëtabiabatsi picani yajava. Itsata cajena pecobecëtsicadenamaëtotsi ucutajarababiaba pesaëta. Bajaraxuacujinae petaxucëtsicadenamaëtotsi pecobeta tsaquibiaxuababiaba. Nexata cadenamaëtomì tsiquirijavaxi exanapenetabiaba. Itsajivi ata cajena apo caëjëpaetsi pecëtsinexa bajaraponë. Tsipaji bitsosasaë.

5 Bajaraponë petsutonëjava, jivi petëpaevi pemëthëcaejava, matacabijebi, meravijebi yajava, ponaponabiaba. Vavajai tsabiabaponapona. Ibotonëjavabelia natsaquibajarababiabaponapona.

6 Bajaraponë itsa taetaba Jesús penajetarucaejava, nexata tajëverena cujinaeponarena Jesúsjavaberena. Jesús pitabarata pematabacabëta nucajunua.

7 Bajaraponë aëjai pinijijumeta Jesús pitabarata.

—Jesús, pepo Dioso, athëbëtatsia peecaenë, pexénatomë. ¿Detsa xua jaitame xanëjavaberena? Pexaniacuene bitsos cavajëtatsi Dioso pitabarata.

Nejamatabëcuenebejiobitsipame, jai dovathivi peyajavaponaponaenë Jesúsjavabelia.

⁸ Bajarapacuenia jumaitsi dovathivi peyajavaponaponaenë tsipaji Jesús jerajavavetsina penonotajunaejavata, dovathivi peyajavaponaponaenë pemataenenaejavatatsi, Jesús itaveta dovathivi. Jesús jumaitsi dovathivijavabelia mapacueniaje:

—jDovathivi, bajaraponë baja pavecuapitsapare!
jai Jesús.

⁹ Nexata Jesús jumaitsi bajaraponëjavabelia:

—¿Detsa pavënëmë? jai.

Nexata dovathivi peyajavaponaponaenë navënëpaeba.

—Tavënë raja Legión. Tsipaji raja bitso paayaibitsaëtoxanetonë, jai dovathivi peyajavaponaponaenë.

¹⁰ Nexata dovathivi pinijicuenia vajëta Jesúsjavabelia itsairabelia pejutsiyanivatsi bajarapairavecua.

¹¹ Nexata bajarajota, imoxoyo petsutojavata, marranobitsaëtoxaneto xaevanapa.

¹² Dovathivi bitso vajëca Jesúsjavabelia.

—Paneitorobare marranobitsaëtoxanetojavabelia. Panetocopare patajonenexa bajara pamarranobitsaëtoxanetojavabelia, jai dovathivi.

¹³ Nexata Jesús tocopata pacuenia dovathivi vajëcatsi. Dovathivi baja pebi vecuapitsapecatsi. Nexata baja marranobitsaëtoxanetojavabelia dovathivi junua. Bajara pamarranobitsaëtoxanetojinavanapa anijamilbeje ponëbeje. Nexata daxita marranobitsaëtoxanetomi cujinaeyeca.

Pucaxaneto itapajanituareca othopareca. Nexata daxita marranobitsaëtoxanetomi meneta bubuna.

¹⁴ Bajara pamarranobitsaëtoxanetomi pevetavanapaevi rëcëpeca. Pona, pacuene tane, petsipaebinexa tomarapijivjavabelia, petsipaebinexa vayafotusatojava penaevijavabelia ata. Nexata jivi ponarena petaenexa bajarapacuene.

¹⁵ Nexata dovathivi peyajavaponaponaenëmi bajarapamonae taeyeta Jesús pemuxuneneta. Bajaraponë penaxatatsijava baja naxatateca. Jamatejema baja. Xaniavaetsia eca. Nexata bajarapamonae cujunavatsi Jesús.

¹⁶ Pamonae cuenetanetsi Jesús pejamatejemyaexanaejava dovathivi peyajavaponaponaenëmi, bajarapamonae paeba pepatsivijavabelia daxita pacuene tane. Paeba pacuene ata Jesús exana marranobitsaëtoxanetojavabelia.

¹⁷ Nexata Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji cujunavatsi.

¹⁸ Jesús baja itsa runareca jera ënëabereca, ponë dovathivi peyajavaponaponaenëmi, bitso picani navajëca Jesús pepëta penaponaenexa.

¹⁹ Itsiata Jesús apo jejai. Jumaitsi bajaraponëjavabelia:

—Ponare nijaboyabelia. Nijamonaes tsipaebare papinijicuene Dioso caexana. Tsipaebare pacuenia ata caitaxutotsoniatane Dioso, jai Jesús dovathivi peyajavaponaponaenëmijavabelia.

²⁰ Nexata baja dovathivi peyajavaponaponaenëmi pona. Taxuxuaba penavajunupaebijava

papinijicuene Jesús exanatsi. Bajaraponë navajunupaebapona Decápolisvënë nacuajava. Decápolisvënë nacuata eca diez patomarabeje. Daxitajivi jamatabëcuenenabenajaca itsa jumetanetsi bajaraponë penavajunupaebaponaejava.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi

(Mt 9.18-26; Lc 8.40-56)

21 Jesús icatsia pecovëyaberena jerata naviarena pucaxaneto itsapanaverena. Nexata tajetabojavatarena jivibitsaëtoxaneto Jesús matatoyoronatsi.

22 Nexata bajarajota napatajopa Jairovënënë. Bajaraponë judíovi penacaetuababiibo pevet-siviyajuvënënë. Jairo itsa taetaba Jesús, nexata Jairo pematabacabëta yaiyataeya Jesús pitabarata nucajunua.

23 Pinijicuenia Jairo vajëta Jesúsjavabelia. Jumaitsi:

—Taxënätoyo raja netobitso. Najumalipeneta rabaja petëpaenexa. Pexaniacuene netoexanare. Naxanitsia. Netoperabëjayatsianame necobeta petëpaeyaniva, jai Jairo.

24 Jejai Jesús. Jesús nexata napona Jairo pepëta. Nexata jivibitsaëtoxaneto Jesús pepënaponaevitsi matatoyorotsia cënënanajetarubenatsi.

25 Bajarapajivibitsaëtoxaneto tuatuajëta itsava, pijanacuene pecapunaevatsi, nanajetaruca. Bajarapova pijanacuene pecapunaecujinaetsi doce baja pavaibeje xaina.

26 Bitso nexata bajarapova bejiobi pexainaecuene yabarə pevaëbivitsi pejamatabëcueneta. Tsipaji belia daxita pexainaejaxavimi navecuavereta pemamatobaponeta pevaëbivitsi. Itsiata apo caevi piavitanecuene. Biji caranata pevajënaeyabelia capunaponatsi piavitanecuene.

27 Nexata bajarapova jumetane itsamona pecuaicuajaijava Jesús piavitanevi pejamatejemayaexanaponaejava yabarə. Nexata bajarapova ponataba Jesús pepënëvelia, jivibitsaëtoxaneto tuatuajëalia. Nexata bajarapova tojayataba Jesús penaxatatsijava.

28 Tsipaji cajena bajarapova jamatabëjumaitsi: “Itsa Jesús penaxatatsijava tojayatabianajë, tavitanejavami nevecuaajibi tsane,” jamatabëjai.

29 Nexata bajarapova itsa tojayataba Jesús penaxatatsijava, bajarajota pijanacuenemi vecuaajibitsi baja. Nexata bajarapova pijanacuenemi pecaevijavareca, nayapëtane.

30 Jesús ata nayapëtane pesaëta pejamatemayaexanaejava pepënëyabelia. Nexata pejayatabijavatatsi Jesús napënëyorotaxuuba. Naëcobaruta. Yanijoba jivijavabelia.

—¿Jipatsa tanaxatatsijava netojayataba? jai.

31 Nexata Jesús pijajivi jumaitsitsi:

—Taneme rabaja jivibitsaëtoxaneto pecacënënanajetarubenaejava. ¿Detsa xuajitsia: “¿Jipatsa tanaxatatsijava netojayataba?” jamë? jaitsi Jesús pijajivi.

32 Jesús naëcobaruta daxitajivijava petaenexa pajivi tojayatabatsi penaxatatsijava.

33 Nexata bajarapova neconecejai tsanucae pecajunavi penayapëtaexae Jesús pejamatejemayaexanaejavatsi. Nexata bajarapova najetabarena Jesús pitabarayaberena. Pematabacëta nucajunua. Nexata daxita pacuene exana, bajarapova tsipaeba Jesúsjavabelia.

34 Nexata Jesús jumaitsi bajarapovajavabelia:

—Xamë nesivajamatatabëjumaitsimë: “Jesús penaxatatsijava itsa tojayatabianajë, tavitanejavami nevecuaajibi tsane,” nesivajamatatabëjamë. Bajaraxuata jamatejemamë baja. Ponare baja jamatejema. Niavitanejavami rabaja ajibi, jai Jesús bajarapovajavabelia.

35 Bajarapacuenia Jesús pejumaitsanucaejavata namutoepatota, Jairo pijaboverena peponaevi mataenenatsi. Bajarapamonae jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajarapamonae Jairojavabelia.

36 Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatatabëxainame. Nاجamatatabëcuene copare saya ëxanëjavaberena nexënatovayo pecatoasaénexa, jai Jesús Jairojavabelia.

37 Nexata Jesús, pajivibitsaëtoxaneto pënanajetarubenatsi, pueneta bajarajota. Jesús pona Jairo pijaboyabelia. Jesús saya yajavalia mapamatatabëxëyoje: Pedro, Juan, Santiago, Jairo Jane baja. Juanbeje Santiagobeje nacaebananëbeje.

38 Itsa baja Jesús palia Jairo pijaboyabelia, tane jivibitsaëto pinijijumeta pematanueyabijava petëpaevayo.

39 Jesús itsa joneya boyalia, jumaitsi bajarapamonaejavelia:

—Pëtsa bitso pamatanueyabame. Pejanava raja apo tēpae. Saya raja majitanuca, jai Jesús tsipaji yapëtane Jesús piasaëyaexanaejavanexa bajara-povayo.

40 Bajarapacuenia Jesús pejumaitsijava, bajarapamonae saya jumecapocaponatsi. Nexata daxita Jesús bovecua pitsapaeyaexana. Itsaxuayolia petëpaevayo boca, Jesús barëjoneya caejiviyobeje saya. Jesús saya barëjoneya mapamatatabëxëyo: petëpaevayo paxa, pena, Jesús pijajivi, acueyabi ponëbeje. Bajarapamatatabëxëyo saya Jesús barëjoneya.

41 Nexata Jesús petëpaevayo cobepita. Jesús pijajumeta jumaitsi:

—Talita cumi, jai, mapajumetaje pejumaitsijume: “Pejanava, nonotapunare,” pejajume.

42 Bajarapacuenia Jesús pejumaitsijavata, pejanavayo nonotabapuna. Ponapona baja. Bajarapovayo doce pavaibeje xaina. Nexata Jesús peyajavajonevilia pinijicuenia jamatabëcuenenabenajaca bajarapacuene itsa tane.

43 Nexata Jesús pinijicuenia jumaitsi:

—Pëtsa itsajivi ata patsipaebame mapacueneje, jai Jesús.

Bajaraxuacujinae Jesús jumaitsi pejanavayo penajavabelia:

—Nexënativoyo pexaejava rajure, jai.

6

*Pacuenia Jesús naviata pijanacuayabelia,
Nazaret tomarabelia, yabara pelivaisi
(Mt 13.53-58; Lc 4.16-30)*

¹ Jesús baja, pijajivi yajava, pona Capernaum tomaravecua. Naviata pijanacuayabelia, pevitsabitomarabelia.

² Judíovi penacueraevetsimatacabita Jesús taxuxuaba jivi livaisi petsipaebijava judíovi penacae-tuatabiabibota. Ayaubitsaëtoxaneto pejumetaevitsi sivajamatabëcuenenabenajacatsi. Nexata bajarapamonae Jesús jamatabëcueneabiatanetsi. Bajarapamonae Jesús yabara najumaitsi mapacue-niaje:

—¿Detsa meta verena maponë capitsapa mapajamatabëcuenelivaisije? ¿Detsa pacuenia meta yapëtane daxita mapacueneje? ¡Pitsipinijicuene maponë exanaje, vaxaitsi abaxë caeto ata apo taetsi! ¡Matapania matanetsije!

³ Maponëje vaxaitsiyajuvënënë. Carpenteronë. María pexénato. Bajaraponë pejuyapijivi Santiago, José, Judas, Simón. Papetiriavi ata vajatomarata jinavanapa, bajaraponë pejuyapijivi, najai bajarapamonae Jesús yabara.

Nacaetomarapijivixae, bajarapamonae Jesús apo jumexaniataetsi.

⁴ Nexata Jesús jumaitsi bajarapamonaejavabelia:

—Bajara maitsabiabije. Diosojumepaebivi profetavi itsanacuapijivi yaiyataeyabiabatsi. Itsiata pijanacuapijivi, pijaviriavi, pijamonae ata, apo yaiyataeyabiabitsi, jai Jesús.

5 Nexata Jesús bajarajota jivi ayaibitsaëtojavabelia pinijicuene pexanaejava apo tsitaexanae. Tsipaji apo jumecovënëtsitsi. Saya caejiviyobeje piavitanevi pecobeta jayata. Jamatejemaya exana.

6 Nexata Jesús bitso najamatatabëxaina. Tsipaji jivi apo jumecovënëtsitsi. Bajaraxuacujinae Jesús tsiquiritomaraxijava Dioso pitorobilivaisi jivi tsi-paebebanajetaruca.

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

(Mt 10.5-15; Lc 9.1-6)

7 Jesús junata pijajivi doce ponëbeje penacaetuatsinexa. Nexata Jesús pijajivi itoroba anijanëbeje tsaponae. Jesús pijajivi pecaëjëpaejamatabëcuensetsi jamatabëcuenecaëjëpaeyaexana dovathi peyajavajinavanapaevi pevecuacapitsapaponaenexa.

8 Jesús jane baja pijajivi penaropobivajënae, Jesús jumaitsi pijajivijavabelia mapacueniae:

—Pëtsa itsacuenejava ata pacaponame panijanamutonexa. Pëtsa pacaponame panemarue ata, doro ata, palata ata. Ënaeboyo saya pacaponare.

9 Itsiata pataxunaponare panenataxuxatabijava. Caejava panenaxatatsijava pajumaponare. Pëtsa anijacamisabeje pacaponame.

10 Itsajota papatabiabianame, caebota pama-jitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaename, bajarapabovecua papitsapaename.

11 Patomarata apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, nexata paponaename bajarapatomaravecua. Paneponaevajënae bajara-patomarata panataxuatsapérëvarëbianame. Bajarapacuenia itsa panataxuatsapérëvarëbianame, bajarapatomarapijivi yapëtaena Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi. Xaniajanë pacuenia pacatsipaebijitsiatsi. Pamatacabí Dioso jivi naneconitsiaexanaena, bajarapamatocabí Dioso bitsó naneconitsiaexanaenatsi patomarapijivi apo pacacopiapitsi tsane. Paneconivajétota bajayata Dioso naneconitsiaexana Sodoma tomarapijivimi, Gomorra tomarapijivimi ata, bajarapanecrivajéto matatoxenetsia Dioso naneconitsiaexanaenatsi patomarapijivi apo pacacopiapitsi tsane, jai Jesús pijajivijavabelia.

12 Nexata jane baja Jesús pijajivi naropoba Dioso pitorobilivaisi jivi petsipaebanajetarubenaenexa. Jesús pijajivi naropoba anijanëbeje tsaponae. Nexata Jesús pijajivi jumai tsaponae jivijavabelia:

—Pacopabare baja pibisiacuene paneexanabi-abijava. Panajamatabécuenepénëyorore Diosojavabelia, jai tsaponae.

13 Jesús pijajivi dovathi peyajavajinavanapaevi vecuacapitsapapona. Piavitanevi ata mataex-abapona aceiteranëta. Bajarapacuenia Jesús pijajivi jamatejemayaexanapona piavitanevi.

Pacuenia bajayata Juanpijinë jivibautisabinëmi

beyaxuabatsi yabara pelivaisi

(Mt 14.1-12; Lc 9.7-9)

14 Herodes, Galileanacua pevetsinë. Nexata Herodes jumetane itsamonaë jamatabëcuenenavëxaniabiaya pejumaitsijava Jesús yabara: “Juanpijinë raeta jivibautisabinëmi icatsia asaë petëpaecujinae. Bajaraxuata caëjëpatsi Dioso pesaëta pinijicuene pexanaenexa,” pejaijava itsamonaë jamatabëcuenenavëxaniabiaya Jesús yabara, Herodes jumetane.

15 Itsamonaë pijinia jumai tsaponae Jesús yabara:

—Bajayata raeta ponëmi ponapona, profeta Elíaspijinëmi, baja raeta ponë, jai tsaponae itsamonaë.

Itsamonaë pijinia jumai tsaponae Jesús yabara:

—Diosojumepaebinë profeta raja. Tsipaji rabaja pacuenia bajayata profetavi jinavanapa, bajara icatsia maponë itsije, jai tsaponae itsamonaë.

16 Bajarapacuenia itsamonaë ja-matabëcuenenavëxaniabiaya pejumaitsaponaejava Jesús yabara, Herodes itsa jumetane, Herodes ata jamatabëcuenenavëxaniabiaya jumaitsi Jesús yabara:

—Maraeta Juanpijinëmije, ponëmi bajayata xanë tajajivi vësiucutaxuabiaexanajë. Icatsia raeta asaë petëpaecujinae, jai Herodes jamatabëcuenenavëxaniabiaya Jesús yabara.

17 Bajarapacuenia Herodes jumaitsi tsipaji abaxë Juanpijinë itsa asaë, Herodes pijajivi, vajabitsaëvi, itoroba Juanpijinë pevaetabinexatsi. Nexata vajabitsaëvi Juanpijinë cobecëtsiaya caponatsi penaneconitsivi pejebabiabiboyalia.

Bajarapacuenia Herodes pijajivi itoroba Herodes pijava, Herodíasva, pejamatabëcueneta. Herodíasva picani copiata pita Felipe, Herodes pejuyapijinë. Nexata Herodes pejuyapijinë pijava yacajérëta.

¹⁸ Nexata Herodes pejuyapijinë pijava peyacajérëtsixae, Juanpijinë abaxë itsa apo vaetabitsi, muxujioba Herodes. Juanpijinë jumaitsi Herodesjavabelia:

—Acuenebi raja nejuyapijinë pijava nepitsi-java,” jai Juanpijinë Herodesjavabelia.

¹⁹ Nexata bajarapacuenia Juanpijinë pejumaitsixae, itoyatsi Herodíasva. Nexata abaxë Juanpijinë itsa ponapona penaneconitsivi pejebabiabibota, bajarapova picani Juanpijinë jamatabëbeyaxuobiaexanatsi. Itsiata apo caejëpaetsi.

²⁰ Tcipaji Herodes yapëtane Juanpijinë bitso pejamatabëxanepanaenëcuene. Nexata Herodes yaiyatane Juanpijinë. Bajaraxuata Herodes apo tocopatsi pijava pejamatabëcueneta pebeyaxuabinexatsi Juanpijinë. Juanpijinë itsa cuaicuajai tsabiabi Herodesjavabelia, nexata picani Herodes jamatabëbëjai tsabiabi pijaneconi yabara. Itsiata Herodes xaniavaetsia namuxunaevetabiaba.

²¹ Nexata pamatacabí Herodes naja-matabënapita penaexanaematacabí, naja-matabëxaina pexaniafiesta pexanaenexa. Bajarapafiestajava Herodes junata pijaboyerena jivi ayaubitsaëtoxaneto penabaninexa. Junata Herodes pijajivi, pamonaë toevetatsi pijairanë. Junata vajabitsaëvi pevetsivinua. Junata petuxanevinua, Galilea nacuata pejinavanapaevi. Nexata bajarapafiestajavata

Herodíasva toyapëxanepanatsi Juanpijinë
pebeyaxuabiaexanaenexatsi.

²² Herodíasva toyapëxanepanatsi tsipaji pexënatoyo joneya Herodes pejunatsivi pebarënabanecaejavalia pijacujirucuenia caevayo peyavajibinexa. Nexata Herodes pejunatsivi bitso barëitajitsipa pejionëyo peyavajibijava. Nexata Herodes najumecapanepaeya pexaniajaijumeta jumaitsi pejionëyojavabelia:

—Nevajëre xua jitsipame. Carajutsianatsi raja.

²³ Pacuenejava nevajëtsianame, carajutsianatsi. Itsa nevajëtsianame taneevetsiaexanaenacua ata, tuatuajëjava carajutsianatsi, jai Herodes najumecapanepaeya pejionëyojavabelia.

²⁴ Nexata bajarapovayo pitsatabalia. Jumaitsi penajavabelia:

—¿Detsamë ra xua vajëtsianajë? jai penajavabelia.

Nexata Herodíasva pexënatoyojavabelia jumaitsi:

—Juan jivibautisabinë pematabocoto vajëre, jai.

²⁵ Nexata bepijia bajarapovayo jopajoneya Herodes peecaejavabelia. Jumaitsi Herodesjavabelia:

—Jitsipajë cajena tanerajutsinexamë platota Juan jivibautisabinë pematabocoto, jai bajarapovayo Herodesjavabelia.

²⁶ Nexata Herodes pinijicuenia bejamatabëjiobi tsanajetsireca. Herodes nexata acuenebi: “Jume,” pejaijava. Tsipaji baja Herodes najumecapanepaeya jumaitsi pejionëyojavabelia pexaniajaijumeta daxita pejunatsivi pitabarata.

²⁷ Nexata Herodes bepijia itoroba vajabitsaënë petocarenanexatsi Juan pematabocoto.

28 Vajabitsaënë nexata pona penaneconitsivi pejebabiabiboyabelia. Juanpijinëmi vësiucutaxuabatsi. Juanpijinëmi pematabocoto vajabitsaënë carena platota. Nexata pejanava rajutatsi. Nexata bajarapovayo juya pena rajuta. Nexata baja Herodíasva yapétane capanepaeya baja Juanpijinë pebeyaxuabijavatsi.

29 Nexata Juanpijinë pijajivi itsa vënëtanetsi pebeyaxuabijavatsi, bajarapamonae ponarena Juanpijinë pebocaejavaberena. Pitatsi petëpaenë. Pepitsicujinaetsi Juanpijinë pijajivi mëthëtatsi.

Pacuenia Jesús pexaejava rajuta cinco mil ponëbeje yabara pelivaisi

(Mt 14.13-21; Lc 9.10-17; Jn 6.1-14)

30 Jesús pitorobivi, apóstolevi, naviabanajetarubena Jesúsjavaberena. Nexata bajarapamonae Jesúsjavabelia navajunupaeba daxita pacuene exanavanapa, pacuenia ata jivi livaisi tsipaebavanapa.

31 Nexata Jesús jumaitsi bajarapamonaejavabelia:

—Naxanitsia. Ponatsi pesajinaejavabelia. Nacueraevetsianatsi caeepatoyo, jai Jesús.

Bajarapacuenia Jesús jumaitsi pijajivijavabelia tsipaji jivibitsaëtoxanetonë topatabiabatsi. Itsamonaes naviabaponabiaba. Itsamonaes juya patabiaba. Nexata Jesús pijajivi pebarënaninexa, apo cuenecaëjëpabiabitsi.

32 Nexata Jesús épijajivi jerata yajavapona itsabelia jivi ajibi.

33 Itsiata jivi ayaubitsaëtoxaneto pëtanetsi Jesús peponaejava. Nexata itsabelia Jesús

pona, matatsënëa pënacujinaerubenatsi daxita tomaranëpójivi. Caranata Jesús pevajënaeyabelia pata bajarapamonae.

³⁴ Itsa baja Jesúsbana nonobajunaya jeravecua, Jesús tane jivibitsaëtoxaneto. Nexata Jesús bajarapamonae itaxutobejiobiatane. Nexata Jesús bajarapamonae sivajamatabëjumaitsi mapacueni-aje:

—Pacuenia baitsi ovejabitsaëtoxaneto itsa toajibitsi pevetsinëtsi, bajara itsi mapamonaeje, sivajamatabëjai Jesús.

Nexata Jesús ayaicuenia livaisi tsipaeba bajarapamonaejavabelia.

³⁵ Itsa baja bitso caniviyotsia, Jesús pijajivi cujibarenatsi. Jumaitsitsi:

—Canivyo rabaja bitso. Majota ajibi pexaejava. Tsipaji itsajivi ata pijabo apo xainae.

³⁶ Itorobare baja jivi peponaenexa imoxoyo penaetomaranëjavabelia pecомуacaenexa pexaejava, jaitsi Jesús pijajivi.

³⁷ Jesús nexata jumaitsi pijajivijavabelia:

—Paxamë parajure pexaejava, jai.

Nexata Jesús pijajivi jumaitsi:

—¿Paponaenajë tsaja tomarabelia patacomuatsinexa pan doscientos denariota bajarapamonae pexaenexa? jai Jesús pijajivi.

³⁸ Jesús icatsia jumaitsi pijajivijavabelia:

—¿Detsa papanbëbeje paxainame paxamë? Pataema copiata, jai Jesús.

Jesús pijajivi petaecujinae tsipaeba Jesúsjavabelia. Jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai Jesús pijajivi.

³⁹ Nexata Jesús itoroba daxitajivi penaenexa ponajavata.

⁴⁰ Nexata bajarapamonae pepobitsaëtonë nat-sanaeya ena. Caebitsaëtota enapona cien pajivibeje. Itsabitsaëtota enapona cincuenta pajivibeje. Bajarapacuenia caebitsaëto canacujitsia enapona.

⁴¹ Nexata Jesús pita cinco papanbëbeje, anijanëyobeje dujuainëyobeje yajava. Athëbëa be-naëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús.

Bajaraxuacujinae Jesús pan epatsicacapona. Pijajivijavabelia rajutapona pepatsicacaejava. Nexata juya Jesús pijajivi pan tsicobetsana jivijavabelia. Dujuaijavaxi ata tsicobetsana jivijavabelia. ⁴² Daxita xaniavaetsia nabane.

⁴³ Bajaraxuacujinae Jesús pijajivi caetuata pan, dujuai yajava, jivi peyajuvënëcopabejebijavanë. Nexata vënëba doce xuabeje bemapirecuenia pexanaejavanë.

⁴⁴ Pamonae pexaejava xane, ayaibitsaëtoxaneto. Itsiata ëpebijivi namataëjëtatsi cinco mil ponëbeje.

Pacuenia Jesús mene itaboxoya najetaruca yabara pelivaïsi

(Mt 14.22-27; Jn 6.16-21)

⁴⁵ Jesús jivi ayaibitsaëtoxaneto pexaejava perajutsicujinae, Jesús pijajivi bepijia runaeyaexanareca jera ënëabereca. Jesús pijajivi copiata

itoroba penicabinexa puca itsapanabelia, Bet-saida tomarabelia. Jesús baja jivi naviabiaexana. Bajaraxuata abaxë caenë nacopatanuca bajara-jota.

⁴⁶ Itsa baja jivi napëvereta penaviabijava, Jesús junaya petsutojumabetsia pevajëtsinexa Diosojav-abelia.

⁴⁷ Itsa baja bitso meravi, Jesús pijajivi pu-caxaneto itapavecua tajë baja yanajetarubenalía. Jesús abaxë bajarapaepatota caenë nacopatanu-carena pucaxanetoitapatarena.

⁴⁸ Nexata Jesús tane pijajivi petoayapëbejejavatsi pevaetsijava. Tsipaji bitso joviboxaneto ayai pe-vajënaeverena. Bajaraxuacujinae bajayacunua, ajena matacabijitsia, Jesús pijajivi pecovëvelia imoxoyotanajetaruca. Jesús najetaruca mene itaboxoya. Rovia picani xenetsijitsia.

⁴⁹ Jesús pijajivi itsa tanetsi mene itaboxoya pe-najetarucaejava, Jesús pijajivi jamatabëjumaitsi:

—¡Petëpañenëmi raeta pejumape najetaruca! ja-matabëjai.

Nexata Jesús pijajivi vavajai tsaxuabi ayai-jumeta.

⁵⁰ Tsipaji daxita Jesús pijajivi tane bajarapacue-nia penajetarucaejava. Nexata Jesús pijajivi ja-matabëcuenenajunaviaca. Nexata Jesús bepijiayo jumaitsi pijajivijavabelia:

—Xanë raja. Pëtsa panecujunavame. Pajamate-jemamëre saya, jai Jesús pijajivijavabelia.

⁵¹ Nexata baja Jesús nonolia bajarapajera ënëabelia. Ajibi baja tsaxuabi jovibo. Nexata Jesús pijajivi pinijicuenia jamatabëcuenenajunaviaca.

Tsipaji tane jovibo, malataca yajava, Jesús pijibliaexanaejava.

⁵² Jesús baja picani pijajivi copiaya tane, pan tsiquirijavayomi ata, jivibitsaëtoxanetojavabelia Jesús perajutsijava. Itsiata Jesús pijajivi apo jamatabëcueneyapëtae Jesús pecaëjëpaenëcuenetsi pinijicuene pexanaenexa. Abaxë bajarapamonae ajamatabëcuenetaja.

*Pacuenia Jesús jamatejemayaexana piavitanevi
Genesaret nacuata yabara pelivaisi
(Mt 14.34-36)*

⁵³ Jesús pijajivi jerata yajavapata puca itsapanabelia. Pata Genesaret nacuayabelia. Peyapatsijera bajarajota puca itapata querataruta.

⁵⁴ Nexata Jesús, pijajivi yajava, nonotajunaya jeravecua. Bajarajota bepijia jivi yapëtanetsi Jesúscuene.

⁵⁵ Nexata Jesús pepatsijava penatsipaebinexa, navajunucacujinaejinaruta daxita bonëjava. Nexata piavitanevi pijacamaxita yavëtacarapatatsi itsajota jivi jumetane Jesús pepatsijava.

⁵⁶ Jesús pata tsiquiritomaraxijava, pinijitomaranëjava ata, tomrapënëya penaebonëjava ata. Daxitajava, itsa patomarata Jesús patabiaba, bajarapatomaranëjava callejavata, jivi tojebabiabatsi piavitanevi. Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponëje pecatojayatsinexa nenaxatatsijavacopia, jai tsabiabi.

Nexata daxita pamonae Jesús penaxatatsijava-copia tojyataponatsi, jamatejema baja tsponae piavitanejavamivecua.

7

*Pacuenia Jesús tsipaeba xua jívi jamatabëcuenebijanatsiyabara pelivaisi
(Mt 15.1-20)*

¹⁻⁴ Daxita judíovi catsiteca pijasalinaivimi pijacuene. Judíoviyajuvënëvi, pamonae fariseovi naexana, bajarapamonae bitso catsiteca pijasalinaivimi pijacuene daxita judíovi matatoxenetsia. Jamatabëcuenenavëxaniabiaya jamatabëjumai tsabibi:

—Itsa catsitecajë tajasalinaivimi pijacuene, nexata Dioso aneconijibia netaena, jamatabëjai tsabibi.

Nexata bajarapamonae pijasalinaicuenia anijatonë xaniavaetsia itsa apo napënanacobequiatsi, pexaejava apo xaeyabiabi. Itsajota pexaejavacuene canajetabiaba, bajaraverena itsa naviaba pecomuacaecujinae, bajarapamonae pijasalinaicuenia xaniavaetsia itsa apo napënanacobequiatsi, pexaejava apo xaeyabiabi. Bajarapamonae pematatsënëa navitsia itsacujiruxi ata, pijasalinaivimi pijacujiru, catsiteca. Bajarapamonae tazaxi, mera peyajebinëanë ata, pecasetsinëanë ata, camanë ata, pijasalinaivimi pijacuenia xaniavaetsia quiatabiaba. Nexata judíovi pecujarubivi Jerusalén tomaraverena pata. Nexata judíovi pecujarubivi, fariseovi yajava, cujibarenatsi Jesús. Nexata bajarapamonae tane Jesús

pijajivi judíovi pijasalinaicuenia anijatonë napënacobequiatsinejeva penabanijava. Bajaraxuata bajarapamonae jumaitsi Jesújavabelia:

—Jesús, nijajivi naneconita Diosojavabelia.

⁵ Tsipaji nijajivi apo jumecovénëtsiajinavanapae vajasalinaivi pijacuene. Nijajivi itsa xane pexaejava, anijatonë napëna apo nacobequiatabiabi, jai bajarapamonae Jesújavabelia.

⁶ Jesús nexata jumaitsi bajarapamonaejavabelia:

—¡Paxamë saya jivi paneyamaxëitojorobivi! Diosojumelivaisipaebinëmi profeta Isaíaspijinë baja cajena bajayata tajévelia xaniavaetsia pacavajunupaeba. Bajayata Dioso tajévelia pejumaitsijava paxamë yabara profeta Isaíaspijinë peyaquinalivaisita jumaitsi mapacueniae: Bajarapamonae nejitsipaena saya pijumeta. Itsiata pepo tanejitsipaejamatabécuene nevecuatajë tsane.

⁷ Saya baitsi bajarapamonae pijajumaitsita tsane: “Pacajitsipatsi,” nejai itajara tsane. Itsiata apo xaniajai tsane. Bajarapamonae saya jivi tispaeabaponaena pejamatabécuenepilivaisi. Pepo taitorobilivaisi apo tsipaebi tsane, jai tajévelia Dioso pejumaitsijava paxamë yabara Isaíaspijinë peyaquinalivaisita, jai Jesús bajarapamonaejavabelia.

⁸ Jesús icatsia jumaitsi fariseovijavabelia, judíovi pecujarubivijavabelia ata:

—Paxamë Dioso papecaitorobicuenia apo paexanaemë. Caranata ëvajasalinaivi pijacuene pacatsitecame. Nexata vajasalinaivi pijacuenia xani-

avaetsia paquiatabiabame mera peyajebinëanë. Xaniavaetsia paquiatabiabame tazaxi ata. Pematatsënëa navitsia itsacujiru ata pacatsitecame.

⁹ Apo pajumecovënëtsimë Dioso pitorobilivaisi vajasalinaivi pijacuene panecatsitecaenexa. Apo pajumecovënëtsi atamë Dioso pitorobilivaisi, jamatabëcuenenavëxaniabiaya pajamatabëjumaitsimë tsabiabi: “Pexaniacuene raja exanajë,” pajamatabëjamë tsabiabi.

¹⁰ Bajayata Dioso najumecopata Moisëspijinëta. Bajarapalivaisi jumaitsi: “Axa yaiyataema. Ena ata yaiyataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moisëspijinëta penajumecopatsilivaisi.

¹¹⁻¹² Itsiata baitsi jane paxamë jivi pamuxubijiapenetabiabame peyaiyataeyaniva paxajivi, penajivi ata. Paxamë pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jiitsipaemë neyavenonaejava, jumaitsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata baja acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia.

¹³ Nexata caranata Dioso pejumaitsijume: “Axa yaiyataema. Ena ata yaiyataema,” pejaijume, paxamë jivi pacopabiaexanaponame. Tsipaji paxamë patsipaebaponame saicaya vajasalinaivimi pijalivaisi. Itsalivaisianë ata pematatsënëa saicayacuenia patsipaebaponame Dioso pitorobilivaisivecua, jai Jesús judíovi

pecujarubivijavabelia, fariseovijavabelia ata.

¹⁴ Nexata icatsia Jesús junata jivi. Jumaitsi jivi-javabelia:

—Daxita paxamë panenamuxunaevere xaniavaetsia patanejumeyapëtaenexamë.

¹⁵ Xua jivi pecuibota xane, pexaejavjenae napëna anijatonë apo nacobequiatsi ata, apo jamatabëcuenebijianaetsi. Apo vënanaconitsi Diosojavabelia. Baitsi rajane xua jivi najamatabëxaina pejamatabëëthëtovetsina, xua ata pibisiacuenia cuaicuajai, bajara baitsi jane xua jivi bajamatabëcuenebijianatsi.

¹⁶ Pajivi jamatabënejumeyapëtane patacatsipae-bilivaisi, nemamuxunaevetsi xaniavaetsia, jai Jesús.

¹⁷ Itsa baja Jesús jivivecua natixita, boyan joneya. Nexata boyalia pijajivi yanijobatsi bajarapalivaisi.

¹⁸ Nexata Jesús jumaitsi pijajivijavabelia:

—¿Paxamë ata tsarivia abaxë apo panejumeyapëtaemë? Daxitacuene raja pexaejava jivi xae ata, apo jamatabëcuenebijianaetsi. Diosojavabelia apo vënanaconitsi.

¹⁹ Tsipaji raja jivi pexaejava apo tsijamatabëëthëjonetsi. Saya pënëareca joneca. Bajaraxuacujinae icatsia vecuapitsapatsi, jai Jesús.

Bajarapacuenia Jesús jumaitsi Jesús pijajivi peyapëtaeyaexanaenexa pacuenia daxitacuene jivi pexaejava xae ata, apo pibisiacuenia.

²⁰ Icatsia Jesús jumaitsi:

—Baitsi rajane jivi pejamatabëëthëtojavavetsina, papibisiajamatabëcuene pitsapa, bajara baitsi jane xua jivi jamatabëcuenebijianatsi.

²¹ Tsipaji rabaja jivi pejamatabëëthëtojavavetsina pitsapa pibisiacuene penajamatabëxainaenexa. Pitsapa pebi pijava pevecuanamatayajitsi jamatabëcuenenexa. Pitsapa petiriavijavabelia pebi penaperabëquenetsiatae jamatabëcuenenexa. Pitsapa jivitonë pebeyaxuabijamatabëcuenenexa.

²² Pitsapa penacobetoxotsijamatabëcuenenexa. Pitsapa itsamonaec pecobecovë penaxainaeyabijamatabëcuenenexa. Pitsapa piacujirubejejamatabëcuenenexa. Pitsapa itsamonaejavabelia peyamaxëitojorobijamatabëcuenenexa. Pitsapa itsamonaec pexainaecuene pecobecaëbijamatabëcuenenexa. Pitsapa itsajivi pibisiacuenia pebaracuaicuajai jamatabëcuenenexa. Pitsapa ayajamatabëcuenejivi penataejamatabëcuenenexa. Pitsapa saya jema peponaponaejamatabëcuenenexa.

²³ Daxita bajarapajamatabëcuene jivi pejamatabëëthëtojavavetsina pitsapa. Nexata bajarapacuene jivi jamatabëcuenebijianatsi, jai Jesús pijajivijavabelia.

*Pacuenia Jesús itsanacuapijiva pexënatoyo tojamatejemayaexana yabara pelivaisi
(Mt 15.21-28)*

²⁴ Jesús baja Genesaret nacuavecua pon. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Nexata Jesús bajarapanacuatalia

bota patajopa. Muetsia picani Jesús patsijitsia. Itsíata acuenebi muetsia pepatsijava.

25 Nexata bepijia petiriva vénélivaisitaetabatsi Jesús pepatsijava. Nexata petiriva pata Jesúsjavaberena. Nexata bajarapova yaiyataeya Jesús pitabarata pematabacabëta nucajunua. Bajarapova pexënatoyo dovathi yajavaponapona.

26 Bajarapova sirofeniciaviriava, apo judíova. Nexata Jesúsjavabelia jumaitsi:

—Pexaniacuene bitso netoexanare. Taxënatovayo netovecuacapitsapare dovathi, jai bajarapova.

27 Nexata Jesús jumaitsi bajarapovajavelia:

—Copiaya abaxë veyavenonajë tajanacuapijivi, judíovi. Tspají apo xanepanae xamë itsanacuapijivamë copiaya tacayavenonaanexa. Xamë copiaya itsa cayavenonaejitsipatsi, nexata pacuenia pejevaxi pexaejavaminexa yacajérëtsipajë tarajutsinexa avirixijavelia, bajara itsinë tsipae, jai Jesús bajarapovajavelia.

28 Itsíata baitsi jane bajarapova ajumesaë tsaponae. Icatsia jumaitsi Jesúsjavabelia:

—Xaniajamë rabaja picani. Itsíata neyavenonare. Tspají avirixi ata mesa bëxëpanata itsa nubena, nexata pejevaxi pexaepanpërë itsa othopareca mesa bëxëpanareca, banaxane avirixi ata. Bajara pijinia pacuenia itsíata itsanacuapijiva atanë, neyavenonare, jai bajarapova Jesúsjavabelia.

29 Nexata icatsia Jesús jumaitsi bajarapovajavelia:

—Xaniavaetsia nejumecanaviatame. Naviare baja nijaboyabelia. Dovathi rabaja catovecuapisapatsi nexénatovayo, jai Jesús.

³⁰ Itsa baja bajarapova pijaboyabelia pata, pexénatovayo taeyabuata jamatejema baja pebocaejava camata. Nexata yapétane pexénatovayo baja petovecuapitsapaejavatsi dovathi.

Pacuenia Jesús jamatejemayaexana bitso siyanë, apo pejumetaenë, piajumecécënë, yabara pelivaisi

³¹ Jesús baja naropota Tiro nacuavecua. Na-jetaruca Sidón nacuajava. Bajaraxuacujinae na-jetaruca Decápolis nacuajava. Bajaraxuacujinae patajopa Galilea pucaxanetojavabelia.

³² Bajarajota jivi tocapatatsi siyanë, bitso apo pejumetaenë, piajumecécënë. Nexata bajarapamonae jumaitsitsi Jesúsjavabelia:

—Jesús, pexaniacuene panetoexanare. Panetojayare maponëje pejumetaenexa, pecuaicuai-jainexanua, jai bajarapamonae.

³³ Nexata Jesús jivivecua bajaraponë barëpona pesaicaeyojavabelia. Nexata Jesús pecobesitota namataenetsia muxuvvojobëta. Bajaraxuacujinae nacobesioniata. Ebarëtojayata.

³⁴ Nexata Jesús athëbëa benaëcotsia. Jesús athëbë venajumalixuabica. Nexata Jesús pijajumeta ju-maitsi bajaraponëjavabelia:

—¡Efata! jai.

“Efata,” pejaijume Jesús pijajumeta, mapajumetaje pejumaitsijume: “¡Muxuvvojorucaremelia!” pejaijume.

35 Bajarapacuenia Jesús pejumaitsijavata, bajaraponë muxuvovorucalia baja. Jumetane jane baja. Peebarëto ata jane baja xanepana. Natsipaeba baja xaniavaetsia.

36 Nexata Jesús jumaitsi bajaraponë petocapatsivitsijavabelia:

—Pëtsa papaebame itsamonaejavabelia pacuene exanajë maponëjavabeliaje, jai picani Jesús asaëyata.

Itsiata bajarapamonae jumeitavetsi atatsi, bitso tsipaebapona jivijavabelia.

37 Nexata pamonae jumetane bajarapalivaisi, pinijicuenia jamatabëcuenenabenajaca. Bajarapamonae jumaitsi:

—Bajaraponë, Jesús, daxitacuenevitane pexainaevi ata xaniavaetapona. Siyavi ata, bitso apo pejumetaevimi ata, jumetaeyaexanapona. Apo pecaejëpaevitsi ata pecuaicuajaijava, cuaicuajaiyaexanapona xaniavaetsia, jai bajarapamonae Jesús yabara.

8

Pacuenia Jesús rajuta pexaejava bejamatabëcuene cuatro mil pajivibeje yabara pelivaisi (Mt 15.32-39)

1 Itsamatacabí Jesús jivibitsaëtoxaneto muxunanacaetuatsati. Nexata bajarapamonae penabanninexa, bajarajota pexaejava apo xainae. Nexata Jesús junata pijajivi. Jesús jumaitsi pijajivijavabelia mapacueniaje:

2 —Netsitabejiobi baja rovia mapamonaeje. Tsi-paji baja ajena acueyabi pamatacabibeje xaina

xanëjavata pejinavanapaecujinae. Pemarue baja tovereverecatsi.

³ Itsa meta itorobijitsipajë pijabonëjavabelia peponaenexa pexaejava xaenejeva, apo asaë meta tsipae namutua peponaejava. Tsipaji raja itsamonae pata tajëverena, jai Jesús pijajivijavabelia.

⁴ Nexata Jesús pijajivi jumaitsi:

—¿Detsa jane pacuenia pexaejava berajutatsi? Majotaje ajibi pexaejava. Tsipaji itsajivi ata pijabo apo xainae, jai Jesús pijajivi.

⁵ Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, jai.

⁶ Nexata Jesús itoroba daxitajivi penaenexa irata. Nexata Jesús pita siete papanbëbeje. Nexata Diosojavabelia Jesús jumaitsi:

—Pexaniacuene panetoexaname. Panerajutame pataxaejava, jai.

Bajaraxuacujinae Jesús epatsicacapona pan. Nexata Jesús pepatsicacaepan rajutapona pijajivijavabelia. Nexata juya Jesús pijajivi bajarapapan tsicobetsana daxitajivi pexaenexa.

⁷ Dujuainëxinua xaina. Icatsia Jesús jumaitsi Diosojavabelia dujuainëxi yabara:

—Pexaniacuene panetoexaname. Panerajutame dujuainëxi, jai.

Nexata icatsia pijajivi itoroba petsicobetsanaenexa daxitajivi bajarapadujuainëxi.

⁸ Daxitajivibitsaëtoxaneto nabane xaniavaetsia. Nexata peyajuvënëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë.

9 Pexaejava nabane bejamatabëcuene cuatro mil pajivibeje. Nexata jane baja pexaejava pexaecujinae, Jesús jivi naviabiaexana pijabonëjavabelia.

10 Bajaraxuacujinae Jesús, pijajivi yajava, runareca jera ënëabereca. Jesús pijajivi barëpona Dalmanuta nacuayabelia.

Pacuenia fariseovi Jesús itorobatsi Dioso pesäta pinijicuene pexanaejava petsitaexanaenexa picani yabara pelivaisi

(Mt 16.1-4; Lc 12.54-56)

11 Fariseovi Jesúsjavaberena pata. Bajarapamonae jamatabëcueneëjëbiaya jumenotaponatsi. Nexata bajarapamonae jumaitsi Jesúsjavabelia:

—Jesús, Dioso pesäëta pinijicuene exanare. Nexata pacacueneyapëtaenatsi Dioso pepacuene athëbëvetsica pecaitorobinëcuenetsica, jai.

12 Nexata bajarapamonae yabara Jesús bitso jamatabëcuenebjai. Nexata Jesús athëbë venajumalixuabica. Jumaitsi:

—¿Detsa xuajitsia panevajëcame pinijicuene patacatsitaexanaenexa pataneyapëtaenexamë pepacuene Dioso athëbëvetsica taneitorobinëcuenetsica. Xaniajanë pacuenia pacatsipaebijitsiatsi. Itsiata apo pacatsitaexanaetsi tsane pinijicuene taexanaejava, jai Jesús.

13 Nexata baja Jesús bajarapamonae vecuapona. Icatsia runareca jera ënëabereca. Pucaxaneto itsapanabelia baja Jesús pona.

Pacuenia Jesús pijajivi muxujioba fariseovi petsipaebilivaisi pejumecovënëtsianiva yabara pelivaisi

(Mt 16.5-12)

¹⁴ Jesús pijajivi nacofënëta pumarue. Nexata saya caepanbëyo capona jerata.

¹⁵ Nexata Jesús pijajivi muxujioba pejumecovënëtsianiva fariseovi itsa tsipaebatsi saicayacuenia Dioso pejumelivaisivecua. Jesús jumaitsi pijajivijavabelia mapacueniae:

—Panejumetaema. Xania panayajivitaema fariseovi pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaebilivaisi, nacuaevetsinë ata, Herodes, petsipaebilivaisi, Jesús pijajivi pejumecovënëtsianiva.

¹⁶ Itsiata Jesús pijajivi apo jumeyapëtaetsi. Bajaraxuata Jesús pijajivi nabarécuaicuajai bajarapacuenia Jesús pejumaitsijume yabara. Jesús pijajivi najumaitsi:

—Jesús nacajumaitsi: “Xania panayajivitaema fariseovi pijalevadura,” nacajai. Baja raeta pacuenia Jesús nacajumaitsi pan apo vajacaponaexae, najai Jesús pijajivi.

¹⁷ Jesús pijajivi jamatabëcueneyapëtane bajarapacuenia jamatabëcuenenavëxaniabiaya penajumaitsijava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimë: “Baja raeta pacuenia Jesús nacajumaitsi pan apo vajacaponaexae,” panajamë? Paxamë abaxë apo panejumeyapëtaemë xua yabara pacajumaitsitsi. Pajamatabëcuenetajamë bitso.

18 Pan yabara raja apo pacajumaitsitsi. Pan itsa namatavenonaejitsipatsi, necaëjëpa taexanaenexa. ¿Apo panajamatabënäpitsimë tsipaji pacuenia exanajë pamatacabí pan namatavenonatsi?

19 Pacujinae epatsicacajë cinco papanbëmibeje panetsicobetsanaenexa cinco mil ponébejejavabelia, bajarapacujinae peyajuvënëcopabijavanë, ¿detsa xuabeje pavënëtame bemapirecuenia pexanaejavanë? jai Jesús pijajivijavabelia.

Nexata Jesús pijajivi jumaitsi:

—Doce xuabeje pavënëtajë, jai.

20 Jesús icatsia jumaitsi:

—Pacujinae epatsicacajë siete papanëmibeje panetsicobetsanaenexa cuatro mil pajivibejejavabelia, bajarapacujinae peyajuvënëcopabijavanë, ¿detsa xuabeje pavënëtame bemapirecuenia pexanaejavanë? jai Jesús.

Nexata Jesús pijajivi jumaitsi:

—Siete xuabeje pavënëtajë, jai.

21 Nexata Jesús jumaitsi pijajivijavabelia:

—¿Panejumeyapëtaneme tsabaja pan yabara apo patacajumaitsijava? Xanë pacajumaitsitsi: “Xania panayajivitaema fariseovi pijalevadura,” pacajaitsi. Bajarapacuenia pacajumaitsitsi panejumecovënëtsiyaniva fariseovi petsipaebilivaisi, panejumecovënëtsiyaniva nacuaevetsinë ata Herodes. Tsipaji bajarapamonae pacatsipaebiana saicayacuenia Dioso pejumelivaisivecua, jai Jesús pijajivijavabelia.

Pacuenia Jesúis itaxutoxaniavaeta bitso pitaxutotsécënaenë, apo petaenë tsiquirijavayo ata, yabara pelivaisi

22 Jesúis, pijajivi yajava, patajopa Betsaida tomarata. Nexata Jesúis tocanajetarubenatsi bitso pitaxutotsécënaenë, apo petaenë. Pinijicuenia vajècatsi Jesúis pitaxutojayatsinexa bajaraponë pitaxutoxanepanaenexa.

23 Nexata Jesúis cobepita. Barëpona pesaicaeyojavabelia, tomarapënëyabelia. Nexata bajarajotalia Jesúis peionitota itaxutoexaba. Itaxutojayata. Bajaraxuacujinae Jesúis yanijoba.

—¿Cacaëjëpa tsabaja netaejava? jai Jesúis.

24 Nexata bajaraponë naëcota. Jumaitsi:

—Taniji pebijivi pejinavanapaejava. Itsiata saya benetsita naejavänë, jai bajaraponë.

25 Nexata icatsia Jesúis itaxutojayata. Bajara jane xaniavaetsia naitaxutobabatsiaya naëcota. Itaxutoxanepana jane baja. Xaniavaetsia baja tane.

26 Nexata Jesúis jumaitsi bajaraponëjavabelia:

—Naviare nijaboyabelia. Pëtsa abaxë poname tomarabelia. Pëtsa paebame itsajivijavabelia ata pacuene caexanatsi, jai Jesúis.

Pacuenia Pedro jumaitsi Jesúsjavabelia: “¡Xamë raja Cristomë! jai yabara pelivaisi

(Mt 16.13-20; Lc 9.18-21)

27 Jesúis, pijajivi yajava, najetaruca. Pona pepatsinexa Cesarea de Filipovënë tomarajumaverena penaetomaraxijavabelia. Namutua abaxë penajetarubenaejavata Jesúis jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

28 Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Elíaspipinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvënënë icatsia asaë,” jai tsabiabi xamë yabara, jai Jesús pijajivi.

29 Nexata icatsia Jesús jumaitsi pijajivijavabelia.

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

Nexata Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi necapanepaenexa, jai Pedro Jesúsjavabelia.

30 Nexata Jesús pijajivijavabelia jumaitsi:

—Pëtsa bajarapacuenia itsajivijavabelia papae-bame. “Cristo raja,” pajamë pëtsa xanë yabara, jai Jesús.

*Pacuenia Jesús tajëvelia navajunupaeba
pebeyaxuabijavanexatsi yabara pelivaisi*

(Mt 16.21-28; Lc 9.22-27)

31 Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueniaje:

—Xanë, Daxitajivi Pematapijinënë, pinijicuenia beijobinë tsane. Judíovi pijaancianovi,

sacerdotevi penamatacaitorobivinua, judíovi pecujarubivinua, apo nejumecovënëtsi tsane Cristonécuenenë. Nexata bitso nebejiobiaexanaena. Bajaraxuacujinae nebeyaxuabiana. Itsiata baitsi jane tatëpaecujinae, acueyabi matacabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

32 Jesús jumenapebetsiaya pijajivi xaniavaetsia tsipaeba mapajumeje. Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaisi Jesúsjavabelia:

—Pëtsa bajarapacuenia cuaicuuijamë netëpaejavanexa yabara, jai Pedro Jesúsjavabelia.

33 Nexata Jesús Pedrovecua napënëyorotaxuuba. Taenuca pijajivi pena/javabelia. Nexata Jesús napënëyorotsia jumai tsanucae Pedrojavabelia:

—¡Dovathi, nevecuanatixire! Tsipaji xamë apo jitsipaemë pacuenia Dioso jitsipa taexanaenexa. Saya ejivi pacuenia jitsipa taexanaenexa, jitsipame, jai Jesús.

34 Nexata Jesús junata pijajivi, daxita jivibitsaëto yajava. Jumaisi bajarapamonaejavabelia:

—Pajivi jitsipa tanepënaponaejava, bajarapajivi copatsi pejitsipaecuenia pexanaenexa penajamatabëxainabiabijavami. Exanaponaponaetaitorobicuenia. Najamatabëcueneveretsinua beiobiaexanaejitsia atatsi, beyaxuabijitsia atatsinua, Dioso pejumelivaisi yabara piajamatabëcuenesaë tsaponaponaenexa. Nexata jane baja xuacujinae nepënaponena.

³⁵ Pajivi exanaponapona penatojitsipaecuenia, apo xainae tsane matacabí apo pevereverecaejava. Pajivi xanë tajamatabécueneta copata penatojitsipaecuenia pexanabiabijavami, jivi tacapanepaelivaisitanexa pejamatabécuenetanua, bajarapajivi xainaena matacabí apo pevereverecaejava.

³⁶ Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata mapanacuapijicueneje, itsiata nacuerata. Tsipaji pexainaecuene apo capanepae tsanetsi Diosojavabelia.

³⁷ Tsipaji acuenebi tsane itsajivi ata pematamotzinexa penaxuabiyana Diosovecua.

³⁸ Pajivi tajajivitonë ata, Dioso apo pejume covënëtsivi tuatuajéta, pibisiacuene pexanaevi tuatuajéta ata, navënélivaisicaura tsane xanë tajajivitonëcuene, tanejumecovënëtsijava ata yabara, nexata juya xanë bajarapajivi, tajajivitonë ata, tajajivitonëcuene vënélivaisicauranë tsane taxa Diosojavabelia. Bajarapajivi vënélivaisicauranë tsane pamatacabí icatsia patsianicajë. Baitsi pamatacabí xanë, Daxitajivi Pematapijinënë, ángelevi yajava, patsianicajë, pamatacabí yajavapatsianicajënuá taxa Dioso pijapenivenivenaecotia, jai Jesús pijajivjavabelia.

9

¹ Icatsia Jesús jumaitsi jivijavabelia:

—Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana pijajivi pevetsijava mapanacuataje. Nexata paxamëyajuvënëvi pepuatae tsane

Dioso petaxuxuabijava pijajivi pevetsijava mapanacuataje, tēpaena. Dioso raja pijajivi evetsiana pinijijamatabëcuenesaëta, jai Jesús jivijavabelia.

*Pacuenia Jesús caeepatoyo perabëñivenivenataba
yabara pelivaisi*
(Mt 17.1-13; Lc 9.28-36)

² Jesús petépaejavanexa tajëvelia penava-junupaebicujinae, seis pamatacabibejecujinae, Jesús pijajivi, acueyabi ponëbeje, barëpona pinijitsutoxanetojumabetsia. Jesús barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya pinijitsutoxanetojumabetsia. Nexata petsutojumatatsia Jesús perabëñivenivena bajarapamonae pitabarata.

³ Jesús penaxatatsijava bitso nivenivena. Bitso niojai. Mapanacuataje pexaniaquiatsiva ata apo caëjëpaetsi bajarapacuenia peniojaiyaexanaenexa.

⁴ Jesús pijajivi bajarajota tane jemata penaitajëtsijava bajayata petëpaenëmibeje, Elíaspiffinëbeje Moisëspiffinëbeje. Jesús barëcuacuajaitsti bajaraponëbeje. ⁵ Nexata Pedro jumaitsi Jesúsjavabelia mapacueniaje:

—¡Patatuxanenë, pijacuaxae panebarëponame! Pacatoexanaenatsi acueyabi pabobërëtobeje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro Jesúsjavabelia.

⁶ Bajarapacuenia Pedro jumaitsi Jesúsjavabelia canaëjëtsinejeva. Tsipaji bitso bajarapamonae na-

junaviaca. Nexata apo yapëtae pacuenia jumaitsijitsia.

⁷ Nexata daxita bajarapamonaе pematatsënëvetsica itarërëbo mataacataxuabatsi. Nexata bajarapamonaе jumetane bajara-paitarërëbojavavetsica Dioso pejumaitsijava.

—Mara ponë taxënato, tasivanëje. Panamuxunaevere bajaraponë, jaitsica Dioso Jesús pijajivijavabelia.

⁸ Bajarajota bajarapamonaе itsa naëcobarëcëpalia Jesúsjavabelia, ajibi baja bajaraponëbeje. Caenë baja Jesús nuca.

⁹ Nexata Jesús pijajivi itsa barërunanucaponaica petsutojumavetsica, jumeitaveta pijajivi. Jumaitsi pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinënë, icatsia asaënë tsane tatëpaecujinae, nexata jane baja matapania patsipaebianame, jai Jesús pijajivijavabelia.

¹⁰ Bajarapamonaе, acueyabi ponëbeje, jume covënëta pejumaitsicueniatsi. Itsiata épamonaе nayanijobabiaba.

—Jesús jumai tsabiabi: “Tatëpaecujinae icatsia asaënë tsane,” jai tsabiabi. ¿De tsamëra pajamatabëcuene xaina bajarapalivaisi? najai tsabiabi bajarapamonaе.

¹¹ Nexata Jesús pijajivi yanijoba Jesúsjavabelia. Jesús pijajivi jumaitsi:

—Patajatuxanenë, ¿detsa xuajitsia judíovi pecu-jarubivi jumai tsabiabi: “Bajayata ponëmi ponapona, Elíaspijkenë, petëpaecujinae icatsia asaë tsane. Bajaraponë copiata patsiana. Bajaraxuacujinae

patsiana Cristo, ponë Dioso athëbëvetsica itorobijitsiatsica pepo vajanacacapanepaenëneda jane baja,” jai tsabiabi? jai Jesús pijajivi Jesúsvababelia.

12 Nexata Jesús jumaitsi pijajivijavabelia:

—“Copiata Elíaspjinë patsiana. Nexata bajaraponë jamatabëcuexanetsiana daxitajivi,” itsa jai, Juanpijinëmi jivibautisabinëmi yabara jumaitsi. Nexata baja xaniajai pacuenia judíovi pecujarubivi jumaitsi. Tsipaji baja Juanpijinë tavajënaeya jivi jamatabëcuexanetanajetaruca. Xanë, Daxitajivi Pematapijinënë, athëbëvetsica Dioso nitoroba jivi tacapanepaeneda. Nexata xanë yabara tajëvelia Dioso pejumelivaisibaxutota jumaitsi mapacueniaje: “Bejiobi tsane pinijicuenia. Apo jitsipaetsi tsane. Naitaxutojematsianatsi,” jai xanë yabara tajëvelia Dioso pejumelivaisibaxutota, jai Jesús pijajivijavabelia.

13 Jesús icatsia jumaitsi pijajivijavabelia Juanpijinëmi yabara:

—Xaniajanë pacuenia pacatsipaebijitsiatsi. Elíaspjinë rabaja patajopa. Pepatsicujinae baja exanatsi daxita pacuenia jamatabëexanatsi. Nexata exanatsi pacuenia baja cajena Dioso pejumelivaisibaxutota tajëvelia jumaitsi bajaraponëmi yabara, jai Jesús pijajivijavabelia Juanpijinëmi yabara.

*Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi
(Mt 17.14-21; Lc 9.37-43)*

14 Jesús pijajivi, acueyabi ponëbeje, petsutojumabetsia pebarëponaecujinae, icatsia

barënaviatsica. Itsamonaे Jesùs pijajivi pepuenetsivijavabetsica, barënaviatsica. Nexata Jesùs tane pijajivi jivibitsaëtoxaneto pevajënae pematatoyoronaejavatsi. Jesùs tanenua judíovi pecujarubivi anaeya pejumenotsijavatsi Jesùs pijajivi.

¹⁵ Nexata bajarapamonaе itsa taerëcëpa Jesùs, daxita jamatabëcuenebarëyaya cujinaeyeca Jesùsjavabelia pebajacobinexatsi Jesùs.

¹⁶ Nexata Jesùs jumaitsi bajarapamonaejavelia:

—¿Detsa xua yabara panajumeanaenotame pinicuenia? jai Jesùs.

¹⁷ Caenë bajarapajivi bitsaëtoxanetoyajuvënënë jumaitsi Jesùsjavabelia:

—Jesùs, mara picani taxënatonëyo, dovathi peyajavaponaponaenëyo, catocanajetarucatsije. Maponëyoje dovathi apo netonatsipaebiaexanaetsi.

¹⁸ Itsa raja dovathi vaetababiabatsi, irata xuababiabatsi. Nexata bajarajota pecubothamu tsabiabi. Vonoquiraquirajainua tsabiabi. Daxitanëyo aperabëbaba tsatababiabireca. Picani raja nijajivijavabelia jumaitsinë: “Panetovecuacapitsapare dovathi,” janë. Itsiata bajarapamonaе apo caëjëpaetsi tanetovecuacapitsapaenexa, jai bajaraponë Jesùsjavabelia.

¹⁹ Jesùs nexata jumaitsi pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanaxa! Bajaraxuata apo pacajamatabëcueneçaëjëpae pejevaxinë panevecuacapitsapaenexa dovathi. ¿Detsa paepatojebi abaxë paxamëjavata ponaponaenajë?

¿Detsa paepatojebi abaxë paxamëjavabelia ajamatatabëcuenesaënë tsaponaponae tsane patanejumecovënëtsinexamë? Panetocarenamëre pejevaxinë, jai Jesús pijajivijavabelia.

20 Nexata tocarenatsi Jesús pejevaxinë. Dovathi itsa tanetsi Jesús, nexata icatsia bajarajota dovathi pejevaxinë t pajoneyaexanatsi. Irata xuabatsi pejevaxinë. Nexata pejevaxinë natorenaba irata. Pethamu pitsapa pecuibuatsina.

21 Nexata Jesús yanijoba pejevaxinë paxajavabelia.

—¿Detsa pamatacabibeje xaina petaxuxuobicujina naetsi mapacueneje? jai Jesús.

Nexata pejevaxinë paxa jumaitsi:

—Penacuetojavaveliacujinae cajena taxuxuabatsi.

22 Bajaya jebi picani isotojavalia dovathi netoxuababiabaliatsi. Menialia ata netoxuababiabaliatsi. Beyaxuabijitsiatsi bajarapacuenia. Xamë itsa cacaëj pa itsacuenia ata taneyavenonaenexam , ¡nitaxutotsoniataemal! ¡Neyavenonare! jai pejevaxinë paxa Jesúsjavabelia.

23 Nexata Jesús jumaitsi pejevaxinë paxajavabelia:

—Pajivi jumecov n ta Dioso peyavenonaejavanelxatsi, bajarapajivi Dioso yavenonatsi daxita xua namatavenona, jai Jesús.

24 Nexata pejevaxinë paxa a jai. Jumaitsi:

—¡Jumecov n taj  baja cajena! ¡Neyavenonare bitso orij bia tajumecov n tsinexa! jai bajarapon  Jesúsjavabelia.

25 Nexata Jesús itsa tane jivibitsaëtoxaneto penacaetuaponaejava Jesúsjavaberena, nexata Jesús itaveta dovathi. Jumaitsi:

—Dovathi, xamë pejevaxinë apo nenatsipaebi-aexanaenë. Apo nejumetaeyaexanaenëua. Xanë caitavetatsi. Pitsapare mapapejevaxinëvecuaje. Pëtsa baja icatsia junuame matavëjëa maponëyojavaberenaje, jai Jesús dovathijavabelia.

26 Nexata dovathi pejevaxinë icatsia aëjaiyaexanatsi. Tëpajoneyaexanatsi. Vecuapitsapatsi jane baja. Puenetabuatatsi bepetëpaenëyo. Nexata itsamonaе bajarajota jumaitsi:

—Pejevaxinë rabaja tëpa, jai bajarapamonae.

27 Nexata Jesús cobepita pejevaxinë. Cobevaetabiaya yotsina. Nexata pejevaxinë nonotabapuna.

28 Nexata xuacujinae Jesús boyá itsa joneya, Jesús pijajivi jumaitsi:

—¿Detsa xuajitsia meta paxanë apo panecaëjëpae patavecuacapitsapaenexa dovathi? jai Jesús pijajivi.

29 Nexata Jesús jumaitsi pijajivijavabelia:

—Mara paviria dovathije apo jitsipae pepitsapaejavaje. Matapania panexaejava apo paxaemë tsipae panevajëtsinexa asaëyata Diosojavabelia panecapitsapaenexa dovathi, pitsapaejisipa, jai Jesús pijajivijavabelia.

*Pacuenia icatsia Jesús tajëvelia navajunupaeba
pebeyaxuabijavanexatsiyabara pelivaisi*

(Mt 17.22-23; Lc 9.43-45)

30 Jesús pejevaxinë dovathi pevecuacapitsapae-cujinae, Jesús baja, pijajivi yajava, poná. Nexata

Jesús, pijajivi yajava, najetaruca Galilea nacuajava. Jesús jitsipa pijajivi pebarënajetarucaenexa bajaraxuayo itsajivi ata yapëtaenejevatsi.

³¹ Tsipaji Jesús pebeyaxuabijavanexatsi, tajëvelia navajunupaebapona pijajivijavabelia. Jumai tsaponae Jesús pijajivijavabelia mapacueniae:

—Xanë, Daxitajivi Pematapijinënë, necanajetsiana itsamonaec pecobeyabelia. Bajarapamonaec nebeyaxuabiana. Itsiata baitsi jane tanebeyaxuabicusinae, acueyabi matacabita, icatsia asaënë tsane, jai tsaponae Jesús pijajivijavabelia.

³² Itsiata pijajivi apo jumeyapëtaetsi. Bajarapamonaec ajumeura Jesúsjavabelia peyanijobinexa bajarapalivaisi yabara.

Pacuenia Jesús pijajivi: “¿Detsa ponë vaxaitisyajuvënë nacavecuaaya ijamatatabëcuenenë bitso?” najai tsanajetarubenaec yabara pelvaisi

(Mt 18.1-5; Lc 9.46-48)

³³ Jesús pijajivi barëpata Capernaum tomarata. Jesús pijajivi pebarëpatsicujinae, boyalia itsa barëjoneya Jesús, yanijoba pijajivijavabelia.

—¿Detsa pitsicuene yabara namutua bitso panajumenotanajetarubename? jai Jesús.

³⁴ Nexata Jesús pijajivi moy. Tsipaji Jesús pijajivi namutua najumaitsi tsanajetarubenaec:

—¿Detsa ponë vaxaitisyajuvënë nacavecuaaya ijamatatabëcuenenë bitso? najai tsanajetarubenaec Jesús pijajivi.

³⁵ Nexata Jesús eca. Junata pijajivi, doce ponëbeje. Jumaitisi pijajivijavabelia:

—Pajivi jitsipa ayaijamatabëcuenejivi penaexanaenexa daxitajivi matatoxenetsia, bajarapajivi beveliajamatabëcuenejivi natae peyavenonaenexa daxitajivi, jai Jesús pijajivijavabelia.

³⁶ Bajaraxuacujinae Jesús cobepita pejevaxinéyo. Pijajivi pitabarata nuteta. Bajaraxuacujinae Jesús isapita. Jumaitsi pijajivijavabelia:

³⁷ —Pajivi copiapita tanejumecovënëtsijiviyo, mapitsipejevaxinéyo ataje, xanë taniji tanecopiapitsijava. Pajivi necopiapita, ëxanë apo necopiapitsi. Ponë nitoroba, neyajavacopiapita, jai Jesús pijajivijavabelia.

Pacuenia Jesús jumaitsi pijajivijavabelia itsa vënëlivaisitane itsanë dovathi jivivecua pecapitsapaejava Jesús pevënëta yabara pelivaisi

(Mt 10.42; Lc 9.49-50)

³⁸ Jesús pijajivitonë, Juan, jumaitsi Jesúsjavabelia:

—Tajatuxanenë, pataniji itsanë nevënëta dovathi jivivecua pecapitsapaejava. Itsiata bajaraponë apo paxanëyajuvënë. Nexata paitavetajë bajaraponë dovathi jivivecua pecapitsapaponaejava, jai Juan.

³⁹ Nexata Jesús jumaitsi Juanjavabelia:

—Pëtsa paitavetame bajaraponë. Tsipaji raja pajivi pinijicuene pexanaejava exana tavënëta, bajaraxuacujinae acuenebi bajarapajivi tanebaranatsipaebinexa pibisiacuenia.

⁴⁰ Tsipaji raja pajivi pibisiacuene apo najamatabëxaina vaxaitsijavaberena, bajarapajivi nacajamatabëcueneyavenona. Bajarapajivi bevaxaitsijamatabëcuenejivi.

41 Xaniajanë pacuenia pacatsipaebijitsiatsi. Pajivi tsiquirijavayo ata mera pacarajutsiana paneapaenexa patajajivixaemë, bajarapajivi pepacuene Dioso matamotsianatsi mera papecarajutsimatamo, jai Jesús Juanjavabelia.

Pacuenia Jesús pijajivi muxuijoba itsajivi ata pibisiacuene pexanaeyaexanaeyaniva yabara pelivaisi

(Mt 18.6-9; Lc 17.1-2)

42 Icatsia Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejumecovënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuenia naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumecovënëtsivijavabelia, abaxë pibisiacuene exanaeyaexanaenejeva, bajarapajivi bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatuajëareca. Bajarapajivi bexuarecatsi bitso penaneconitsiyaniva Diosojavabelia pibisiacuene itsa exanaeyaexana tanejumecovënëtsiviyajuvënëvi.

43 Bajaraxuata panecobeta pibisiacuene itsa paexaname, panacobecaucure. Itsiata xanepana panejonenexa cobemataxucaeya apo pevereverecaenacuajavabelia. Biji rajane apo xanepanae tsipae panejonenexa infiernojavabelia anijacobebje yajava, itsajota isotocotia apo itaxupae caeto ata.

44 Bajarajota apo tëpae oro, jivivixaevi. Isotocotia ata apo itaxupae caeto ata.

45 Itsa panetaxuta ata pibisiacuene paexaname, panataxucaucure. Itsiata xanepana panejonenexa taxumataxucaeya apo pevereverecaenacuajavelia. Biji apo xanepanae tsipae panejonenexa infiernojavabelia anijataxubeje yajava.

46 Bajarajota apo tēpae oro, jivivixaevi. Isotocia ata apo itaxupae caeto ata.

47 Paneitaxutota ata panetaejava yabara pibisiacuene itsa paexaname, panaitaxutocajure. Itsiata xanepana panejonenexa pacaeitaxutojivimë apo pevereverecaenacuajavelia, Dioso pijanacuayabelia. Biji rabiji apo xanepanae tsipae panejonenexa anijataxutobeje yajava infiernojavabelia.

48 Bajarajota apo tēpae oro, jivivixaevi. Isotocia ata apo itaxupae caeto ata.

49 Dajubinë jivi itsa beyaxuaba Diosojavabelia ofrendacuenia pevi perajutsinexa, viexaba yajota pevixanepanaenexa. Bajara pijinia pacuenia pajamatabëcuenejanepanaenexa, daxita Dioso pijajivi ata jamatabëcueneëjëbianatsi mapanacuataje.

50 Yajo raja xanepana. Itsiata yajo pexaicaejavami itsa ajibi tsipae, apo xanepanae tsipae itsacuenejavayonexa ata. Bajara pijinia pacuenia paxamë ata pajamatabëcueneitsimë tsipae Diosojavabelia, itsa apo pavecupanepaemë tsipae papecajamatabëcuene ejëtaponaejava. Nexata pajamatabëcuenesaëmëre panejamatabëcuenejanepanaenexa Diosojavabelia. Pajinavanapare xaniavaetsia itsamonaejavabelia ata, jai Jesús pijajivijavabelia itsajivi ata Jesús pijajivi pibisiacuene pexanaeyaexanaeyaniva.

10

Pacuenia Jesús jivi livaisi tsipaeba penacojiobinë pijava pexuabiyanova yabara pelivaisi

(Mt 19.1-12; Lc 16.18)

¹ Jesús baja pona Capernaum tomaravecua. Pona Judea nacuayabelia. Bajaraxuacujinae Jordánmene itsapanabelia, paira, Jesús pona. Bajarajotalia icatsia jivibitsaëtoxaneto pata Jesúsjavaberena. Nexata icatsia Jesús livaisi tsipaeba bajarapamonae. Tcipaji baja cajena Jesús livaisi petsipaebanajetarucaenë.

² Nexata fariseovi Jesús cujibarenatsi petsipaebilivaisi yabara jamatabëcueneëjëbiaya peyanijobinexatsi. Nexata Jesús bijiaya itsa jumecanavata, neconitsijitsiatsi. Nexata fariseovi jumaitsi Jesúsjavabelia:

—¿Xanepana tsaja penacojiobinë pijava pexuabinexa? jai.

³ Jesús nexata jumaitsi fariseovijavabelia:

—¿Detsa pacuenia bajayata Moiséspijinë pacaitoroba panijavajivi panexuabiyanova? jai Jesús.

⁴ Nexata fariseovi jumaitsi Jesúsjavabelia:

—Moiséspijinë tocopata, ponë pijava jamatabëxuaba, pexuabinexa. Itsiata baitsi jane Moiséspijinë tocopata, ponë pijava xuabijitsia, copiaya petoyaquinaenexa cuyalatobaxuto pijavajavabelia. Nexata ponë pijava xuabijitsia, copiaya pijava toyaquinabiaba pitavetsilivaisi pexuabinexa jane baja pijava. Bajarapacuenia

pexanaenexa, ponë pijava jamatabëxuaba,
Moiséspijinë tocopata, jai fariseovi Jesúsjavabelia.

5 Nexata Jesús jumaitsi fariseovijavabelia:

—Moiséspijinë raja bajarapacuenia pacatocopata paneajamatabëcuenelivaisitajaxae.

6 Pamatacabi Dioso taxuxuaba nacua pexanaejava, bajarapamatacabita Dioso exana pebi, pijava yajava.

7 Bajaraxuata pebi itsa nacojioba pijavajavelia, banatsata paxavecua, pena atavecua.

8 Nexata Dioso tane anijajivimibeje becaeji. Nexata Dioso apo tae beanijajivibeje. Becaеjivi saya tane Dioso.

9 Bajaraxuata itsanë ata apo bexuabi pijava. Tsipaji Dioso pejamatabëcueneta napitsiaexanatsibeje, jai Jesús fariseovijavabelia.

10 Bajaraxuacujinae Jesús pijajivi pijaepto itsa barënacopata bota, nexata Jesús pijajivi yanijobatsi bajarapacuene yabara.

11 Nexata Jesús jumaitsi pijajivijavabelia:

—Ponë pijava pexuabicujinae, itsava icatsia itsa pita, bajaraponë pibisiacuene exana pevitota. Nexata nanconita Diosojavabelia. Tsipaji itsava jaita pepo pijavavecua. Dioso cajena abaxë bajaraponë pexuabiva pepo pijavacuenia totanetsi.

12 Bajara pijinia itsi petiriva ata pamona pevecuaniatsicujinae, itsanë icatsia itsa pitatsi. Bajarapova pibisiacuene exana pevitota. Nexata nanconita Diosojavabelia. Tsipaji itsanë jaita pepo pamonavecua, ponë abaxë Dioso totanetsi pamonacuenia, jai Jesús pijajivijavabelia.

*Pacuenia Jesús jumaitsi pejevaxijivixijavabelia
yabara pelivaisi
(Mt 19.13-15; Lc 18.15-17)*

13 Jesúsjavaberena itsamonaе pejevaxijivixi tocapataponatsi Jesús pejayataponaenexa pecobeta. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

14 Nexata Jesús itsa tane bajara-pacuenia pijajivi pejumaitsijava, Jesús jamatabécueneanaepanaxuareca. Jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanéjavaberena. Mapitsipejevaxijivixije jumeaebinejeva, xaniavaetsia bajumecovénëta palivaisi tsipaebatsi. Nexata pamonaе jitsipa pejonejava Dioso pijanacuayabetsia, bajara pijinia pacuenia jumeaebinejeva xaniavaetsia bejumecovénëta Dioso pejumelivaisi.

15 Xaniajanë pacuenia pacatsipaebijitsatsi. Mapitsipejevaxijivixije itsa jumecovénëta palivaisi tsipaebatsi, bajumecovénëta xaniavaetsia jumeaebinejeva. Bajara pijinia pacuenia jumeaebinejeva, xaniavaetsia bejumecovénëta Dioso pejumelivaisi pamonaе jitsipa pejonejava Dioso pijanacuayabetsia, jai Jesús pijajivijavabelia.

16 Nexata Jesús isapitapona pejevaxijivixi, caejiviyo canacujitsia. Pecobeta jayatapona. Jesús pejevaxijivixijavabelia jumai tsaponae:

—Dioso xaniavaetsia caevetsiana, jai tsaponae.

*Pacuenia pevëjëato, bitso pexainaenë, cuaicuajai Jesúsjavabelia yabara pelivaisi
(Mt 19.16-30; Lc 18.18-30)*

17 Pabota Jesú pejevaxijivixi isapitapona, bajarapabovetua itsajavabelia baja icatsia Jesú ponaejitsia. Nexata baja Jesú itsa naropotsiitsia, pevëjëato cujinaerucarena Jesújavaberena. Jesú pitabarata pematabacabëta nucajunua. Jumaitsi pevëjëato Jesújavabelia:

—Petuxanenë, pexaniajamatabëcuenenëmë. ¿Detsa pitsicuene bexanajë taxainaenexa matacabí apo pevereverecaejava? jai pevëjëato.

18 Nexata Jesú jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë.

19 Xamë baja yapëtaneme pacuenia Dioso pejumelivaisita itoroba jivi pejumecovënëtsinexa. Jumaitsi mapacueniaje: “Pëtsa jaitame itsava nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamona pexanaejava yabara najumetsënëtsiaya paebame. Pëtsa yamaxëitojorobiaya vecuapitame itsajivi pexainaeva. Axa yaiyataema. Ena ata yaiyataema,” jai Dioso pejumelivaisita. Xamë baja yapëtaneme bajarapalivaisi, jai Jesú pevëjëatojavabelia.

20 Nexata pevëjëato jumaitsi Jesújavabelia:

—Petuxanenë, daxita rabaja bajarapalivaisianë jumecovënëtajë pejevaxinëjavaveliacujinaenë, jai pevëjëato.

21 Nexata Jesú asivaya tane pevëjëato. Jumaitsi:

—Caejava raja catosaica nexanaenexa. Ponare necanajetsinexa daxita nexainaecuenemi. Bajarapamatamomi tsicobetsanaename bepejiobivi. Nexata bajarapacuenia xainaename bitso nexainaecuene Dioso pijanacuatatsia. Nexata najamatabëcueneverere, cabejiobiaexanae ata, cabeyaxuabijitsia atanua tajumelivaisi yabara, niajamatabëcuenesaë tsaponaponaenexa. Nexata jane baja xuacujinae nepënponaename, jai Jesús pevëjëatojavabelia.

22 Nexata pevëjëato itsa jumetane bajarapacuenia Jesús pejumaitsijava, najamatabëxainaeya baja vecuapona Jesús. Tsipaji pevëjëato daxitacuene bitso pexainaenë. Nexata pevëjëato apo jamatabëjumecovënëtsi palivaisi Jesús tsipaeba.

23 Nexata pevëjëato pecovëta Jesús pijajivi matayorotsia naëcota. Jumaitsi:

—Pamonae bitso daxitacuene pexainaevi, tsiayapëbejetsi penajamatabëcuene copatsinexa Diosojavabelia pecapanepaenexatsi Dioso pijanacuayabetsia! jai Jesús pijajivijavabelia.

24 Nexata Jesús pijajivi jamatabëcuenenabenajaca itsa jumetane bajarapacuenia Jesús pejumaitsijava. Nexata icatsia Jesús jumaitsi pijajivijavabelia:

—Tajamona, pamona bitso ëpexainaevanexa najamatabëxaina, bajarapamonae bitso tsiayapëbejetsi tsane pejonenexa taxa Dioso pijanacuayabetsia.

25 Pacuenia camello ayainëxae, acuenebi pejonejava palutaetoitaxutovojojotuala, bajara pijinia pacuenia bitso pexainaenë acuenebi tsane

pejonejava Dioso pijatomarabetsia. Tsipaji na-jamatabëxaina bitso ayaijava pexainaenexa, jai Jesús pijajivijavabelia.

²⁶ Jesús pijajivi itsa jumetane bajara-pacuenia Jesús pejumaitsijava, bitso jamatabëcuenenabenajaca. Nexata bajarapamonae jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexainaevi ata itsa apo panepae tsane Diosojavabelia? jai.

²⁷ Nexata Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caëjëpaetsi pijacuata penacapanepaenexa Diosojavabelia. Caenë Dioso caëjëpatsi jivi pecapanepaenexa. Dioso raja caëjëpatsi daxitacuene pexanaenexa, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxainaejavami. Nexata baja pacapënajinavanapatsi, jai Pedro.

²⁹ Nexata Jesús jumaitsi:

—Xaniajanë pacuenia pacatsipaebijitsiatsi. Pa-jivi xanë tajamatabëcuena, jivi tacapanepae-livaisitanexa pejamatabëcuenetanua, pueneta pi-jabomi, pematapijivi ata, pejuyapijivi ata, paxa ata, pena ata, pijava ata, pexi ata, pijapabianë ata, nexata bajarapajivi bitso ayaijava Dioso rajut-sianatsi pepuenetsijavanëmi matatoxenetsia.

³⁰ Caejavayomijamatabëcuene tsaponae, rajut-sianatsi mapanacuataje cien xuabeje tsaponae pevajënaeyabelia. Bajarapajivi icatsia xainaena bonë, pematapijivi ata, pejuyapijivi ata, pena

ata, pexi ata, pabianë ata. Itsiata bajarapajivi itoya tsanetsi mapanacuapijivije. Bejiobiaexan-abiabianatsinua. Itsiata baitsi jane bexëajavabelia xainaena matacabi apo peverevereceaeväja.

³¹ Pamonaæ aeconoxae mapamatacabitaje ayaijamatabëcuenevi tanetsi, bajarapamonae Dioso beveliajamatabëcuenevi exanaenatsi. Pamonaæ pijinia mapamatacabitaje beveliajamatabëcuenevi tanetsi, bajarapamonae Dioso ayaijamatabëcuenevi exanaenatsi, jai Jesùs pijajivijavabelia.

*Pacuenia icatsia Jesùs tajëvelia navajunupaeba
pebeyaxuabijavanexatsi yabara pelivaisi*

(Mt 20.17-19; Lc 18.31-34)

³² Jesùs, pijajivi yajava, najetaruca namutua. Pona Jerusalén tomarabelia. Jesùs pijajivi, pepënaponaevitsi, jamatabëcuenenabenajaca. Tsipaji Jesùs apo junavi bajarabelia peponaejava, yapëtae ata, pacuenia exanaejitsatsi Jerusalén tomarata. Nexata Jesùs icatsia junata pijajivi, doce ponëbeje, pesaicaeyojavabelia. Navajunupaeba tajëvelia pacuenia exanaejitsatsi Jerusalén tomarata.

³³ Jumaitsi Jesùs tajëvelia pijajivijavabelia:

—Panajumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinënë, sacerdotevi penamatacaitorobivi, judíovi pecujarubivinua, pecobeyabelia necanajetsiana tanevaetabinexa. Nexata xanë neneconitsiana tanebeyaxuabinexa. Bajaraxuacujinae icatsia necanajetsiana itsanacuaverena pepatsivi pecobeyabelia.

34 Bajarapamona necanecaponaena. Nesuabiana. Nejumatitibabena penaneconitsivi pejumacnitabiabimacata. Bajaráxuacujinae nebeyaxuabiana jane baja. Itsiata baitsi jane tanebeyaxuabicujinae, acueyabi matacabita, icatsia asaënëtsane, jai tajévelia pijajivijavabelia Jesús penavajunupaebijavata pebeyaxuabijavanexatsi.

*Pacuenia Santiagobeje Juanbeje vajëtabeje
Jesúsjavabelia pexaniacuene petoexanaenexatsibeje
yabara pelivaisi*

(Mt 20.20-28)

35 Zebedeo pexënatabeje, Santiagobeje Juanbeje, imoxoyolabeje Jesús. Jumaitsibeje Jesúsjavabelia:

—Patajatuxanenë, pacuenia
pacavajëtsijitsiatsibeje, bajarapacuenia
pajitsipajëbeje patanetoexanaenexamëbeje,
jaibeje Santiagobeje Juanbeje Jesúsjavabelia.

36 Nexata Jesús jumaitsi:

—¿Detsa pitsicuene pajitsipamebeje patacatoexanaenexabeje? jai.

37 Nexata Santiagobeje Juanbeje jumaitsibeje:

—Pamatacabi daxitacuene evetsianame, panetocopatsianamebeje patanaecaenexabeje nemuxuneneta vajanajuaevetsinexa. Itsanë naecaena necujuanenia. Itsanë naecaena netsavenonenia, jaibeje.

38 Nexata Jesús jumaitsi:

—Paxamëbeje apo payapëtaemëbeje xua
panevajëtamebeje. ¿Pacacaëjëpabeje tsaja
panenacaevetsinexabeje papecabejiobiaexanaenexabeje pacuenia xanë nacaevetsianajë
tanebejiobiaexanaenexa? ¿Pacacaëjëpabeje

tsaja panenacaevetsinexabeje papecabeyaxuabinexabeje pacuenia xanë nacaevetsianajëtanebeyaxuabinexa? jai Jesús pijajivitonëbejejavabelia.

39 Nexata Santiagobeje Juanbeje jumaitsibeje:

—Jäjä, panecaëjëpabeje cajena, jaibeje.

Nexata icatsia Jesús jumaitsi Santiagobeje Juanbejejavabelia:

—Paxamëbeje pacabeiobiaexanaenabeje pacuenia xanë nebejiobiaexanaena. Pacabeyaxuabianabejenua pacuenia xanë nebeyaxuabiana.

40 Itsiata baitsi jane xua panevajëtamebeje panenaecaenexabeje, itsanë tacujuanenia, itsanë tatsavenonenia, bajaraxua Dioso apo netocopatsipatacatocopatsinexabeje. Tsipaji raja taxa Dioso ëpitapetsivinexa abaxë bajaraxua toxaniavaeta, jai Jesús Santiagobeje Juanbejejavabelia.

41 Diez ponëbeje, Jesús pijajivi, itsa vënëtane pepëya bajaraxua Santiagobeje Juanbeje Jesúsjavabelia pevajëcaejavabeje, nexata bajarapamonae jamatabëcuenebaraanaepana Santiagobeje Juanbejejavabelia.

42 Nexata Jesús daxita pijajivi junata. Jesús jumaitsi pijajivijavabelia:

—Payapëtaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamonae jinavanapa pevetsinacuanëjava. Nexata bajarapanacuanë pevetsivi ayaijamatabëcuenevi nataeyabiaba. Xua jamatabëitoroba pevetsinacuanëjava pejinavanapaevi petoexanaenexatsi, ajumesaëya itorobabiaba petoexanaenexatsi.

43 Pëtsa paxamë bajarapamonae cuenejëpaeya bajarapacuenia paexaname itsamonaejavabelia. Biji rajane ponë paxamëyajuvënënë jitsipa ayajamatabëcuenenë penaexanaenexa daxita paxamëvecua, bajaraponë daxita paxamë bepanijajivitonëcuenia bepacayavenonabiaba.

44 Ponë paxamëyajuvënënë jitsipa penaexanaenexa papecanamatacaitorobinënexa, bajaraponë daxita paxamë bepanijajivitonëcuenia bepacayavenonabiaba.

45 Tsipaji rabaja xanë ata, Daxitajivi Pematapijinë atanë, apo patajopaenë jivi taneyavenonaenexa. Biji rajane xanë patajopajë tayavenonaenexa daxitajivi. Patajopajë tasi-vatëpaenexa jivi ayaibitsaëtoxaneto pibisiacuene pexanaeneconimi taneconimatamotsinexa, jai Jesús pijajivijavabelia.

Pacuenia Jesús itaxutoxanepanaeyaexana Bartimeo, bitso pitaxutotsécënaenë, apo petaenë, yabara pelivaisi

(Mt 20.29-34; Lc 18.35-43)

46 Jesús, pijajivi yajava, pata Jericó tomara-belia. Jesús icatsia, pijajivi yajava, itsamonaenua ayaibitsaëtoxaneto yajava, pitsapa Jericó tomar-avecua. Nexata Bartimeo vënënë, Timeo pexënato, eca namuto muxuneneta. Bartimeo, bitso pitaxutotsécënaenë, apo petaenë. Jivijavabelia amoneya palata pevajëcabia binë.

47 Nexata Bartimeo itsa jumetane Nazaret tomarapijinë Jesús imoxoyo penajetarucaejava, vavajai tsecae.

—¡Jesús, Davidpijinë pemomomë, nitaxutotsoniataema! jai tsecae Bartimeo.

48 Nexata picani itsamonaе jumeitavetatsi Bartimeo pemoyanexa. Itsiata bitsoyo orijibia vava-jai tsecae.

—¡Davidpijinë pemomomë, nitaxutotsoniataema! jai tsecae Jesúsjavabelia.

49 Nexata Jesús muxunanucojopa. Jumaitsi jiv/javabelia:

—Pajunaremene bajaraponë, jai.

Nexata bajarapamonae junarena Bartimeo. Pe-junatsivirena jumaitsi Bartimeojavabelia:

—Najamatatabësaëtaxuare. Nonotapunare. Jesús raja cajunarena, jai bajarapamonae.

50 Nexata Bartimeo penajumaxuabipana xu-abapuna. Bepijia najetabarena Jesúsjavaberena.

51 Nexata Jesús yanijoba Bartimeojavabelia.

—¿Detsa xua jitsipame tacaexanaenexa? jai Jesús.

Nexata Bartimeo bitsо pitaxutotsécënaenë, ju-maitsi Jesúsjavabelia:

—Jesús, jitsipajë taitaxutoxanepanaejava, jai.

52 Nexata Jesús jumaitsi:

—Ponare baja. Nesivajamatabëjumaitsimë: “Jesús nitaxutoxanepanaeyaexanaena,” nesiva-jamatabëjamë. Bajaraxuata itaxutoxanepaname baja, jai Jesús Bartimeojavabelia.

Bajarapacuenia Jesús pejumaitsovata, Bartimeo baja xaniavaetsia tane. Nexata baja bajara-ponë Jesús pepëta napona.

11

Pacuenia Jesús pata Jerusalén tomarata yabara pelivaisi

(Mt 21.1-11; Lc 19.28-40; Jn 12.12-19)

¹ Jesú斯 baja pijajivi barëimoxoyotanajetaruca Jerusaléntomara. Barëpata baja Betfagé tomarayobeje Betania tomarayobeje muxuneneta. Itsajota petsutojumata nubena olivonaenë, bajarajota Jesú斯 barëpata. Bajarajota pebarëpatsicujinae Jesú斯 itoroba anijanëbeje pijajivitonëbeje.

² Jesú斯 jumaitsi pijajivitonëbejejavabelia mapacueniaje:

—Paponarebeje mapatomarayo ecalia-jejavabelia. Ajena papatsiaremeliaabeje, pataenutsianamebeje burro, pecëtanutsinëtsi. Bajarapaburro itsajivi ata abaxë apo jumaponae. Paisinaenamebeje. Payamaëcarenamëbeje tsane.

³ “¿Detsa xuajitsia paisinamebeje burro?” itsa pacajaibeje tsane itsajivi, nexata pajumaitsimëbeje tsane: “Vajatuxanenë raja namatavenona. Aeconoxae raja icatsia canaviatsiarena,” pajamëbeje tsane, jai Jesú斯 pijajivitonëbejejavabelia.

⁴ Nexata Jesú斯 pijajivitonëbeje liabeje. Caxitajarabanutabeje burro baupa muxuneneta. Cëtanutatsi burro namuto muxuneneta. Nexata bajaraponëbeje burro isinabeje.

⁵ Nexata bajarajota pejinavanapaevi yanijobatisbeje.

—¿Detsa xuajitsia paisinamebeje burro? jaitsi-beje.

6 Nexata bajaraponëbeje jumaitsibeje pacuenia
baja Jesús itorobatsibeje. Nexata tocopatatsibeje
pecaponaenexabeje.

7 Nexata jane baja burro capatabeje
Jesúsjavaberena. Nexata Jesús pijajivi
pijacamisajumavelia penaxatabijavanë burro
tsijumajeba. Bajarapajumata Jesús ecaya.

8 Jesús penajetarucaenamutojavarena jivi
ayaubitsaëtoxaneto pijacamisajumavelia penax-
atabijavanë namutua tsivajënaeyerequejebaponatsi.
Itsamonaе naemaxërananë, pebaxu ya-
java, ucubaba. Nexata namutua Jesús
tsivajënaeitabëtsiaya jebaponatsi yaiyataeya Jesús
pecopiapitsinexatsi.

9 Jesús penajetarucaejavata jivi ayaibit-
saëtoxaneto Jesús pevajënaeya namataxainaeya
najetarubena. Itsabitsaëtoxaneto Jesús
pecovëya cotocaevanajetarubena. Daxita
bajarapamonae vavajai tsanajetarubenae. Jumai
tsanajetarubenae:

—¡Dioso yavenonaenatsi maponë najetaruaje!
¡Vajatuxanenë pejamatabëcueneta najetaruca!

10 ¡Dioso yavenonaenatsi maponë najetaruaje
nacua pevetsinënexas! ¡Pacuenia bajayata
vajasalinainëmi Davidpijinëmi nacua eveta,
bajarapacuenia evetsijitsia! ¡Nexata vaxaitsi
pexaniajamatabëcuene rajutatsi Diosojavabelia!
jai tsanajetarubenae bajarapamonae.

11 Nexata jane baja Jesús patajopa Jerusalén
tomarata. Templobojavalia joneya. Nexata Jesús
templobota naitaxutocaeveta, pacuene jivi exana
templobota, petaenexa. Nexata baja Jesús pepu-
atae pacuene jivi exana templobota, Jesús baja

icatsia pona. Naviata abaxë Betania tomara-belia pijajivi, doce ponëbeje, yajava. Tsipaji baja caniviyotsia.

Pacuenia Jesús bijataenuta higueranae piacuai-jibixae yabara pelivaisi

(Mt 21.18-19)

¹² Jesùs pijajivi barëmajita Betania tomarata. Nexata bajayacunua Jesùs icatsia pijajivi barëlia Jerusalén tomarabelia. Nexata Jesùs namutua penajetarucaejavata, piajani.

¹³ Jesùs namutovecua tajiyotalia higueranae yabaxua taenuta. Nexata Jesùs taeyojopalia bajaraponae pecuai perubenaejava. Itsa Jesùs pata bajaraponaejavabelia, ëpebaxu saya tsanucae. Tsipaji cajena abaxë apo penacuaitsimatacabí.

¹⁴ Nexata Jesùs jumaitsi higueranaejavabelia:

—Itsajivi ata apo cacuaixae tsane matavëjëa, jai Jesùs.

Nexata pijajivi jumetanetsi bajarapacuenia Jesùs pejumaitsijava higueranaejavabelia.

Pacuenia Jesús Jerusalén tomarata templobove-cua pitsapaeyaexana pecanajetabiabivi, pecomua-cabiabivinua, yabara pelivaisi

(Mt 21.12-17; Lc 19.45-48; Jn 2.13-22)

¹⁵ Jesùs, pijajivi yajava, pata Jerusalén tomarata. Nexata Jesùs joneya temploboyalia. Nexata templobota Jesùs tane pecanajetabiabivi, pecomuacaevinua. Nexata daxita bajarapamonae Jesùs pitsapaeyaexana templobovecua. Palata pecambiababiabivi ata pijamesanëmi Jesùs topënëyorobajaraba. Ucucu pecanajetabiabivi ata penabiabijavanëminua topënëyorobajaraba.

16 Jesú斯 apo tocopatsi itsajivi ata itsacuenejava pecaponaenexa templobojava.

17 Jesú斯 livaisi tsipaeba. Jumaitsi bajarajota pepatsivijavabelia:

—Dioso baja cajena pejumelivaisibaxutota mapatemplobo yabara tajévelia jumaitsi mapacueniaje: “Tajabo raja daxitanacuanépíjivi xanéjavaberena penavajécaebo tsane,” jai Dioso pejumaitisijava Dioso pejumelivaisibaxutota. Itsita baitsi jane paxamë yamaxéitojorobiaya panenacobetoxotsinexa panacaetuatabiabame mapabotaje, jai Jesú斯 templobota pecanajetabi-abivijavabelia.

18 Sacerdotevi penamatacaitorobivi, judíovi pecujarubivinua, jumetane daxita pacuenia Jesú斯 exana jivijavabelia templobota. Nexata bajarapamonae najumejaita pacuenia Jesú斯 beyaxuabijitsatsi. Bajarapamonae cujunavatsi Jesú斯. Tsipaji daxitajivi jamatabécuenenabenajaca Jesú斯 petsipaebilivaisi yabara.

19 Ajena baja meravitsia, Jesú斯 yajavapona pijajivi Jerusalén tomaravecua.

*Pacuenia higueranae tēpanuca yabara pelivaisi
(Mt 21.20-22)*

20 Jesú斯 pijajivi barémajita Betania tomarata. Nexata bajayacunua Jesú斯 icatsia, pijajivi ya-ja, najeteruca pecovénamutua. Bajarapamonae taenuta higueranae baja petépanucaejava daxita yatabutopaya.

21 Nexata Pedro najamatabénapita higueranae Jesú斯 pebijataenutsijava. Nexata Pedro jumaitsi Jesú斯javabelia:

—Tajatuxanenë, jica, taema. Ponae higueranae bijataenutame, tēpanuca baja. ¿Detsa meta pacuenia tēpa baja? jai Pedro.

22 Nexata Jesús jumaitsi pijajivijavabelia:

—Paxamë bitso pajumecovënëre Dioso papecatoexanaenexa pacuenia pavajëtame.

23 Xaniajanë pacuenia pacatsipaebijitsatsi. Itsa pajamatatabëjumaitsimë tsipae Dioso yabara: “Dioso nejumecovënëtsiana xua vajëtsianajë Diosojavabelia,” itsa pajamatatabëjamë tsipae, pacajumecovënëtsipa mapatsuto ataje. Nexata itsa pajumaitsimë tsipae mapatsutojavabeliae: “Natixire majotavecuaje. Pucaxanetojavabelia jopare,” itsa pajamë tsipae, pacajumecovënëtsipa. Nexata mapatsuto ataje paneitorobicuenia, pacajumecovënëtsipa. Itsa pajumecovënëtsianame Dioso papecatoexanaejavanexa, itsa panajamatatabëxainaenamenua Dioso ëpapecajumecovënëtsijavanexa, xua pavajëtsianame Diosojavabelia, Dioso pacajumecovënëtsiana.

24 Bajaraxuata pacajumaitsitsi. Daxita xua pavajëtsianame Diosojavabelia, pasivajamatatabëjumaitsimë tsane: “Xua vajëtajë Diosojavabelia, pepacuene Dioso nejumecovënëtsiana,” pasivajamatatabëjamëre. Nexata xua pavajëtsianame Diosojavabelia, Dioso pacajumecovënëtsiana.

25 Itsajivi pibisiaciune papecalexanaejava, pajamatatabëcuene caevare panevajëtsijavata Diosojavabelia. Nexata pabarajamatatabëcuenexanepanare bajarapajivi. Nexata pijinia paneaxa, athëbëtatsia peecaenë, jamatabëcuene caeviana paxamë ata pitabarata pibisiaciune paneexanaejava.

26 Paxamë itsa apo pajamatabëcuene caevimë tsane itsanë pibisiacuene papecaxanaejava, itsa apo pabarajamatabëcuene xanepanaemënua tsane, nexata pijinia paneaxa, athëbëtatsia peecaenë, apo jamatabëcuene caevi tsane paxamë pitabarata pibisiacuene paneexanaejava. Apo pacabarajamatabëcuene xanepanaenua tsane, jai Jesús pijajivijavelia.

*Pacuenia Jesús caëjëpatsi daxitacuene pexanaenexa yabara pelivaisi
(Mt 21.23-27; Lc 20.1-8)*

27 Jesús, pijajivi yajava, pata Jerusalén tomarata. Jesús itsa ponapona templobota, nexata sacerdotevi penamatacaitorobivi, judíovi pecujarubivinua, judíovi pijaancianovinua, parena Jesúsjavaberena.

28 Nexata bajarapamonae jumaitsi Jesúsjavabelia:

—¿Jipatsa pejamatabëcuena pecanajetabiabivi, pecomuacaevinua, capitsapame mapatemplobovecuaje? jai bajarapamonae Jesúsjavabelia.

29 Nexata Jesús jumaitsi bajarapamonaejavabelia:

—Xanë copiaya caejumeyo pacayanijobianatsi. Itsa paxamë panejumecaviatsianame, nexata xanë juya pacatsipaebianatsi ponë nitoroba taexanaenexa bajarapacuene.

30 ¿Jipatsa jane pejamatabëcuena Juanpijinë jivi bautisabaponapona? ¿Dioso tsaja pejamatabëcuena? Itsa jume, ¿jivi tsaja pejamatabëcuena? Panejumecanaviare baitsi jane, jai Jesús bajarapamonaejavabelia.

31 Nexata ëpamonae nabarëcuaicuajai. Naju-maitisi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabëcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilivaisi?” nacajai tsipae.

32 “Jivi raja saya pejamatabëcueneta Juanpijinë jivi bautisabaponapona,” acuenebi vajajaijava. Tsipaji mapatomarapijivije ayaubitsaëtoxaneto Juanpijinë yabara sivajamatabëjumaitisi: “Juanpijinë raja pepacuene Diosojumepaebinëmi,” sivajamatabëjai. Nexata bajarapamonae nacabeyejebijitsipa, najai Jesús peyanjobivitsi.

33 Nexata saya bajarapamonae jumaitsi Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarapacuene, jai Jesús.

12

*Pacuenia exana pijamatabëcuenebejevi, itsanë pijauvabacabo petoevetsivi, yabara pelivaisi
(Mt 21.33-46; Lc 20.9-19)*

¹ Jesús livaisi tsipaeba sacerdotevi penamatacaitorobivijavabelia, judíovi pecujarubivijavabelia ata, judíovi pijsancianovijavabelia ata. Jumaitsi mapacueniaje:

—Pijaira pexainaenë pijairata uba ayaibacabox-aneto uvavënëjava. Bajaraxuacujinae pijaira matatoyerotsia ibopanaxanetonë mataropotsia pefaratsijavata yacaranata. Bajarapayacaranatsijava athëbëabetsia apia jivitonë matatoxenetsia. Bajaraxuacujinae irata mëthë cueyeta. Nexata pecueyetsimëthëjavata exana uvacuaibarëmene pecayujucabiabajanexa. Bajaraxuacujinae pijauvabacabo tuatuajëta exananuta piapiabotsia, penacuaitsimatocabi itsa tonaveretatsi, athëbëyo pevetabiabecaenexa pijauvabacabo. Nexata bajaraponë itsamonaevetsiaexana pijauvabacabo. Uvabacabo pexainaenë jumaitsi petoevetsivitsijavabelia: “Pamatocabi cuainaveretsiana, natsicobetsatsianatsi. Patamacabi raja cuainaveretsiana, tajajivitonë itorobiarenajë xua panetotsatsianame tanetopitsinexa,” jai uvabacabo pexainaenë petoevetsivitsijavabelia. Nexata uvabacabo pexainaenë tajë nacuayabelia pona.

² Itsa baja uvabacabo pexainaenë yapëtane pecapiapatsijava uvacuai penaveretsimatocabi penotsinexa, nexata uvabacabo pexainaenë itoroba pijajivitonë. Itoroba petoevetsivitsijavabelia petsicobetsatsinexatsi.

³ Nexata uvabacabo pexainaenë pijajivitonë tovaetabatsi. Toconibabiatsi. Petoconibabecuji-naetsi cobesa naviatsiaexanaliatsi.

⁴ Itsia uvabacabo pexainaenë icatsia itoroba itsanë pijajivitonë petsicobetsatsinexatsi. Bajaraponë ata icatsia tomatajorobiaxuabatsi. Pibisi-acuenia tobijatanetsi.

⁵ Itsia icatsia uvabacabo pexainaenë itoroba

itsanë pijajivitonë. Bajaraponë jane baja tobeyaxuabatsi. Bajaraxuacujinae abaxë icatsia uvabacabo pexainaenë itoroba itsamona. Bajarapamonaeayajuvënëvi itsamona totsaquibabatisi. Itsamona tobeyejebatsi.

⁶ Abaxë uvabacabo pexainaenë icatsia pitorobinexa, caenë tonacopatatsi. Pexënato bitso piasivanë. Nexata jane baja uvabacabo pexainaenë pexënato icatsia itoroba. Uvabacabo pexainaenë jamatabëjumaitsi: “Tajauvabacabo tanetoevetsivi tajajivi apo netoyaiyatae ata, itsiata meta taxënato netoyaiyataena,” jamatabëjai uvabacabo pexainaenë.

⁷ Itsiata uvabacabo petoevetsivitsi uvabacabo pexainaenë pexënato ata, apo toyaiyataetsi. Itsa tane uvabacabo pexainaenë pexënato, bajarapamonae najumaitsi: “Mara ponëje paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi.

⁸ Nexata icatsia uvabacabo pexainaenë pexënato ata tovaetabatsi. Icatsia pexënato ata tobeyaxuabatsi. Petëpaenë xuabatsi bajarapauvabacabo pënëyabelia, jai Jesús sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata.

⁹ Icatsia Jesús jumaitsi bajarapamonaejavabelia:

—¿De meta nexata xua exanaena uvabacabo pexainaenë pijauvabacabo petoevetsivitsijavabelia? Uvabacabo raja

pexainaenë patsiarena. Verebiabiana daxita bajarapamonaemi. Nexata icatsia itsamonaevetsiaexanaena bajarapauvabacabo, jai Jesús bajarapamonaejavelia.

10 Icatsia Jesús jumaitsi:

—Payapētaneme rabaja pacuenia Dioso pejumelivaisibaxutota tajévelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonaebøjexaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia.

11 Vajatuxanenë Dioso raja exanaena bajarapacuene. Nexata nacatsita pexaniacuene bitso tsane bajarapacuene,

jai tajévelia Dioso pejumelivaisibaxutota xanë yabara.

Bajarapacuenia tajévelia Dioso pejumelivaisibaxutota itsa jumaitsi, paxamë apo patanejumecovënëtsijavanexamë yabara jumaitsi. Dioso taneitapetsijava daxitajivi tacapanepaenexa yabara ata jumaitsi, jai Jesús bajarapamonaejavelia.

12 Bajarapamonaebøjexaevi Jesús ja-matabëvaetabatsi. Tsipaji bajarapamonaejumeyapētanetsi Jesús pejumaitsijava bajarapamonaevabara. Itsiata abaxë apo vaetabitsi. Tsipaji cujunava jivi. Nexata baja Jesús bajarapamonaevacuapona.

*Pacuenia Jesús jamatabëcueneëjëbiaya
yanijobatsi impuestomatamo pemamatotsijava
yabara pelivaisi*

(Mt 22.15-22; Lc 20.20-26)

¹³ Fariseoviyajuvënëvi, Herodes pijajiviya-juvënëvinua, najetarubena Jesúsjavaberena. Bajarapamonae pevetsivitsi itorobatsi livaisi peyanijobinexatsi Jesús. Nexata Jesús bajarapamonae bijiaya itsa jumecanaviata, peneconitsinexatsi picani nacuaevertsinëjavabelia.

¹⁴ Nexata bajarapamonae pata Jesúsjavaberena. Bajarapamonae jamatabëcueneëjëbiaya jumaitsi Jesúsjavabelia:

—Jesús, payapëtanji cajena nexaniajaicuene, xua yabara tsipaebabiabame livaisianë. Petux-anevi ata xamë apo cujunavimë. Apo auramë livaisi netsipaebabiabijava. Nexata daxitajivi najëpaeya livaisi tsipaebabiabame. Pexaniajailivaisi tsipaebabiabame pacuenia Dioso jitsipa jivi pejinavanapaenexa. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcueneëjëbiaya Jesúsjavabelia.

¹⁵ Itsiata baitsi jane Jesús jamatabëcuneyapëtane bajarapamonae jamatabëcueneëjëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—¿Detsa xuajitsia jamatabëcueneëjëbiaya paneyanijobame? Panetocarenamëre palatanëyo. Taejitsianë, jai Jesús.

16 Nexata bajarapamonae Jesús tocaponarenatsi palatanëyo. Nexata Jesús jumaitsi bajarapamonaejavelia:

—¿Jipatsa mapitabaraje, pevënënu, ruca mapalatanëyotaje? jai Jesús.

Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënu, jai.

17 Nexata Jesús jumaitsi bajarapamonaejavelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

Nexata Jesús itsa jumecanaviata bajarapacuenia, bajarapamonae jamatabëcuenenabenajaca bajarapacuenia Jesús pejumaitsijavata. Nexata bajarapamonae jamatabëjumaitsi:

—¡Xaniavaetsia baja rovia Jesús panejumecanavata! jamatabëjai.

*Pacuenia Jesús tsipaeba jivi petëpaecujinae icatsia
piasaëjavanexa yabara pelivaisi*

(Mt 22.23-33; Lc 20.27-40)

18 Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi jumaitsi Jesúsjavabelia mapacueniaje:

19 —Jesús, Moiséspijinë bajayata vajanacatoyaquinalivaisi, jumaitsi mapacueniaje: “Ponë pematapijinë pepua penacojobinë baja, totëpatsi

pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi," jai Moiséspijinë bajayata vajanacatoy aquinaelivaisi.

²⁰ Nexata jinavanapa ënacaemonae siete ponëbeje. Pepo matapijinë copiaya nacojoba. Nexata bajaraponë pijava vecuatëpa pexi xainaenejeva.

²¹ Nexata pematapijinëmi pepënarucaenë pita pematapijinëmi pijavami. Nexata icatsia bajaraponë ata tēpa pexi xainaenejeva bajarapovajavabelia. Nexata icatsia itsanë tuatuajëmatapijinë pita bajarapova. Bajaraponë ata icatsia tēpa pexi xainaenejeva bajarapovajavabelia.

²² Bajarapacuenia tēpa daxita siete ponëmibeje nacaemonae, bajarapova pepitaponaevi. Itsiata itsanë ata pexi apo xainae bajarapovajavabelia. Bajaraxuacujinae belia bajarapova ata tēpa baja.

²³ "Jivi raja petëpaecujinae, Dioso icatsia asaëyaexanaenatsi," jamë. ¿Detsa nexata ponë, bajarapamonaeyajuvënënë, pijava tsane bajarapova bajarapamatocabi? Daxita pamonaesiete ponëmibeje, nacaemonae, pitapona picani bajarapovami, jai saduceovi Jesúsjavabelia.

²⁴ Nexata Jesús jumaitsi saduceovijavabelia:
—Paxamë saya pajamatabëcuenenavëxaniabame. Paxamë raja apo payapëtaemë pacuenia Dioso pejumelivaisibaxutota jumaitsi. Apo payapëtaemëna pacuenia Dioso caëjëpatsi daxitacuene pexanaenexa. Bajaraxuata

jamatabëcuenenavëxaniabiaya paneyanijobame:
“¿Detsa ponë pitsiana bajarapova?” panejamë.

25 Pamatacabi raja petëpaevimi Dioso icatsia asaëyaexanaenatsi, apo nacojiobi baja tsane. Bajarapamatacabita itsajivi ata pexënatoyo apo canajetsi tsane pebijavabelia petonacojobinexatsi. Bajarapamonae nacojiobinejeva, jinavanapaena athëbëtatsia pacuenia ángelevi jinavanapa.

26 Itsa pepacuene paxamë paneyanijobame Dioso icatsia piasaëyaexanaejavanexatsi petëpaevimi, nexata pacatsipaebianatsi. Paxamë rabaja payapëtaneme pacuenia bajayata Moiséspijinë peyaquinaebaxutota jumaitsi. Bajarapabaxutota jumaitsi pacuenia Moiséspijinë Dioso barëcuaicuajaiti tsiquirinaemëyo petajueyecaecotiajavaverena. Abraham baja pepuatëpae, Isaac ata baja pepuatëpae, Jacob ata baja pepuatëpae, bajarapamonae yabara bajayata Dioso jumaitsi Moiséspijinëjavabelia mapacueniae: “Xanë rabaja abaxë Abraham pijadiosonë, Isaac ata pijadiosonë, Jacob ata pijadiosonë,” jai Dioso Moiséspijinëjavabelia bajayata petëpaevimi yabara.

27 Bajarapacuenia Dioso pejumaitsixaet, nayapëtane bajarapamonae bajayata tëpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athëbëtatsia. Nexata paxamë itsa pajumaitsimë: “Petëpaevi rabaja petëpaecujinae, icatsia apo asaë tsane,” itsa pajamë, pinijicuenia pajamatatabëcuenenavëxaniabame, jai Jesús saduceovijavabelia.

*Palivaisi bitso jivi bejumecovënëta daxita
Dioso pitorobilivaisianë pejumecovënëtsijava
matatoxenetsia yabara pelivaisi
(Mt 22.34-40)*

28 Judíovi pecujarubinë pata Jesúsjavaberena. Nexata bajaraponë Jesús jumetanetsi xaniavaetsia pejumecanaviataponaejava saduceovijavabelia. Nexata judíovi pecujarubinë jumaitsi Jesúsjavabelia:

—¿Detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

29 Jesús nexata jumaitsi judíovi pecujarubinëjavabelia:

—Palivaisi bitso jivi bejumecovënëta, daxita Dioso pitorobilivaisianë pejumecovënëtsijava matatoxenetsia jumaitsi mapacueniaje: “Paxamë, Israelpijinë papemomoximë, pajumetaema. Vajatuxanenë rabaja caenë Dioso.

30 Bajaraponë panijatuxanenë, panijaDioso, daxita panejamatabëéthëtojavavetsina pasivamëre. Pasivamëre daxita panejamatabëcueneta ata, daxita panenajamatabëxainaesaëta ata, daxita panesaëta ata,” pejailvaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia.

31 Bajaraxuacujinae pecotocaevilvaisi, palivaisi bitso jivi bejumecovënëta, jumaitsi icatsia mapacueniaje: “Pasivamëre itsajivi ata pacuenia paxamë panijacuata panaasivamë,” jai. Bajarapalivaisi ata jivi bitso bejumecovënëta.

Ajibi rabaja itsalivaisi pematatsënëa, Dioso pitorobilivaisi, palivaisi bitso jivi bejumecovënëta,” jai Jesús judíovi pecujarubinéjavabelia.

32 Nexata icatsia judíovi pecujarubiné jumaitsi Jesúsjavabelia:

—Jesús, xaniajamë rabaja pacuenia jumaitsimë. Caenë tsaena Dioso ponapona. Ajibi tsaena pematatsënëa itsanë Dioso.

33 Bejumecovënëtatsi Dioso daxita vajamatabëëthëtojavavetsina, daxita vajanajamatabëxainaesaëta ata, daxita vajasaëta ata. Biasivatsi itsajivi ata pacuenia vaxaitsi vajacuata nasivatsi. Daxita bajaraxua itsa jumecovënëtatsi, bitso nacatonamatamota Diosojavabelia. Bajaraxua bitso nacatonamatamota ofrenda Diosojavabelia vajarajutabiabijava matatoxenetsia. Baitsi xua Diosonexa ofrendacuenia totajuitabiabatsi, dajubicuene itsa tobeyabiabatsi, bajaraxua matatoxenetsia bitso nacatonamatamota, jai judíovi pecujarubiné Jesúsjavabelia.

34 Jesús itsa jumetane judíovi pecujarubiné xaniavaetsia pejumecanaviatsijavatsi, nexata Jesús jumaitsi judíovi pecujarubinéjavabelia:

—Tsiquirijavayo catosaica Diosojavabelia nenajamatabëcuenecopatsinexa nijatuxanenë Dioso nexanaenexa, jai Jesús judíovi pecujarubinéjavabelia.

Bajaraxuacujinae daxitajivi baja Jesús cujunavatsi. Nexata baja Jesús jivi jamatabëcueneëjëbiaya livaisi apo yanijobitsi.

Pacuenia Jesucristo yabara Davidpijinë bajayata tajëvelia: "Tajatuxanenë," jai, yabara pelivaisi (Mt 22.41-46; Lc 20.41-44)

35 Jesúś livaisi tsipaeba templobota. Jesúś pi-jacuata nayabarajumaitsi:

—¿Detsa xuajitsia judíovi pecujarubivi apo jumecovënëtsi Cristo Dioso pexënato-cuene, ponë athëbëvetsica Dioso itorobijitsiatsica jivi pecapanepaenexa? Bajarapamonae saya jamatabécuenenavëxaniabiaya jumai tsabia-bi Cristo yabara: “Cristo raja itsa patsiana, Davidpijinë pemomo tsane,” jai tsabia-bi.

36 Davidpijinë bajayata Espíritu Santo pejamatabécueneta tajëvelia jumaitsi Cristo yabara mapacueniaje:

Dioso jumaitsi tajatuxanenëjavabelia: “Ecare abaxë tacujuanenia. Vecatsivajënae jumecovënëtsiaexanaenatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia, jai bajayata tajëvelia Davidpijinë mapacueniaje Cristo yabara.

37 'Nexata Davidpijinë bajayata Cristo yabara: “Tajatuxanenë,” itsa jai, nexata Cristo Davidpijinë apo pemomo. Tsipaji baja cajena Cristo saicaya Dioso pexënato, nayabarajai Jesúś judíovi pecujarubivi pecanaëjëtsinexa Cristo Dioso pexënato-cuene.

Nexata jivibitsaëtoxaneto Jesúś pejumetaevitsi jumebarëyatanetsi.

Pacuenia Jesúś jumaitsi jivijavabelia: “Judíovi

*pecujarubivi bitso pinijicuenia Dioso naneconitsiaexanaenatsi,” jai yabara pelivaisi
(Mt 23.1-36; Lc 11.37-54; 20.45-47)*

³⁸ Jesús jivi ayaubitsaëtoxanetojavabelia, pijajivijavabelia ata, livaisi tsipaeba. Nexata Jesús livaisi petsipaebijavata jumaitsi mapacueniaje:

—Xania, panayajivitaema, palivaisi judíovi pecujarubivi tsipaebapona, panejume-covënëtsiyaniva. Bajarapamonae jitsipabiaba tomara tuatuajéjava piapiajavanë penaxatababibavanapauenexa jivi peyaiyataenexatsi. Jitsipabiabanua bitso yaiyataeya pebajacobinexatsi callejava.

³⁹ Bajarapamonae itsa najoneyabiaba judíovi penacaetuatabiabibonëjava, jitsipabiaba penaenexa pexaniaviriajavanëta. Nexata natsiitapetabiaba penaenexa peyaiyataevitsi penaenexa petsinubijavanëta. Bajarapamonae itsa napatabiaba fiestajava ata, jitsipabiaba penaenexa peyaiyataevitsi penaenexa petsinubijavanëta.

⁴⁰ Bajarapamonae yamaxëitojorobiaya vecuanotabiabanua pamonajivi pevecuatëpaevanëtsi pecobecovëjavaxi. Bajarapamonae itajara pinijicuenia vajëcabiaba Diosojavabelia. Itsiata pepo pexaniajaijamatabëcueneta apo vajëcabiabi. Bajarapacuenia vajëcabiaba saya jivi petanexatsi Dioso itajara bitso bepejumecovënëtsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamonae Dioso apo pejumecovënëtsivi, jai Jesús judíovi pecujarubivi yabara.

*Pacuenia ofrenda rajuta Diosojavabelia
pamona pevecuatëpaevatsi yabara pelivaisi
(Lc 21.1-4)*

⁴¹ Itsamatacabi Jesús eca templobota. Pacajonita jivi palata jeyabiaba ofrendacuenia perajutsijava Diosojavabelia, bajarapacajoni pecanacujitsita Jesús eca. Nexata Jesús cobetaeyeca jivi palata pejeponaejava bajarapacajonita. Ayaijava palata pexainaevi, caejivi canacujitsia, ayaijava palata jepona.

⁴² Bajarajota napata pamona pevecuatëpaevatsi, bepejiobiva. Nexata bajarapova najia anijapala-tanëyobeje piamatamobinëyobeje.

⁴³ Nexata Jesús junata pijajivi. Jumaitsi pijajivi-javabelia:

—Xaniajanë pacuenia pacatsipaebijitsatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenebarëya daxita xua itsamonae jia bajarapacajonita matatoxenetsia.

⁴⁴ Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje bepejiobiva daxitajavayomi penaevetsijavayotaminexa, jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

13

Pacuenia Jesús pijajivitonëjavabelia tajëvelia tsipaeba itsamatacabi itsanacuapijivi templobo pexu-

*abijavanexatsica yabara pelivaisi
(Mt 24.1-2; Lc 21.5-6)*

¹ Itsa baja Jesús, pijajivi yajava, pitsaparena templobovecua, Jesús pijajivitonë jumaitsi Jesúsjavabelia:

—¡Tajatuxanenë, jica, nataema mapaibotoxanetonëje, mapaboxanetonë ataje! jai Jesús pijajivitonë.

² Nexata Jesús tajévelia jumaitsi pijajivitonëjavabelia:

—Daxita raja mapaboxanetonë tanemeje, bajarapoboxanetonëmi itsamatocabi itsanacuapijivi penetsianica irabetsica. Nexata mapaibotoxanetonëmije itsaiboto ata pejumavereca apo bocae tsane, jai Jesús tajévelia pijajivitonëjavabelia.

*Pacuenia itsijitsia Jerusalén tomarata,
daxitanacuanëjava ata, mapanacua pecopiaru-
caevajënaeje yabara pelivaisi*

(Mt 24.3-28; Lc 21.7-24; 17.22-24)

³ Jesús eca petsutojumata. Patsutojumata olivonaenë apaaxayo templobo canacujitsijavalia, bajarapatsutojumata Jesús eca. Nexata Pedro, Santiago, Juan, Andrés, bajarapamatatabëxëyo pijaepatojavata Jesúsjavabelia jumaitsi:

⁴ —Patajatuxanenë, pajitsipajë patanetsipae-binexamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë itsa copiapatsijitsia xua jumaitsimë templobo yabara? jai bajarapamonae Jesúsjavabelia.

5 Jesú斯 nexata tajëvelia vajunupaeba pacuenia itsamatacabi itsijitsia mapanacuataje. Jesú斯 jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecayamaxëitojorobinexa.

6 Tsipaji raja peyamaxëitojorobivnexa ayaubitsäeto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, Dioso athëbëvetsica taneitorobinëtsica jivi tacapanepaenexa,” jai tsane. Bajarapamonae jivi, ayaubitsäeto yamaxëitojorobiana.

7 'Vajabitsaë pexanaejava imoxoyonacuanëjava, tajënacuanëjava ata, pavënélivaisitaename. Itsiata pëtsa pajunavame. Bajara peneta itsane mapanacua pevereverecaevajënae. Itsiata baitsi jane bepijia bajarapamatocabi mapanacuaje abaxë apo vereverecajuni tsane.

8 Mapanacuaje pevereverecaevajënae peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ira najëabiana ayaicuenia nacuanëjava. Ayaijaniboxaneto najetarucaena nacuanëjava. Ayaicuenia bitso jivi beiobi tsane nacuanëjava. Daxita bajarapacuene itsa pataename, saya abaxë taxuxuabaponaena piayaicuene, jai Jesú斯 pijajivijavabelia tajëvelia pevajunupaebijavata pacuenia itsamatacabi itsijitsia mapanacuata.

9 Icatsia Jesú斯 tajëvelia vajunupaeba pacuenia itsamatacabi itsijitsia mapanacuataje. Jesú斯 jumaitsi pijajivijavabelia mapacueniaje:

—Nexata paxamë xania panayajivitaename. Tsipaji raja xanë patajajivixaemë, tomara

pevetsivijavabelia pacacaponabiabiana.
 Bajarapamona pacajumaconibabeyabiabiana
 judíovi penacaetuatabiabibonëta. Paxamë
 patajajivixaemë pacanubiana nacuaevetsivi
 pitabarata, presidentevi ata pitabarata.
 Nexata bajarajota bajarapamonaejavabelia
 patsipaebianame xanë talivaisi.

¹⁰ Nexata daxitanacuanëpijivjava patsipaebana-
 jetarubenaename pecapanepaelivaisinexatsi.

¹¹ Itsa pacataicaena papecaneconitsinexa
 nacuaevetsivijavabelia, pëtsa pajamata-
 tabëcuenebëjamë panenayajivicuaicuajainexa
 bajarapamonaejavabelia. Palivaisi
 panejamatabëcuenevetsina pacatonaitajëtsiana,
 patsipaebianame bajarapamonaejavabelia.
 Tsipaji raja bajarapaepatota Espíritu Santo
 pacacuaicuajaiyaexanaena. Paxamë baitsi
 panejamatabëcuenetapo pacuaicuajamë tsane.

¹² Bajarapamatamacabi patajajivixaemë,
 panacaemonae atamë, itsajivi panijamonaejivi
 ata pacacanajetsiana nacuaevetsivijavabelia
 papecabeyaxuabinexa. Paneaxa ata, paneena
 ata, pacacanajetsiana nacuaevetsivijavabelia
 papecabeyaxuabinexa. Panxi ata
 pacacanajetsiana nacuaevetsivijavabelia
 papecabeyaxuabinexa.

¹³ Daxitajivi pacaitoya tsane patajajivixaemë.
 Itsiata pajivi ajamatabëcuenesaëtsane
 Dioso pejumecovënëtsijava nacua
 pecopiarucaejavabelianexa, bajarapajivi Dioso
 capanepaenatsi, jai Jesùs pijajivijavabelia tajëvelia
 pevajunupaebijavata pacuenia itsamatacabitsijitsia
 mapanacuataje.

14 Icatsia Jesús tajëvelia vajunupaeba papiayaicuene itsamatacabí copiapatsijitsia Jerusalén tomarata. Jesús jumaitsi pijajivijavabelia mapacueniaeje:

—Diosojumepaebinëmi, profeta Danielpijinë, tajëvelia Dioso pitorobicueniatsi piayaicuene pevajunupaebilivaisi bajayata yaquina. Xua panijatomaranëmi vereverecaeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapëtaena papiayaicuene vajunupaeba mapalivaisitaje.) Nexata paxamë pataename bajarapapiayaicuene penucaejava templobota, itsajota picani apo benucae. Nexata Judea nacuata pejinavanapaevi itsa vënëlivaisitaena bajarapapiayaicuene penucaejava templobota, pëtsa nubena. Naxanitsiayo bajarapamonae rëcëpecaena ibotsutonëjavabelia.

15 Pajivi pijabojumata athëbëyo ecaya, itsa vënëlivaisitaena bajarapapiayaicuene penucaejava templobota, bajarapajivi perunaecujinaetsica bepijia najetabajiraviana. Pëtsa joneya pijaboyalia pejutsinexa pecobecovë.

16 Pajivi pijinia nacuenebaponapona pijapabita, itsa vënëlivaisitaena bajarapapiayaicuene penucaejava templobota, bepijia najetabajiraviana. Pëtsa naviata pijaboyabelia pejutsinexa penaxatabijava.

17 ¡Papetiriavi penacuento yacotajinavanapa, bitso bejiobi tsane bajarapamatocabí! ¡Bitso nabejio-bitsiaya jinavanapaena! ¡Papetiriavi ata mitoapae-nacuetoxi isajinavanapa, bitso bejiobi tsane bajarapamatocabí!

18 Bajaraxuata tajëvelia Diosojavabelia

pavajëcare piayapëbejematacabita papecatocopi-apatsiyaniva bajarapapiayaicuene. Nexata pamatacabì parëcëpecaename, pexaniamatacabì Dioso pacatocopatsiana bitso nabejiobitsiaya paneponaeyaniva.

19 Tsipaji raja bajarapamatocabi bitso jivi beiobi tsane. Pabejiobicuene abaxë jivi caeto ata apo tae Dioso nacua pexanaecujinae, bajarapabejiobicuene taena. Bajaraxuacujinae icatsia itsamonaë beiobiaexanae atatsi tsane, itsiata bajarapacuenia bitso apo beiobiaexanaetsi tsane. Tsipaji Dioso epatua yatuucutsiana jivi bitso nabejiobitsiaya pejinavanapaematacabianëminexa, bitso jivi nabejiobitsia pejinavanapaeyaniva.

20 Dioso epatua itsa apo yatuucutsi tsipae bitso jivi nabejiobitsiaya pejinavanapaematacabianëminexa, caejivi ata apo asaë tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapaematacabianëminexa, jai Jesús pijajivijavabelia tajëvelia pevajunupaebijavata papiayaicuene itsamatacabì copiapatsijitsia Jerusalén tomarata.

21 Icatsia Jesús tajëvelia vajunupaeba pacuenia itsamatacabì mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi. Jesús jumaitsi pijajivijavabelia mapacueniae:

—Nexata itsajivi yamaxëitojorobiaya itsa pacajumaitsi tsane: “Pataema. Mara Cristo nucale,” itsa pacajai tsane, pëtsa pajumecovënëtame. Itsa

pacajumaitsi tsane: “Bajarajota nuca Cristo,” itsa pacajai tsane, pëtsa pajumecovënëtame.

22 Itsamonaes jumai tsane: “Xanë raja Cristonë,” jai tsane. Itsiata jemajai tsane. Itsamonaes jumai tsane: “Diosojumepaebinënë raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonaes yamaxëitojorobaponaenatsi. Itsiata pamonaes pepacuenie Dioso pijajivi, Dioso pitapetsivitsi, bajarapamonae apo yamaxëitojorobi tsanetsi.

23 ¡Xania baja tsane! Xanë rabaja pacatsipaebatsi tajëvelia daxitacuene panenayajivitaenexa, jai Jesús pijajivijavabelia tajëvelia pevajunupaebijavata pacuenia itsamatocabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi.

Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi

(Mt 24.29-35, 42, 44; Lc 21.25-36)

24 Jesús tajëvelia navajunupaeba itsamatocabi icatsia pepatsijavanexatsica. Jesús jumaitsi pijajivijavabelia mapacueniae:

—Xanë tapatsivajënaetsica, jivi taena pecuju-navicuene. Jivi nabejiobitsiaya jinavanapaena. Nexata jivi nabejiobitsiaya pejinavanapaemata-cabicujinae matacabipijijuameto aitaquiri tsane. Meravipijijuameto ata aitaquiri tsane.

25 Tulupu ata othopaenica irabetsica. Daxitacuene, xua rubena athëbëtsia, najëabiana. Xanavaetsia apo rubenae tsane.

26 Nexata bajarapaepatota xanë, Daxitajivi Pematapijinënë, jivi netaena athëbëvetsica itarërëbota tanajetarucaejava. Patsianicajë daxitacuene taevetsinexa. Tanivenivenaecotia yajavapatsianicajé.

27 Bajaraxuacujinae ángelevi itorobianajë, pamonaе tajajivi, Dioso pitapetsivitsi, daxitanacuanëjavaverena tanetocaetuatsinexa xanëjavaberena, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

28 Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús ju-maitsi pijajivijavabelia mapacueniaje:

—Pacanaëjëre pacuenia itsi higueranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonejavanexa.

29 Bajara pijinia pacuenia peneta itsa pataename pecopiapatsijava, xua yabara pacatsipaebatsi, nexata payapëtaename imoxoyo baja tavajënae tsane tapatsijavanexatsica.

30 Xaniajanë pacuenia pacatsipaebijitsiatsi. Pitsijamatatabëcuenevi aeconoxae mapamatacabitaje jinavanapa, bajarapitsijamatatabëcuenevi abaxë, bexëajavabelia ata, apo verevererecae tsane. Matapania xua yabara pacatsipaebatsi, itsa baja copiapatsiana, bajarapamonae jane baja vereverecaëna.

31 “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamona, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia tajëvelia pevajunupaebijavata pacuenia itsamatacabi itsjitsia mapanacuataje.

32 Jesús icatsia jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsjitsia daxita xua yabara tajëvelia pacatsipaebatsi. Athëbëpójivi ata, ángelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesús pijajivijavabelia.

33 Icatsia Jesús jumaitsi pijajivijavabelia:

—Xania baja tsane. Daxitamatacabi saya panecopiaevetavanapaename. Tsipaji raja apo payapëtaemë tsane paepatota patsjitsianëtsica.

34 Nexata pacuenia bo pexainaenë, pijabo evetsiaexana pijajivi, bajara xanë itsinë tsane. Bo pexainaenë itsa ponaejitsia tajënacuayabelia, pijajivi evetsiaexana pijabo. Nexata pijajivi, caejivi canacujitsia, rajutapona petonacuenebavanapaejavanelatsi pecovëta. Nexata pijajiviyajuvënëne itoroba baupa pevetsinënëxa petoevetabiabinejatsi pijabobaupa. Bo pexainaenë jumaitsi bajaraponëjavabelia: “Xaniavaetsia netoevetabiabianame baupa

matapania tapatsimatacabijavabelianexa," jai bo pexainaenë.

³⁵ Nexata paxamë ata bajarapacuenia panecopiaevetavanapaename matapania tapatsimatacabitsicajavabelianexa. Tsipaji raja apo payapëtaemë tsane pamatacabita patsijitsianëtsica. Ajena meravi, caecanivia, patsipajë. Meravi tuatuajëta ata patsipajë. Matacabivëpata ata patsipajë. Bajayacunua ata patsipajë.

³⁶ Bajaraxuata xania baja tsane. Daxitamatacabi saya panecopiaevetavanapaename. Jemata itsa patsipajë, paepatota apo panecopiaevetsimë, pacacaxitajarabijitsipatsi panemajitsijavata.

³⁷ Palivaisi pacatsipaeabtsi paxamëjavabelia, daxitajivinexa jumaitsinë. ¡Daxitamatacabi saya panecopiaevetavanapaename! jai Jesús pijajivijavabelia.

14

*Pacuenia picani Jesús pijavabajitsaë jamatabëvaetabatsiyabara pelivaisi
(Mt 26.1-5; Lc 22.1-2; Jn 11.45-53)*

¹ Anijamatacabibeje abaxë ajibi pejonenexa pascuafiesta, itsafiestanua, pafiestajava judíovi baxane levadurata matajérëbinejeva pexanaepan. Nexata bajarapafiestabejевajënaeya, sacerdotevi penamatacitorobivi, judíovi pecujarubivinua, najumejaita picani bajarapafiestajava pevaetabinexatsi Jesús. Penajumetsënëtsilivaisita picani jamatabëvaetabatsi Jesús pebeyaxuabineatsi.

² Itsiata bajarapamonae najumaitsi:

—Fiestajava meta abaxë apo vaetabi tsanetsi jivi vajanacaitsacuenabiyaniva, najai bajarapamonaë.

*Pacuenia Jesús petiriva tsimataepanatsi petuxu-juviaceitera yabara pelivaisi
(Mt 26.6-13; Jn 12.1-8)*

³ Jesús ponapona Betania tomarata, Simón pijabota. Simón bajayajebi bitso peperabëtsabanaenëmi. Nexata Jesús pexaeyecaejavata mesata, petiriva cobenaimoxoyorenatsi petuxujuviaceitera, nardovënëra, alabastrobotellabëta pejeaceitera. Bajarapora bitso penamatamotsira. Nexata bajarapova yavëtoxobiaxuaba bajarapora, petuxujuviaceitera. Bajaraxuacujinae Jesús tsimataepanaicatsi bajarapaaceitera.

⁴ Bajarajota itsamonae penaenaevi itsataeyena Jesús petsimataepanaejavatsitsica, bajarapamonae jamatabëanaepanareca. Nexata épamonae najumai tsenae:

—¿Detsa xuajitsia saya xuaba bajarapacuenia maporaje?

⁵ Canajetsipa rajane. Nexata matamopitsipa trescientos padenariobeje matatoxenetsia. Bajarapapalata rajutsipa bepejiobivi bajarapacuenia peyavenonaenexa, najai tsenae épamonae.

Bajarapamonae anaepana bajarapovajabelia.

⁶ Nexata Jesús jumaitsi bajarapamonaejavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje.

7 Daxitamatacabí raja bepejiobivi jinavanapa itsaxuayo pajinavanapame. Pamatacabí pajitsipame pexaniacuene panetoexanaenexa bepejiobivajavelia, nexata patoexanaename. Itsiata baitsi jane xanë daxitamatacabí apo ponapon-aenë tsane paxamëjavata.

8 Mara papetirivaje pexaniacuene netoexana pacuenia baja cuencaëjëpatsi. Itsamonaë petëpaejivi batsiperabëepana petuxujuviacetera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviacetera, abaxë apo tëpae atanë. Nexata baja bajarapova neperabëxaniavaeta itsamonaë tanemëthëtsivajënae.

9 Xaniajanë pacuenia pacatsipaebijitsiatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabiabiananua pacuenia exana xanëjavaberena mapapetirivaje, jai Jesús pijajivijavabelia.

*Pacuenia Judas pona Jesús pijavajabitsaë pecobeyabelia pecanajetsinexatsiyabara pelivaisi
(Mt 26.14-16; Lc 22.3-6)*

10 Jesús pijajivi doce ponëbejeyajuvënënpnevënë Judas. Itsavënë Iscariote. Nexata Judas pona sacerdotevi penamatacaitorobivijavabelia. Jesús Jane baja yajumejiliatsi pecanajetsinexatsi. Nexata Jane baja Judas Jesús canajetatsi sacerdotevi penamatacaitorobivi pecobeyabelia.

11 Nexata sacerdotevi penamatacaitorobivi itsatane bajarapacuene, barëya. Jumaitsi bajarapamonae Judasjavabelia:

—Palata pacarajutsianatsi, jai.

Nexata jane baja xuacujinae Judas Jesús naitax-utocaevetaponaponatsi. Nexata paepatota Judas toyapëxanepanatsi, perajutsinexa jane baja bajara-pamonae pecobeyabelia.

Pacuenia Jesús barënabane pijajivi pecopiarutsinabani baja pebeyaxuabivajënaetsi yabara pelivaisi

(Mt 26.17-29; Lc 22.7-23; Jn 13.21-30; 1 Co 11.23-26)

¹² Junua jane baja fiesta, pafiestajava judíovi baxane levadurata matajërëabinejeva pexanaepan. Bajarapamatocabi ovejaxi babia pexaenexa pascua fiestamatacabí. Nexata Jesús yanijobatsi pijajivi.

—¿Detsa belia paponaenajë patacamitsaex-anaenexa pascua fiestamatacabí pexaejava nexaenexa? jai Jesús pijajivi.

¹³ Nexata Jesús itoroba anijanëbeje pijajivitonëbeje. Jumaitsi:

—Tomarabelia paponarebeje. Bajara-jotalia pacaxitarabianamebeje mera canalito pecanajetarucaenë. Bajaraponë papënajanajetarucaenamebeje.

¹⁴ Pabota bajaraponë joneyojopaena, bajarapabo pexainaenëjavabelia pajumaitsimëbeje tsane: “Vajanacacujarubinë raja jumaitsi: ‘¿Detsa jota pënëyatucutsibo eca, pabota tajajivi barëxaejitsianë xua jivi baxane pascua fiestamatacabí?’ jai raja vajanacacujarubinë,” pajamëbeje tsane bajarapabo pexainaenëjavabelia.

15 Nexata athëbëabetsia anijairabeje pënëyatuucutsibojavata, pacatsitajëtsianabeje. Bajarapaboënëta athëbëyotsia paira ayaiënëtuatuajë tsane. Daxitacuene bajarajota xainaena. Nexata vajaxaejavanexa bajarajotatsia paexanaenamebeje, jai Jesús pijajivitonëbejejavabelia.

16 Nexata jane baja ponabeje Jesús pijajivitonëbeje. Patabeje baja tomarabelia. Caxitajarababeje daxita pacuenia Jesús jumaitsisibeje. Nexata xua jivi baxane pascua fiestamat-acabi daxita Jesús pijajivi pebarëxaenexa, bajara-ponëbeje exanabeje jane baja.

17 Itsa baja meravitsia, Jesús patajopa bajarajota pijajivi, doce ponëbeje, yajava.

18 Daxita mesata pexaeyenaejavata, Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë, xanëjavata pexaeyecaenë, necanajetsiana tajavajabitsaë pecobeyabelia, jai Jesús.

19 Nexata Jesús pijajivi bejamatabëjiobireca. Nexata Jesús pijajivi, caenë canacujitsia, Jesúsjavabelia yanijobapona.

—¿Xanë tsaja tsane? jai tsaponae Jesús pijajivi.

20 Nexata Jesús jumaitsi pijajivijavabelia:

—Doce paponëmëbejeyajuvënënë raja. Ponëbeje peneta caecuenia panajuacajabutsianajëbeje panbë platojavabelia, bajaraponë tsane.

21 Nexata xanë, Daxitajivi Pematapijinënë, tëpaenajë pacuenia baja cajena xanë yabara Dioso pejumelivaisibaxutota tajëvelia jumaitsi. Itsiata ponë tajavajabitsaë pecobeyabelia

necanajetsiana, bajaraponë bitso beiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipatsi bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia.

²² Nexata pexaeyenaejavata Jesús pita panbë. Jesús jumaitsi Diosojavabelia:

—Pexaniacuene panetoexaname. Paneraju-tame pan, jai.

Bajaraxuacujinae epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

²³ Bajaraxuacujinae icatsia Jesús copavënëjavata yapita pijajivi pebarëapaeranexa. Diosojavabelia jumaitsi:

—Pexaniacuene panetoexaname. Paneraju-tame maporaje, jai.

Bajaraxuacujinae pijajivi bajarapora rajuta. Daxita Jesús pijajivi bajarapora apa.

²⁴ Jesús pijajivijavabelia jumaitsi:

—Tajana raja othopaena jivi ayaibitsaëtoxaneto pecapanepaenexatsi. Nexata tatëpaejava pejamatabëcuena, jivi yapëtaena pepacuenie xani-ajai Dioso jivi pecapanepaejavexa, pacuenia baja cajena tajëvelia Dioso najumecapanepaeya jumaitsi.

²⁵ Xaniajanë pacuenia pacatsipaebijitsiatsi. Xanë rabaja matavëjëa apo apaenë tsane uvacuaira mapanacuataje, matapania icatsia apaenajë Dioso pijanacuatastsia pejanauvacuaira, jai Jesús pijajivijavabelia.

*Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonécuenemë,” jai, yabara pelivaisi
(Mt 26.30-35; Lc 22.31-34; Jn 13.36-38)*

26 Jesús pijajivi barënaxëana Diosojumevajanë. Bajaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona.

27 Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabitsaëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename.

28 Itsiata baitsi jane tatëpaecujinae icatsia asaënë tsane. Nexata paxamë panevajënaeyabelia copiata ponaenajë Galilea nacuayabelia, jai Jesús pijajivijavabelia.

29 Nexata Pedro jumaitsi Jesúsjavabelia:

—Daxita mapamonaejé caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

30 Nexata Jesús jumaitsi Pedrojavabelia:

—Xaníajanë pacuenia catsipaebijitsiatsi. Ajena rabaja, pameravi, nanianaevëpata, anijajumebeje vacara pefiabivajënaeya,

nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

31 Itsata Pedro ajumesaëya jumaitsi Jesúsjavabelia:

—Nebeyaxuabijitsia ata tsane xamë yajava, itsata cajena apo nayavajunuaxainaenë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

*Pacuenia Jesús vajëta Diosojavabelia
Getsemanívënëjavata yabara pelivaisi
(Mt 26.36-46; Lc 22.39-46)*

32 Jesús, pijajivi yajava, pata Getsemanívënëjavata. Bajarajota Jesús jumaitsi pijajivijavabelia:

—Paneevetenare abaxë majotaje tavajëtsiepatoyo Diosojavabelia, jai.

33 Nexata Pedro, Santiago, Juan, bajara saya pamatabëxëyo, Jesús barëpona pesaicaeyojavabelia. Bajaraxuacujinae Jesús bitso najamatabëxaina. Nexata bejamatabëjiobireca.

34 Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata tanajamatabëxaina/java yatëpaejitsianë. Paxamë abaxë majotaje panacopabare. Paitavamë tsane. Pëtsa pamajitame, jai Jesús pijajivi acueyabi ponëbejejavabelia.

35 Nexata Jesús, caenë, pevajënaeyabelia icatsia tsiquirijavayo ponataba. Tsipaji Jesús tajëvelia yapëtane pacuenia Dioso tocopatatsi bitso

ayaicuenia pebejiobiaexanaenexatsi paepatota pijavajabitsaë beyaxuabijitsiatsi. Nexata Jesús irataeya bocajunua pevajëtsinexa Diosojavabelia. Vajëta picani Diosojavabelia bitso bejiobitsiaya pebeyaxuabiyaniavatsi.

36 Nexata Jesús pevajëtsijavata Diosojavabelia, jumaitsi:

—Taxa Diosomë, netocopatame picani tanebeyaxuabineña betajiobicueneta. Daxitacuene raja cacaëjëpa nexanaenexa. Nexata necapanepare bajarapabejiobicuenecuа. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús pevajëtsijavata Diosojavabelia.

37 Bajaraxuacujinae Jesús naviarena acueyabi ponëbeje pijajivijavaberena. Caxitaraba Jesús pijajivi pemajitanubenaevi. Nexata Jesús jumaitsi Pedrojavabelia:

—Simón, ¿pamajitanubename tsaja? ¿Apo pacacaejëpae tsabaja rovia caeepatoyo ata paneaitavatsenaenexa?

38 Pëtsa pamajitame. Paitavamëre. Pavajëre Diosojavabelia pibisiacuene paneexanaeyaniva. Tsipaji raja dovathi pacajamatatabëcueneëjëbiana. Paxamë picani panejamatabëcueneta pexaniacuene jamatabëpaexanabiabame. Itsiata baitsi jane apo pajamatatabëcuenesaëmë pexaniacuene paneexanaenexa, jai Jesús Pedrojavabelia.

39 Nexata icatsia Jesús pona pecovëyabelia pevajëtsinexa icatsia Diosojavabelia. Bajara icatsia pacuenia Jesús vajëta Diosojavabelia pacuenia vajëta copiata.

40 Icatsia Jesús naviarena pijajivijavaberena. Caxitaraba icatsia Jesús pijajivi pemajitanubenevi. Tsipaji baja Jesús pijajivi bitso itamajitsipana. Nexata Jesús pijajivi apo yapëtae pacuenia jumecanaviatsijitsia Jesúsjavabelia.

41 Icatsia abaxë Jesús naviata pecovëyabelia pevajëtsinexa icatsia Diosojavabelia. Bajaraxuacujiñae, acueyabi baja xuabeje pevajëtsicujinae, Jesús icatsia rena pijajivijavaberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Ajibi rabaja. Copiapata rabaja paepatota xanë, Daxitajivi Pematapijinënë, necanajetsijitsia pibisiacuene pexanaevi pecobeyabelia.

42 Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

Pacuenia Jesús vaetabatsi pijavajabitsaë yabara pelivaisi

(Mt 26.47-56; Lc 22.47-53; Jn 18.2-11)

43 Jesús pijavajabitsaë pevaetabijavatanexatsi, cuaicuajai tsanucae pijajivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënënëmi. Judas pënanajetarubenatsi jivi ayaubitsaëtoxaneto. Bajarapamonaeyajuvënëvi itsamonaе canajetarubena espadanë. Itsamonaе canajetarubena naebonë yajava. Bajarapamonaе itorobatsi sacerdotevi penamatacaitorobivi, judíovi pecujarubivi ata, judíovi pijaancianovi ata.

44 Judas pebarërenavajënae bajarapamona, copiaya baja cajena Judas tsipaeba pacuenia bajarapamona yapëtaejitsia Jesúscuene. Judas jumaitsi mapacueniaje:

—Ponë raja peneta bajacobiaya itabaratsutsunexuabianajë, bajaraponë Jesús tsane. Bajaraponë pavaetabianame. Pacobecëtsianame xaniavaetsia. Nexata panecobecëtsinë pacaponaermenä, jai baja cajena Judas pematacanajetarucaevijavabelia pebarërenavajënae.

45 Nexata jane baja Judas itsa patanajetaruca, exana pacuenia baja cajena jumaitsi pematacanajetarucaevijavabelia. Judas Jesús itabaratsutsuniaya bajacobatsi, Judas jane baja pematacanajetarucaevi peyapëtaenexa Jesúscuene.

46 Nexata jane baja Jesús pijavajabitsaë vaetabatsi. Cobecëtatsi xaniavaetsia.

47 Bajarajota Jesús pijajiviyajuvënënë pijaespada navemarajonotaxuabina. Muxuyoropaebi-axuaba sacerdotevi pepo penamatacaitorobinë pijajivitonë.

48 Nexata Jesús jumaitsi pevaetabivitsijavabelia:

—Paxamë meta panetaneme betanacobetoxotsinë. Bajaraxuata pacapona name espadanë, naebonë yajava, patanevaetabinexamë pacuenia pavaetababiabame penacobetoxotsinë.

49 Xanë caematacabí canacujitsia Dioso pejumelivaisi paxamëjavabelia pacatsipaebabibabatsi templobota. Ítsiata bajarapamatacabí apo panevaetabimë. Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata

tajëvelia jumaitsi xanë yabara, jai Jesús pevaetabivitsijavabelia.

⁵⁰ Nexata jane baja Jesús pijavajabitsaë pevaetabijavatatsi, daxita Jesús pijajivi xuabarëcëpecatsi pacuenia baja cajena Jesús jumaitsi tajëvelia pijajivijavabelia.

Pacuenia pevëjëato najtabajirava yabara pelivaisi

⁵¹ Pevëjëato pënanajetaruca Jesús pecaponaevitsi. Sábanata namataquinanajetaruca. Nexata pevëjëato bajarapamonae yasábanavaetabatsi.

⁵² Nexata pevëjëato sábana naisinaxuaba. Najtabajirava jumasanë.

Pacuenia Jesús nutatsi judíovi penamatacaitorobivi pitabarata yabara pelivaisi

(Mt 26.57-68; Lc 22.54-55, 63-71; Jn 18.12-14, 19-24)

⁵³ Jesús caponaliatsi sacerdotevi pepo penamatacaitorobinë pijaboyabelia. Nacaetuata bajarajota daxita sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava.

⁵⁴ Itsa baja Jesús caponaliatsi, nexata Pedro bajarapamonae pecovëya tajyo najetaruca. Sacerdotevi pepo penamatacaitorobinë pijabo matatoyorotsia yacaranata ibopanaxanetonë, mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatcaitorobinë pijabopanabota, Pedro nanonopeca isoto muxuneneta templobopijipolicíavita.

55 Nexata bajarapabo ënëtuuatujëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaicuajai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata Jesús pijaneconi.

56 Itsamonae saya penajumetsënëtsilivaisi paeba Jesús yabara. Itsita caelivaisi najuapaebi ata, najumejëpaeya apo paebi bajarapamonae.

57 Itsamonae nonobapuna. Pena-jumetsënëtsilivaisi paeba Jesús yabara. Penonobapunaeviyajuvënëñë jumaitsi mapacueniaje:

58 —Paxanë raja, pamatabëxëyo panubenajë ma-jotaje, pajumetaniji Jesús pejumaitisijava. Bajara-ponë jumaitsi: “Xanë raja xuabianicajë mapatem-ploboje, jivi pexanaebo. Acueyabi matacabita icatsia itsabo veretetsianajë. Jivi apo pexanaebo tsane,” jai maponë Jesúsje, jai penonobapunaeviyajuvënëñë.

59 Itsita daxita bajarapamonae najumejëpaeya apo paebi.

60 Nexata jane baja sacerdotevi pepo pena-matacaitorobinë nonotapuna bajarapamonae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejume-canaviatsinexa? ¿Xaniajai tsabaja pacuenia mapamonae caneconitsiajumaitsije? jai Jesúsjavabelia sacerdotevi pepo penamatacaitorobinë.

61 Jesús itsiata moya. Apo jumepitsi cajena. Nexata icatsia sacerdotevi pepo penamatacaitorobinë jumaitsi Jesúsjavabelia:

—¿Xamë tsabaja pepacuene Cristomë, athëbëvetsica Dioso pecaitorobinëtsica jivi necapanepaenexa? ¿Xamë tsaja, Dioso pexénatomë? jai.

62 Nexata Jesús jumaitsi bajaraponëjavabelia:

—Jājā, xanë rabaja. Paxamë raja panetaename, Daxitajivi Pematapijinënë, taecaejava Dioso pecujuanenia, daxitajamatabëcuene pecaëjëpaenëtsi. Panetaenamenua tanajetarucaejava athëbëvetsica itarërëbota, jai Jesús.

63 Bajarapacuenia Jesús pejumaitsijava itsa jumetane, sacerdotevi pepo penamatacaitorobinë penaxatatsijava anaeya titinaxuaba. Bajarapacuenia titinaxuaba pianaepanaexae Jesús pejumaitsijava yabara. Nexata sacerdotevi pepo penamatacaitorobinë jumaitsi daxita penacaetuatsivijavabelia:

—Pijacuata rabaja pejumaitsijumeta naneconita. Pematatsënëa apo namatavenonaetsi itsamonaе vajanacatsipaebinexa paneconi yabara maponëje naneconitsiaexanaejitsiatsi.

64 Paxamë rabaja pajumetaneme maponëje Dioso apo pejitsipaecuenia pecuaicuajaijava. Tsipaji Dioso bepexénato nataeya cuaicuajai. ¿Detsa nexata paxamë pajamatabëitsimë? jai sacerdotevi pepo penamatacaitorobinë daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

65 Nexata bajarapamonaeyajuvënëvi
Jesús itabarasuabatsi. Bajaraxuacujinae
papaëbërëpanata itaxutocëtatsi. Pitaxu-
tocëtsicujinaetsi itabaratsaquibabeponatsi
pecobethaitonëta. Nexata bajarapamonae jumai
tsaponae Jesúsjavabelia:

—¡Vënëjonare ponë caitabaratsaquibabepona!
jai tsaponae bajarapamonae.

Bajaraxuacujinae templobopijipolicíavi
itabarapacabiaxuabatsi Jesús.

*Pacuenia jane baja Pedro nayavajunuaxaina
Jesús pijajivitonëcuene yabara pelivaisi
(Mt 26.69-75; Lc 22.56-62; Jn 18.15-18, 25-29)*

66 Itsa abaxë Jesús sacerdotevi pepo penamata-caitorobinë pijabo ënëtuatuajëalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarajota taeyetatsi petiriva, sacerdotevi pepo penamatacaitorobinë pijabota penacuenebiva.

67 Bajarapova Pedro taeyetatsi penanonopecae-javata. Nexata bajarapova naitaxutobabatsia asaëya taenucatsi Pedro. Jumaitsitsi:

—Xamë ata rabaja naponaponame Jesússta,
Nazaret tomarapijinëta, jaitsi.

68 Nexata Pedro itsiata nayavajunuaxaina Jesús
pijajivitonëcuene. Nexata Pedro jumaitsi bajara-
povajavabelia:

—Jume raja. Apo yapētaenë cajena bajaraponë. Apo yapētaenë pacuene yabara nejumaitsimë, jai Pedro.

Bajaraxuacujinae Pedro pejonebaupajavaverenajavabelia natixilia. Nexata vacara fiaba.

⁶⁹ Icatsia bajarapova Pedro tanetsi. Nexata pamonae bajarajota nubena, bajarapamonaejavabelia bajarapova jumaitsi:

—Mara ponëje Jesús pijajiviyajuvënénëje, jai bajarapova Pedro yabara.

⁷⁰ Icatsia nexata Pedro jumaitsi:

—Jume raja. Apo yapētaenë cajena bajaraponë, jai.

Bajaraxuacujinae, icatsia caeepatoyocujinae, bajarajota penubenaevi Pedro jumaitsitsi:

—Xaniajai raeta baja cajena. Xamë Jesús pijajiviyajuvënénëmë. Tsipaji rabaja Galilea nacuapijinëmë. Galilea nacuapijivi pecuaicuajiaicuenia cuaicuajjamë, jaitsi.

⁷¹ Nexata Pedro pejumexaniataenexatsi, ajumesaëya jumaitsi:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapētaenë cajena ponë yabara panejumaitsimë, jai Pedro.

⁷² Itsa baja Pedro najumerereta bajarapacuenia pejumaitsijava, vacara icatsia fiaba. Nexata bajarajota Pedro najamatatabënapitajaraba pacuenia Jesús jumaitsitsi: “Anijajumebeje vacara pefiabivajënaeya, nayavajunuaxainaename tajajivitonëcuenemë. ‘Xanë cajena apo yapētaenë bajaronë,’ jamë tsane xanë yabara acueyabi xuabeje,”

pejaijavatsi Jesús, Pedro najaaraba. Nexata bajarajota Pedro bitso najamatabëxaina Jesús peju-maitsumetsi yabara. Pedro nexata nua.

15

Pacuenia Jesús nutatsi Pilato pitabarata yabara pelivaisi

(Mt 27.1-2, 11-14; Lc 23.1-5; Jn 18.28-38)

¹ Ajena baja matacabí tsarucapona, sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nacaetuata. Icatsia pematatsenéa itsamona, bajarapitsijamatabëcuenevi yajavanacaetuata penabarëcuaicuajainexa. Bajaraxuacujinae bajarapamonae Jesús cobecëtsiaya caponaliatsi nacuaevertsinë Pilatojavabelia.

² Nexata Pilato yanijobatsi Jesús.

—¿Xamë tsaja judíovi pepo nevetsinë? jaitsi.

Nexata Jesús jumaitsi Pilatojavabelia:

—Jäjä, xanë rabaja pacuenia nejumaitsimë, jai Jesús Pilatojavabelia.

³ Sacerdotevi penama itsamona, bajarapitsijamatabëcuenevi yajtacaitorobivi jumaitsi Pilatojavabelia:

—Jesús raja bitso pibisiacuene exanabiaba, jai.

⁴ Nexata icatsia Pilato yanijobatsi Jesús.

—¿Itsalivaisiyo ata tsaja apo yapëtaemë nejume-canaviatsinexa? ¿Apo jumetaemë mapacuenia pecaneconitsijavaje? jaitsi.

⁵ Itsiata Jesús matavëjëa apo jumepitsi Pilatojavabelia. Bajaraxuata Pilato apo yapëtae pacuenia exanaejitsia Jesúsjavabelia.

*Pacuenia baja Pilato tocopata Jesús pebeyaxu-abinexatsi yabara pelivaisi
(Mt 27.15-31; Lc 23.13-25; Jn 18.38-19.16)*

6 Nacuaevetsinë Pilato xaina pijacujirucuene. Caevai canacujitsia, pascua fiestamatacabí, Pilato copatabiaba caenë penaneconitsinë pepitsapaenexa penaneconitsivi pejebabiabibovecuá. Pajivi yabara jivi Pilatojavabelia vajëcabiaba, Pilato nexata copatabiaba bajarapajivi pascua fiestamatacabí. Bajarapacuenia Pilato caenë copatabiaba jivi pesivajamatabëcuene xanepanaenexatsi.

7 Pamatacabí Jesús naneconitsiaexanatsi, bajarapamatocabí Barrabásvénënë jivi pebarëbevi barënanconitsiaponapona penaneconitsivi pejebabiabibota. Barrabás, itsamonaé yajava, barënabia picani gobierno pijajivijavabelia. Nexata taicatsi. Naneconitsiaexanejebatsi penaneconitsivi pejebabiabibota.

8 Nexata jivi pona Pilatojavabelia. Jumaitsi bajarapamonae Pilatojavabelia:

—Pacuenia pascua fiestamatacabí copatabiabame caenë pepitsapaenexa penaneconitsivi pejebabiabibovecuá, bajarapacuenia panetocopare caenë pepitsapaenexa penaneconitsivi pejebabiabibovecuá, jai bajarapamonae Pilatojavabelia.

9 Nexata Pilato jumaitsi bajarapamonaejavabelia:

—¿Pajitsipame tsaja patacatocatsijava pepitsapaenexa Jesús, pajudíovimë pepo papecaevetsinë? jai Pilato.

10 Bajarapacuenia Pilato jumaitsi tsipaji yapëtane pajamatabëcuene yabara sacerdotevi penamatacaitorobivi tocaponarenatsi Jesús. Pilato jamatabëcueneyapëtane sacerdotevi penamatacaitorobivi Jesús pecueneitoyaxaetsi petocaponaejavatsirena.

11 Nexata bajarapamonae asaëya vajëca Barrabás pecapitsapaenexatsi. Tsipaji baja cajena sacerdotevi penamatacaitorobivi muxubijia penetsia jumaitsi jivijavabelia:

—Asaëya pavajëcaename Barrabás pecopatsinexatsi. Nexata Barrabás copatsianatsi pepitsapaenexa penaneconitsivi pejebabiabibovecua. Pëtsa pavajëcame Jesús pecopatsinexatsi, jai baja cajena sacerdotevi penamatacaitorobivi jivijavabelia.

12 Nexata icatsia Pilato yanijoba jivijavabelia:

—¿Detsa nexata xua pajitsipame taexanaenexa maponëjavabeliaje: “Judíovitsi pepo vajanacaevetsinë,” paneyabarajainëjavabelia? jai Pilato judíovijavabelia Jesús yabara.

13 Nexata bajarapamonae vavajai pinijijumeta.

—¡Cruzajavabelia cobematabiabarutsiaexanare! jai Pilatojavabelia.

14 Nexata Pilato jumaitsi bajarapamonaejavabelia:

—¿Detsa pitsineconi yabara nexata cobematabiabarutsiaexanaejitsipajë? jai Pilato Jesús yabara.

Itsiata bajarapamonae icatsia pinijijumeta vavajai.

—¡Cruzajavabelia cobematabiabarutsiaexanare! jai tsaponae.

15 Nexata baja Pilato tocopata Barrabás pepitsapaenexa penaneconitsivi pejebabiabibovecua jivi barajamatabécuexanepanaeya petaenexatsi. Nexata Pilato pijajivi, vajabitsaëvi, itoroba copiaya Jesús ayaicuenia pejumatitibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaëvi pecobematabiabarutsinexatsi cruzajavabelia.

16 Nexata baja vajabitsaëvi Jesús caponaliatsi nacuaevertsinë Pilato pijaboxanetojavabelia. Nexata bajarajota nacaetuata daxita vajabitsaëvi.

17 Bajaraxuacujinae Jesús quenetsiataeya xatatatsi peraënaetsautsaucaejava. Xua nacuaevertsinë banaxatata, bajaraxua xatatatsi benacuaevertsinëcuenia petaenexatsi. Coronacuenia pemataxatatsinexatsi, peejuvitoyoroto tsimataexanatsi. Bajarapatoyoroto Jesús mataxatatatsi.

18 Bajaraxuacujinae quenetsiataeya bajacobaponatsi.

—¡Bajaco, judíovi pepo pevetsinë! jai tsaponaе bajarapamonae Jesúsjavabelia.

19 Bajarapamonae caenë canacujitsia mataconibiaxuabaponatsi naebota. Suabaponatsinua. Beyaiyataeya itajara pematabacabëta tonubenajoneyabiabatsi Jesús pitabarata.

20 Jesús quenetsiataeya pecapocaponaecujinaetsi, vejumajonotatsi baja xua xatatatsi, peraënaetsautsaucaejava. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

*Pacuenia jane baja Jesús cruzajavabelia cobematabiabarutatsiyabara pelivaisi
(Mt 27.32-44; Lc 23.26-43; Jn 19.17-27)*

21 Alejandrobeje Rufobeje paxa, Simónvénënë, Cirene tomarapijinë. Nexata Simón najetaruca vayafotusatojavaverena. Nexata vajabitsaëvi Simón junatatsi, pacruzajavabelia Jesús cobematabiabarutsijitsiatsi, peyavenonaeyacaponaenexa.

22 Caponaliatsi Jesús Gólgotavénë tsutojavabelia. “Gólgota,” itsa jai hebreojumeta, mapajumetaje pejumaitsijume: “Jivimatasipatsuto,” pejajume.

23 Bajarajota picani Jesús rajutatsi vinora pia-paenexa, pematajéréabira mirravénëjavata, bitso penavixaetaeyaniva pecobematabiabijavatatsi cruzajavabelia. Itsiata Jesús apo apae.

24 Nexata jane baja Jesús vajabitsaëvi cobematabiabarutatsi cruzajavabelia. Bajaraxu-acujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami.

25 Bajayacunuaepatota, a las nueve, Jesús cobematabiabarutatsi cruzajavabelia.

26 Bajarajota Jesús pematabocoto matatsënëyo yaquinaruta tablapayota itsamonaë ata peyapëtaenexa pajamatabëcuene yabara Jesús cobematabiabarutatsi cruzajavabelia. Jumai tsarutsi peyaquinarutsiitane cruzajavata mapacueniaje: “Mara ponëje judíovi pepo pevetsinëje,” jai tsarutsi Jesús yabara.

27 Anijanëbeje penacobetoxotsinëbeje, Jesús yajavacobematabarutatsi. Caenë canacujitsia pijacruzata rubatsi. Bajaraponëbeje Jesús pemuxuneneta rutatsibeje. Itsanë Jesús pecujujanenia rutatsi. Itsanë Jesús petsavenonenia rutatsi.

28 Bajarapacuenia Jesús itsa yajavacobematabarutatsi penacobetoxotsinëbeje, nexata Jesús tocopiapatatsi pacuenia baja cajena Dioso pejumelivaisibaxutota tajëvelia jumaitsi Jesús yabara. Dioso pejumelivaisibaxutota tajëvelia jumaitsi Jesús yabara mapacueniae: “Naneconitsiaexanaenatsi bepibisiacuene pexanaenëcuenia,” jai baja cajena tajëvelia Dioso pejumelivaisibaxutota Jesús yabara.

29 Jesús pecobematabarutsijayatatsi cruzajavelia, bajaraxuayo penajetarubenaevi Jesús itaropitsiaya bijataeyababatsi. Jumai tsabiabi bajarapamonae:

—Yiara jane maitsimëje. Xamë raja imata jumaitsimë: “Xuabianicajë templobo. Acueyabi matacabita icatsia veretetsianajë itsabo,” jamë.

30 Nacapanepare jane baja nijacuata. Cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

31 Bajara pijinia pacuenia sacerdotevi penamatacaitorobivi, judíovi pecujarubivi ata, capocaponatsi Jesús. Épanonae najumaitsi:

—Maponëje itsamonae yabara jumai tsabiabi: “Capanepaenajë jivi,” jai tsabiabi. Caranata pijacuata penacapanepaenexa, apo caëjëpaetsi.

32 Itsa xaniajai pepacuene Cristo, athëbëvetsica Dioso pitorobinëtsica jivi pecapanepaenexa, Israel

nacuapijivi pepo pevetsinënexanua, aeconoxae runaenica cruzajavavetsica vajataenexa. Nexata jane baja jumecovënëtsianatsi Cristonëcuene, najai bajarapamonae capocaponaeya Jesús yabara.

Ponëbeje ata Jesús yajavacobematabiabarutatsi, bajaraponëbeje ata, Jesús bijataerucatsibeje.

*Pacuenia baja Jesús tēpa yabara pelivaisi
(Mt 27.45-56; Lc 23.44-49; Jn 19.28-30)*

³³ Jesús baja itsa tēpaejitsia, ajena matonejejitsia, daxita nacuajava aitaquiri tsajuni. Matapania caniviyojavabelia, bejamatabëcuene a las tres, nacua napebeta icatsia.

³⁴ Nexata icatsia paepatota nacua napebeta, bajarapaepatota pinijicuenia Jesús aëjai. Jumaitsi:

—Eloi, Eloi, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsjume: “TajaDioso, tajaDioso, ¿detsa xuajitsia baja tajaepato necopatame?” pejajume.

³⁵ Nexata itsamonaes bajarajota penubenaevi bijiaya jumetane bajarapacuenia Jesús pejumaitsjava. Nexata saya jamatabëcuenenavëxaniabiaya jumaitsi bajarapamonae:

—Jica, pajumetaema. Mara ponë junata profeta Elíaspijinëmije, Diosojumepaebinëmi, jai bajarapamonae.

³⁶ Nexata bajarapamonaeeyajuvënënë piajatuvinorayalia bepilia jabutaxuaba esponjavënëjava. Bajaraxuacujinae esponjavënëjava naeboupita cétaruta. Toyotsiatsi picani Jesús petsutsuninexa bajaraxua. Ponë picani Jesús toyotsiatsi

bajaraxua petsutsuninexa, bajaraponë jumaitsi penajuanubenaevijavabelia:

—Bajarapacuenia abaxë copatarutatsi Jesús. Taenatsi Elíaspijimë itsa najetaruca cruzavecua penutsinexatsitsica Jesús, jai bajaraponë capocaponaeya.

³⁷ Jesús icatsia pinijicuenia aëjai. Bajaraxuacujinae jane baja Jesús tēpanajereca.

³⁸ Paepatota Jesús tēpanajereca, bajarapaepatota templobo ènètuatuajéalia peyatuucutarutsipana, ayaipapaëbérëpanaxaneto, titititica tuatuajéareca, athëbëvetsicacujinae irabereca. ³⁹ Nexata paepatota Jesús tēpanajereca, vajabitsaëvi pijacapítán Jesús pitabara canacujitsalia nuca. Nexata bajaraponë taenuca Jesús pinijicuenia peaëjaijava. Taenucanua Jesús petëpanajetsijavareca. Nexata vajabitsaëvi pijacapítán jumaitsi:

—Matsaena ponë tēpaje, pepacuene baja rovia Dioso pexénato, jai.

⁴⁰ Bajarajota petiriavibitsaëtoxaneto tajiyoverena taenubena Jesús petëpaejava. Bajarapapetiriavi tuatuajéta nanubena mapamatatabëxëyoje. Itsava Maríavënëva, Magdala tomarapijiva. Itsava Salomévënëva. Itsava icatsia Maríavënëva. Bajarapova Santiagobeje Josébeje pena. Bajaraponë Santiago, pevëjéato abaxë itsanë Santiagovënënëvecua.

⁴¹ Pamatacabí abaxë Jesús ponapona Galilea nacuata, bajarapapetiriavi Jesús pënajinavanapatsi peyavenonaenexatsi. Papetiriavibitsaëtojavata Maríabana nanubena, bajarapapetiriavi ata Maríabana Jesús najuapënaponarena Galilea nacuaverena Jerusalén tomaraberena.

Pacuenia Jesús petëpaenë mëthëtatsi yabara pelivaisi

(Mt 27.57-61; Lc 23.50-56; Jn 19.38-42)

42-43 José Arimatea tomarapijinë, judíovi pevetsinë, peyaiyataenëtsi. Bajaraponë José copiaevetaponapona pecopia patsijava pamatacabí caenë Dioso evetsijitsia daxita pijajivi mapanacuataje. Judíovi baja penacueraevetsimatacabinexa pevajënaeya pamatacabí caniviyotsia baja. Bajarapamatacabí judíovi banacuenevereta baja penacuenebijava. Nexata bajarapaepatota José acueneura ata, najamatabësaëta. Nexata lia nacuaevertsinë Pilatojavabelia. Nexata José vajëta Pilatojavabelia petocopatsinexatsi Jesús petëpaenë pemëthëtsinexa.

44 Nexata Pilato jamatabëjumaitsi:

—Xaniajai tsamë rabaja Jesús tëpa, jamatabëjai tsipaji abaxë bajayajebi Jesús apo rucae cruzajavabelia pecobematabiabarutscujinaetsi.

Nexata Pilato junata vajabitsaëvi pijacapitán. Nexata Pilato yanijoba vajabitsaëvi pijacapitánjavabelia, Jesús petëpaecuene Pilato peyapëtaenexa.

45 Nexata vajabitsaëvi pijacapitán tsipaeba Pilatojavabelia.

—Jesús rabaja capanepaeya tēpa, jai.

Nexata Jane baja Pilato José tocopatatsi cruzajavavetsica pepitsinexa Jesús petëpaenë.

46 Nexata José comuata pexaniaviriasávana. Bajaraxuacujinae José Jane baja cruzajavavetsica pitsica Jesús petëpaenë. Daxitanëreca mataquionaeya matacacëba pexaniaviria

piapiasábanapanata. Bajaraxuacujinae itsajota cajena José iboitapajanitojavata pinijiibovaju ex-anaeyaexanabuata petëpaevi pebuataponaenexa, bajarapaibovajualia José buata Jesús petëpaenë. Bajaraxuacujinae pinijiibopanaxaneto José tixirena. Yavajuvvëpaacatabuata.

47 María Magdala tomarapijiva, itsava pijinia María, José pena, bajarapovabeje tanebeje itsajota Jesús buatatsi petëpaenë.

16

Pacuenia Jesús petëpaecujinae icatsia asaë yabara pelivaisi

(Mt 28.1-10; Lc 24.1-12; Jn 20.1-10)

1 Judíovi baja penacueraevetsimatacabí itsa verevereca, acueyabi povamaxëto comuata petuxujuvira. Itsava Maríavënëva, Magdala tomarapijiva. Itsava Salomévënëva. Itsava icatsia Maríavënëva. Bajarapova Santiago pena. Bajarapamonae petuxujuvira comuata peperabëexabinexa picani Jesús petëpaenë.

2 Nexata baja judíovi penacueraevetsimatacabí itsa verevereca, meravia pitsijavata, ajena baja matacabí tsarucaponae, bajarapamonae ponalia Jesús pebuatsiibovajutsijavabelia.

3 Nexata bajarapamonae namutualia najumaitsi tsanajetarubena:

—¿Jipatsa meta nacatotixitsiana Jesús peyava-juvëpa acatabuatsiibopanaxanetotsi? najai tsanajetarubena bajarapamonae.

⁴ Nexata bajarapamona itsa imoxoyotabuatapona, naëcobarëcpalia ibovajujavabelia. Nexata taeyabuata ibopanaxanetomi petixitabuatsijavia ibovajuvëpavecua. Bajarapaibopana bitso pinijiibopanaxaneto.

⁵ Nexata petiriavi itsa joneya Jesús pebuatsiibovajutsijavia, taeyeta pecujuanenia pevëjëato. Bajaraponë naxatateca piapiajava penioponaejava. Nexata petiriavi najunaviaca.

⁶ Nexata pevëjëato jumaitsi petiriavijavabelia:

—Pëtsa panajunaviacame. Paxamë picani pajitame Jesús, Nazaret tomarapijinë, ponë cobematabarutatsi cruzajavabelia. Asaë rabaja icatsia bajaraponë petëpaecujinae. Ajibi rabaja tsarucae majotaje. Pataema jane itsajota picani buatatsi.

⁷ Paponare baja. Patsipaebianame pijajivijavabelia, Pedrojavabelia ata. Pajumaitsimë tsane bajarapamona javabelia: “Jesús pina panevajënaeyabelia pona Galilea nacuayabelia. Baja pina jotalia pacaxitarabianame Jesús pacuenia baja pacajumaitsitsi,” pajamë tsane pijajivijavabelia, jai pevëjëato petiriavijavabelia.

⁸ Nexata saya bajarapapetiriavi rëcëpeca Jesús pebuatsiibovajutsivecua. Neconecojai saya pecajunavi. Nexata namutoepatua apo tsipaebi itsajivijavabelia ata. Tsipaji bitso junava.

*Pacuenia Jesús petëpaecujinae, icatsia itsa asaë, tsitanaitajëta María Magdala tomarapijivajavabelia yabara pelivaisi
(Jn 20.11-18)*

9 Judíovi baja penacueraevetsimatacabitsa verevereca, meravia pitsijavata, ajena baja matacabi tsarucapona, Jesús icatsia asaë petëpaecujinae. Bajarapamatocabi copiata Jesús tsitanaitajëta María, Magdala tomarapijivajavabelia. Bajarapova cajena copiaya Jesús vecuacapitsapa siete padovathibeje itsa abaxë Jesús apo beyaxuabitsi.

10 Nexata María, Magdala tomarapijiva, Jesús petsitanaitajëtsicujinaetsi, pona Jesús pijajivijavabelia. Nexata María pevajënae Jesús pijajivi abaxë vënueyena Jesús. Nexata María itsa pata Jesús pijajivijavabelia, tsipaeba pacuenia María tane Jesús.

11 María jumaitsi Jesús pijajivijavabelia:

—Jesús rabaja icatsia asaë petëpaecujinae. Taniji rabaja tajacuata, jai.

Itsíata Jesús pijajivi apo jumexaniataetsi María.

Pacuenia Jesús petëpaecujinae icatsia itsa asaë, tsitanaitajëta pijajivitonëbejejavabelia yabara pelivaisi

(Lc 24.13-35)

12 Jesús pijajivitonëbeje najetaru McCabeje namutua. Nexata Jesús pijajivitonëbeje namutua penajetarucaejavatabeje, Jesús tsitanaitajëta beitsanëcuenia pijajivitonëbejejavabelia.

13 Nexata Jesús pijajivitonëbeje itsa tanebeje Jesús, naviatecabeje. Nexata pacuenia tanebeje Jesús, tsipaebabeje itsamona Jesús pijajivijavabelia. Itsíata bajarapamonae apo jumexaniataetsibeje.

Pacuenia Jesús petëpaecujinae, icatsia itsa asaë, pijajivi itoroba pexanialivaisi jivi petsipaebanajetarubenaenexa daxitanacuanëjava yabara pelivaisi (Mt 28.16-20; Lc 24.36-49; Jn 20.19-23)

14 Bexëajavabelia icatsia Jesús tsitanaitajéta pijajivi once ponëbejejavabelia penabanenaejavata mesata. Nexata Jesús pinijicuenia muxujioba pijajivi piajamatabëcuenetajaxae. Muxujiobanua apo pejumecovënëtsixaë petsipaebijavatsi pamonae tane Jesús icatsia piasaëjava petëpaecujinae.

15 Nexata Jesús jumaitsi pijajivijavabelia:

—Paponare daxitanacuanëjava daxitajivi panetsipaebanajetarubenaenexa pexanialivaisi pecapanepaelivaisinexatsi.

16 Pajivi jumecovënëtsiana bajarapalivaisi, nexata pabautisabianame. Bajarapajivi Diosojavabelia capanepaenatsi. Pajivi apo jumecovënëtsi tsane bajarapalivaisi, daxitamatacabijavabelianexa naneconitsiana Diosojavabelia.

17 Pamonae peneta jumecovënëtsiana bajarapalivaisi, mapacuenia exanavanapaenaje. Tavënëta jivivecuá capitsapaponaena dovathi. Itsaviriajumetanua, apo penatsipaebijumemita, jemata natsipaebiana.

18 Bajarapamonae jomo pecobeta pitsi ata tsane, apae atanua tsane jivi petëpaeyaexanaera, itsiata apo tēpae tsane. Bajarapamonae itsa nacobebuatsiana piavitanejivi pematatsënëvereca, pejayatisjivi jamatejema tsane piavitanejavavecua, jai Jesús pijajivijavabelia.

*Pacuenia Jesús petëpaecujinae, icatsia itsa asaë,
naviata baja athëbëabetsia yabara pelivaisi
(Lc 24.50-53)*

¹⁹ Vajatuxanenë Jesús livaisi petsipaebicujinae pijajivijavabelia, Dioso baja pesaëta catsiatsi athëbëabetsia. Nexata athëbëtatsia Jesús eca Dioso pecujuanenia penajuaevetsinexabeje daxitacuene. ²⁰ Nexata jane baja Jesús pijajivi daxitanacuanëjava jivi tsipaebanajetarubena bajarapapexanialivaisi. Nexata daxita pamonae jumetaeyabiabatsi, jumecovënëtabiabatsi pexaniajailivaisi petsipaebicuene. Tsipaji Jesús pijajivi jamatabëcuneyavenonabiaba Jesús pijajivi pinijicuene pexanaenexa jivijavabelia livaisi petsipaebabiabijavata.

Dios pejumelivaisibaxuto pejanalivaisibaxuto New Testament in Guahibo

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guahibo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 18 Apr 2025 from source files
dated 29 Jan 2022

bc03f416-faf8-5000-bfb5-5ca8a3fa98cf